

ማቶስ ጻፌዳ ምሽራቹዋ ቃላ ገሉዋ

ማቶስ ጻፌዳ ምሽራቹ፡ የሱስ ያና ጌተትያ ህደታይ ካስ ኦደት ኡቴዳ ቆልያ ግድያዋን ጸሳይ ካስ ኤጫ ጫቁዋን ባረ አሳዉ እሜዳ ህደታ ቃላ ፖሌዳዌ የሱሳ ባጋና ግድያዋ ኦድያ ምሽራቹዋ ቃላ ኦይቄዳዋ። ሀ ምሽራቹዋ ቃላይ የሱስ ኡንቱንቱ ግድን የለቲደ ድጩዳዌ አይሁዳቱ ጸላላሳ ግድናን፡ አላምያ ኡባን ደእያ አሳሳ።

ማቶስ ጻፌዳ ምሽራቹዋ ቃላይ ዳር አከካን ጸፈቴዳ ማጻፋ። የሱሳ የለታን ደሚደ፡ እ ጸማቅቴዳዋን እ ፓጩቴዳዋ ኦድ ሰሚደ፡ ጋሊላን እ ቃላ ኦዳዳዋ፡ ታማርሴዳዋን ሀርጋንቻቱዋ ፓሌዳዋ ኦዳ። ሄዋፕ ካሊደ የሱስ ጋሊላፕ የዱሳላመ ቤዳዋን እ ሀ አላምያን ጋምኤዳ ዉርሰሳ ሳምንታን ህኔዳ የዋቱዋ ቆንጭሴ። ሄዋንቱካ እ ካቀቶዋ፡ ሀይቄዳዋን ደንዴዳዋ ኦዲኖ።

ሀ ምሽራቹዋ ቃላይ የሱሳ፡ ጸሳ ህግያ ብለላ እማናዉ ማታይ ደእያዋን ጸሳ ካዉተሳባ ኤርሰያ ዋልቃማ ታማርሰያዋ ኦሊደ ሺሺዳ። አ ትምርትያፕ ዳርያ ባጋይ፡ ዳማ ዳማ ኦግያን ገገቴዳ እቼሹ ሳን ሻከቱ።

1. ጸሳ ካዉተሳን ደእና አሳ ኤሻ፡ ኦሱዋ፡ ማታን ዉርሰሳ ካጫ ኦድያ ደርያ ቦላ ትምርትያ (ማቶሳ 5:1—7:28)።
2. ታማን ላኡ የሱሳ ካልያዋንቱ ምሽራቹዋ ቃላ ታማርሳናዉ ቤዳ ዋደ ኡንቱንቶ እመቴዳ ካለሉዋ (ማቶሳ 10)።
3. ጸሳ ካዉተሳባ ታማርሰሽን ሺቄዳ ዳማ ዳማ ሌምሳቱዋ (ማቶሳ 13)።
4. የሱሳ ካልያዋንቱባ ብል ኦድያ ትምርትያ (ማቶሳ 18)።
5. ሀእ ዋድያ ዉርሰሳን ጸሳ ካዉተሳ ዩሳ ጴልያዋን እመቴዳ ትምርትያ (ማቶሳ 24-25)።

ሸምፓቱዋ ኡባቶ እመቴዳ ቃንሳ ቆፋቱዋ

- የሱስ ክርሰቶሳ ጉየ ዘረሳን የለታ 1:1—2:23
- ጸማቅያ ዮሃንሳ ኦሱዋ 3:1-12
- የሱስ ጸማቅቶዋን ፓጩቶዋ 3:13—4:11
- የሱስ ኦሱዋ ጋሊላን ደምዋ 4:12—18:35
- የሱስ ጋሊላፕ የዱሳላመ ቦዋ 19:1—20:34

የሩሳላመንን እዝ የሹዋን የሱሳ ዉርስላ ሳምንታ 21:1—
27:66
ኑ ጎዳ የሱሳ ደንዲዋን ቆንጨላ 28:1-20

የሱስ ክርስቶሳ የለታ ማራ
(ሉቃሳ 3:23-38)

1 ሀዌ ዳዊታ ዛርያን ኡብራሃመ ዛረ ግዴዳ የሱስ ክርስቶሳ የለታ ኦድያ ማጻፋ።

2 ኡብራሃመ፣ ይሳቃ የሌዳ፤ ይሳቅ፣ ያቆባ የሌዳ፤ ያቆብ፣ ይሁዳነ ኦ እሻቱዋ የሌዳ።

3 ይሁዳይ ትእማርፕ ፓሬሳነ ዛራሀ የሌዳ፤ ፓሬስ፣ ሄጽሮና የሌዳ፤ ሄጽሮነ፣ ራማ የሌዳ።

4 ራመ እምናዳባ የሌዳ፤ እምናዳብ፣ ናኦሶና የሌዳ፤ ናኦሶነ፣ ሰልሞና የሌዳ።

5 ሰልሞነ፣ ራኡቦ ጌተትያ ምሽራትፕ ቦኤዛ የሌዳ፤ ቦኤዝ፣ ኡሩቶ ጌተትያ ምሽራትፕ እዮቤዳ የሌዳ፤ እዮቤደ፣ እሰይ የሌዳ።

6 እሰይ ካትያ ዳዊታ የሌዳ።

ካትያ ዳዊተ፣ ኦርያ ማቻትፕ ሶሎሞና የሌዳ።

7 ሶሎሞነ፣ ሮብኣማ የሌዳ፤ ሮብኣመ፣ ኡብያ የሌዳ፤ ኡቦ፣ ኦሳፋ የሌዳ።

8 ኦሳፋ፣ ዮሳፌጾ የሌዳ፤ ዮሳፌጾ፣ እዮራማ የሌዳ፤ እዮራመ፣ ኦዝያ የሌዳ።

9 ኦዝያነ፣ እዮኣታማ የሌዳ፤ እዮኣታመ፣ ኡካዛ የሌዳ፤ ኡካዝ፣ ሀዝቂያሳ የሌዳ።

10 ሀዝቂያሰ ምናሳ የሌዳ፤ ምናሰ፣ ኡሞጾ የሌዳ፤ ኡሞጾ፣ እዮሰያሳ የሌዳ።

11 እሰራኤልያ ኦሳይ ኡሞደቲደ፣ ባብሎን ጋድያ ቤዳ ዋደ፣ እዮሰያሰ እኮንያናነ * ኦ እሻቱዋ የሌዳ።

12 ባብሎን ኡሞዲዋፕ ጉይያን፣ እኮንያናነ ሳላትያላ የሌዳ፤ ሳላትያላ፣ ዘሩባቤላ የሌዳ።

13 ዘሩባቤል፣ ኡብዩዳ የሌዳ፤ ኡብዩደ፣ ኤልያቄማ የሌዳ፤ ኤልያቄሞ፣ እዞራ የሌዳ።

1:5 ኡሩቶ 4:18-22፤ 1 ኡዲዋ 2:13-15 * 1:11 ሄዋ ጉሳይ፣ ዮኡክና ግያዋ፤ ቃይ ፓይዲዋ 12 ደእያዋካ ብለላይ እቱዋ። 1:11 2 ካታ. 24:14-15፤ 2 ኡዲዋ 36:10፤ ኤር. 27:20

14 እዘረ ሳዶቃ የሌዳ፤ ሳዶቀ፣ እኪማ የሌዳ፤ እኪመ ኤልዩዳ የሌዳ።

15 ኤልዩዳ፣ አልኣዛራ የሌዳ፤ አልኣዛረ፣ ማታና የሌዳ፤ ማታነ፣ ያቆባ የሌዳ።

16 ያቆብ፣ ክርስቶሳ ጌተትያ የሱሳ የሌዳ ማይራሞ ኦቼዳ ዮሴፋ የሌዳ።

17 ሰሞ የለታይ ኡባይ አብራሃሞፕ ዳዊታ ጋካናዉ ታማነ ኦይዱ የለታ፤ ዳዊተፕ ደሚደ፣ አሳይ ባብሎነ ጋድያ ኦሞደቲደ ቤዳ ዎድያ ጋካናዉ ታማነ ኦይዱ የለታ፤ አሳይ ባብሎነ ጋድያ ኦሞደቲደ ቤዳ ዎድያፕ ክርስቶስ † የለቲዳ ዎድያ ጋካናዉ ታማነ ኦይዱ የለታ።

የሱስ ክርስቶሳ የለታ (ሉቃሳ 2:1-7)

18 የሱስ ክርስቶሳ የለታይ ሀዋ ማላ፤ አ ዳያ ማይራማ ዮሴፎ ኦሽታ ቃሽታ ኡታዱ። ሄ ዎደ ዮሴፎና ጋከተናን ደኣደ፣ ጌሻ አያናን ሻሃራዱ።

19 እዘ ጊገስ ዎሌዳ ዮሴፎ ጽሎ አሳ † ግዴዳ ድራዉ፣ እዘ ካዉሻናዉ ኮይቤና፤ አብ ቆንጭሰናን እዘ አጋናዉ ቆፔዳ።

20 ሽን እ ሄዎ ቆፕሽን፣ ጎዳ ኪታንቻይ አኩሙዋን § አናና ጋከቲደ፣ “ዳዊተ ናኣ ዮሴፎ፣ ማይራማ ጌሻ አያናን ሻሃራዳ ድራዉ * እዘ አካናዉ ያዮፓ።

21 እዘ አቱማ ናኣ የላናዉኑ፤ ኔንካ፣ እ አሳ ናጋራፕ አሽያ ድራዉ አ ሱንሳ የሱሳ ጋደ ጸሳናሳ” ያጌዳ።

22-23 ቃይ ጎዳይ ናብያ ባጋና፣ “ወደራታ ሻሃራናዉኑ፤ ናኣካ የላናዉኑ፤ እ ሱንሳይካ አማኔላ ጌተታናዋ” ያጌዳዌ ፖለታና ማላ፣ ሀዌ ኡባይ ሃኔዳ፤ “አማኔላ” ያግያዌ፣ “ጸሳይ ኑናና ደኤ” ያግያዋ።

† **1:17** ክርስቶሳ፣ ግያዌ ግሪክ ቃላና ግደደ፣ መስሀ ጉሳይ እብራይስጻ ቃላና ግዲደ ላኡዋ ብለላይካ “ኦክቲዳዋ” ጉሳ። † **1:19** ዮሴፎ ጽሎ አሳ ግያ ቆፋዉ ሄዙ ኦግያን ብለላይ እመታና ዳንዳዬ፡ 1. ጸሳባዉ ኡባዉ ኤና ጊደ አዛዘትያ አሳ፤ አማልያ ሎኦ አሳ። 2. ጋራ (ቃረታንቻ)። 3. ሎኡዋ። ሄዎ ጉሳይ፣ ኡባ ካላ ሎኦባ ኦልያ አሳ ጉሳ። § **1:20** አኩሙዋን ጉሳይ፣ ጮካ ጎኤና አኩሙዋ ግደናዳን አይሁዳቱዋ አኩሙዋ ጉሳይ፣ ጸሳይ ልክ ቆንጭያ ኦግያ። * **1:20** ጌሻ አያናን ሻሃራዳ ድራዉ፣ ጉሳይ እዛ ሀዋ ጋካናሽን የለታናዳን ናግያ ናኣይ፣ ጸሳ ጌሻ አያናፕ ዬ ጉሳ። **1:21** ሉቃሳ 1:31 **1:22-23** ኢሳ. 7:14

24 ዮሴፎ ገሞእሹዋጥ ቤጎቲደ፣ ጎዳ ኪታንቻይ ባረና ኣዛዞዋዳን፣ ማይራሞ ባረ ጎለ ኣፌዳ።

25 ሸን ናኣይ የለታና ጋካናዉ ዮሴፎ እዘኮ ሸቅቤና፤ ቃይ ናኣካ የሱሳ ጊደ ሱንጮዳ።

2

ዶላሃ ባጋጥ ዬዳ ጸልንትያ ፓይድያ አሳቱዋ

1 የሱስ ይሁዳ ጋድያን ቤተሌመ ጌተትያ ካታማን ሄሮድስ ካዉቲደ ደእያ ዋደ የለቴዳ፤ ሄዋጥ ጉይያን፣ ጸልንትያ ፓይድያ አሳይ * አዋይፊ ዶልያ ባጋጥ የሩሳላመ ዪደ።

2 “እይሁዳ ካትያ ግዳናዉ የለቴዳ ናኣይ ሀቃን ደኢ? ኑን አዋይፊ ዶልያ ባጋና ከሴዳ ኣ ጸልንትያ በኢደ፣ እዉ ጎይናናዉ ዬዳ” ያጊደ ኦቹድኖ።

3 ካትያ ሄሮድስ፣ ሄዋ ሰሲደ ዳጋሜዳ፤ የሩሳላመን ደእያ አሳይ ኡባይካ ዋዛና ባዬድኖ።

4 ሄሮድስ ቄሳቱዋ ካፓቱዋ ኡባቱዋን ሙሴ ሀግያ ታማርሰያንታ ጸሲደ፣ “ክርሰቶስ ሀቃን የለታንዳሻ?” ያጊደ ኦቹዳ።

5-6 ኡንቱንቱ ዛሪደ፣ “ይሁዳ ጋድያን ቤተሌመ ካታማን የለታናዋ። ናቢ፣

“ይሁዳ ጋድያን ደእያ ቤተሌመ፣

ኔን ይሁዳ ጋድያን ደእያ ዋልቃማ ካታማቱዋጥ ላፋካ።

እስራኤልያ ሞድያዌ ኔጥ ከሳናዋ፣

ጊደ ጸፊዳ” ያጊድኖ።

7 ሄዋጥ ካላ፣ ሄሮድስ አዋይፊ ዶልያ ባጋጥ ዬዳ አሳቱዋ ጌማን ጸሲደ፣ ጸልንቲ ኡንቱንቶ ቤቴዳ ዋድያ ኡንቱንቱጥ ጌሺደ ኤሬዳ።

8 ያቲደ ቤተሌመ ኡንቱንታ የዲደ፣ “ቢደ ናኣ ሎይል ኮይተ፤ ኣ ደሜዳ ዋደ ታንካ ባደ እዉ ጎይናናዳን፣ ታናካ ኤርሰተ” ያጊድኖ።

9 ኡንቱንቱ ካቲ ጌዳዋ ሰሰ ቢደ ኦግያን አዋይፊ ዶልያ ባጋና ኡንቱንቱ ካሰ በኤዳ ጸልንትያ በኤድኖ፤ ናኣይ ደኢያሳ ጋኪደ ኤቃና ጋካናዉ፣ ጸልንቲ ኡንቱንታ ካለጮዳ።

1:25 ሉቃሳ 2:21 * 2:1 ጸልንትያ ፓይድያ አሳ ጉሳይ፣ ኤረቴዳ ማራ ብለላን ኤራንቻ አሳቱዋ ጉሳ። 2:5-6 ሚክ. 5:2

10 ኡንቱንቱ ሄ ጸልንትያ በኤዳ ዋደ፣ ዛዋይ ባይና ዳር ናሽቻ ናሽቲድኖ።

11 ጎለ ገሊደ፣ ናኦይ ባረ ዳይ ማይራምና ደእያዋ በኤድኖ፤ ጉልባቲደ ኦዉ ጎይኔድኖ፤ ሄዋፕ ካላ፣ ባረንቱ ሳጽንያ ዶዪደ፣ ዋርቃ፣ እጻናነ ካዋራ † ኦዉ እዋታ ሺሺድኖ።

12 ኡንቱንቱ ሄርድሳኮ ሰመና ማላ፣ ጸሳይ እኩሙዋን ኡንቱንታ፣ “ህንተና ኤርተ” ጊና ሀራ ኦግያና ባረንቱ ጋደ ሰሜድኖ።

ግብጾ በቱሳ

13 ኡንቱንቱ ቤዳዋፕ ጉይያን፣ ጎዳ ኪታንቻይ እኩሙዋን ዮሴፎ ቤቲደ፣ “ሄርድስ ናኦ ዋቆጠ ኮይያ ድራዉ፣ ደንዳደ ናኦነ ኦ ዳዮ አካደ ግብጾ ጋድያ በታ፤ ታን ነዉ ኦዳና ጋካናዉ፣ ያን ደእሻ” ያጌዳ።

14-15 ዮሴፎ ቃማ ደንዳደ፣ ናኦነ ኦ ዳዮ አካደ፣ ግብጾ ጋድያ ቤዳ፤ ጎዳይ ናብያ ባጋና፣ “ታን ታ ናኦ ግብጾ ጋድያፕ ጸሳድ” ያጌዳዌ ፖለታና ማላ፣ ሄርድስ ሀይቃና ጋካናዉ ኦ ያን ደኤዳ።

ሄርድስ ቄር ናና ዋቋሴዳ

16 ሄዋፕ ጉይያን፣ ሄርድስ አዋይፊ ዶልያ ባጋፕ ዬዳዋንቱ ባረና ጭሜዳዋ ኤራዳ ዋደ፣ ዳር ሀንቀቲደ፣ ጸልንቲ ካሰ ቤቲዳ ዋድያ ኡንቱንቱፕ ሰሴዳዋዳን፣ ዋታዳራቱዋ ዮዲደ፣ ቤተሌመንነ ዩሹዋን ደእያ ላኡ ላይላ አቱማ ናናነ ላኡ ላይላፕ ጋርሳና ደእያ አቱማ ናና ኡባ ዋቋሴዳ።

17-18 ናብያ ኤርማስ፣ “ዬኩነ ዘላሳይ ራማ ጌተትያ ካታማን ሰስቲዳ፤

ራሄላ ባረ ናናዉ ዩካዉ።

ኡንቱንቱ ሀይቁድጎ ድራዉ፣

አጋ ጊና፣ አገናን እጻዱ”

ጊደ ኦዴዳዌ ፖለቲዳ።

ግብጾፕ ሰማ

19 ሄርድስ ሀይቁዳዋፕ ጉይያን፣ ጎዳ ኪታንቻይ ግብጾን ዮሴፎ እኩሙዋን ቤቲደ

20 አ፣ “ደንዳ፤ ናኦነ ኦ ዳዮ አካደ፣ እሰራኤልያ ጋድያ ሰማ። ናኦ ዋቆጠ ኮይያዋንቱ ሀይቁ ድጌድኖ” ያጌዳ።

† 2:11 እጻናነ ካዋራ፡- እጻናይ፣ ማድያ ጁልያ ግዲደ፣ ታማን የግያ ዋደ ሳዋናሳ፤ ካዋራይካ ሳዋ ማድያ ጁልያ ግዲደ ሽቱዋዳን ማዴ። 2:14-15 ሆስ 11:1

2:17-18 ኤር. 31:15

21 የሴፎ ደንዲደ፣ ናኣነ ኦ ዳዮ አኪደ፣ እስራኤልያ ሰሜዳ።
 22 ሸን የሴፎ አርከላዎስ ባረ አወዋ ሄሮድሳ ኦይድያን ይሁዳ ጋድያን ካወቱዳዋ ሰሴዳ ዎደ፣ ያ ባናዉ ያዬዳ፤ ጸሳይ አዉ እኩሙዋን ህንተና ኤርተ ጊና፣ ጋለላ ጋድያ ቤዳ።
 23 ናባቱ፣ “አሳይ እ፣ ‘ናዝሬትያ አሳ’፤ ጊደ ጸሳና” ያጌዳዌ ፖለታና ማላ፣ ናዝሬተ ጌተትያ ካታማ ቢደ ደኤዳ።

3

ጸማቅያ የሃንሰ ቃላ ኦይዳ
 (ማር. 1:1-8፤ ሉቃሳ 3:1-18፤ ዮሃ. 1:19-28)

1-2 ሄ ዎደ ጸማቅያ የሃንሰ አሳ፣ “ሳሉዋ ካወተላይ ማታቴዳ ድራዉ፣ ህንተ ናጋራፕ ሰምተ” ያጊደ፣ ይሁዳ መላ ቢታን ኦይደ ዬዳ።

3 እያዉ ጎፕ፣ ናብያ ኢሰያስ፣ የሃንሳባ ኦይደ፣
 “እቱ መላ ቢታን ባረ ቃላ ጶቁ ኦሊደ፣
 ‘ሳዳ ኦግያ ጊግሰተ።

እ ሄመታና ሎሱዋካ
 አዉ ሰት ኦሐተ’ ጌዳ”
 ያጌዳ።

4 የሃንሳዉ ጋሉዋ እስክያ ዳደቴዳ ማዩ ደኤ፤ ቃይ ባረ ጸሳን ዳፉዋ ዳንጨዳ፤ እ ሞያ ቁማይካ ቦልያን ባዙዋ ኤሳ።

5 አሳይ ሄ ዎደ የሩሳላመፕ፣ ይሁዳ ጋድያ ኡባ ሳፕና ዮርዳኖሳ ሻፋ ሄራን ደእያ ጋድያ ኡባፕ አኮ ዪኖ።

6 ባረንቱ ናጋራ ፓጽና፣ ዮርዳኖሳ ሻፋን አሳ ጸማቄዳ።

7 ሸን የሃንሰ ዳር ፓርሳዋቱን * ሳዲቃዋናቱ † ጸማቀታናዉ ባረኮ ይያዋንታ በኢደ፣ “ሀ ሸሻቶ፣ ጸሳ ህንቁ ያና ህንያዋፕ አታና ማላ፣ ህንተዉ ኦኔ ኦይዳዌ?”

8 ሰም ህንተ፣ ህንተንቱ ናጋራፕ ሰሜዳዋ ኤርሰያ ኦሱዋ፣ ኦሐተ።

‡ 2:23 ሀዋ ጌዳዌ ኦነንቶ ኤረተና። 2:23 ማር. 1:24፤ ሉቃሳ 2:39፤ ዮሃ. 1:45 3:1-2 ማቶሳ 4:17፤ ማር. 1:15 3:3 አሳ. 40:3 3:4 1 ካታ. 1:8 * 3:7 ፓርሳዋቱዋ- ጉሳይ እይሁዳ አሳቱዋ ካለልያ አሳቱዋ ግደፕ ግዲደ ጌሻ ቃላን ካሰ ኤጫ ጫቁዋ ግደን ደእያ ቃላ ዎጋ ኡባን አማንያዋንታ። † 3:7 ሳዲቃዋናቱዋ- ጉሳይ እይሁዳ አሳቱዋ ካለልያ አሳቱዋ ግደፕ ግዲደ ጌሻ ቃላን ካሰ ኤጫ ጫቁዋ ግደን ደእያ ቃላ ዎጋፕ ሙሴ ጻፊዳ ኮይሮ እቹሹ ማጻፋቱዋ ግደን ደእያ ዎጋቱዋ ጻላን አማንያዋንታ።

9 ህንተ ህንተንቱ ዋዛናን፣ ሓብራሃመ ኑ አባ፣ ጊደ ቆጥያዎ ህንተዉ ማለቶ። አያዉ ሳጥ፣ ታን ህንተንቶ ኦዳይ፤ ጸሳይ ሀ ሹቻቱዋጥ አብራሃሞ ናና ኦሐ ደንሳናዉ ዳንዳዬ።

10 ቤጽ ሞላ ጸጹዋን ቃንጸናዉ ጊግ ኡቴዳ፤ ሎኦ አይፍያ አይፈና ሞላ ኡባይ ቃንጸቲደ፣ ታማን የገታና።

11 “ህንተ ህንተንቱ ናጋራጥ ሰምያዎ በሳናዉ፣ ታን ህንተና ሃላን ጸማቃይ፤ ሸን ታጥ ጉየና ይያዌ፣ ህንተንታ ጌሻ አያናንነ ታማን ጸማቃና። † እ ታጥ ዳሮ ሞኔ፤ አ ጫማ ቶካናዉካ ታን በሰያ አሳ ግድከ።

12 አ ኩሽያን ካላ ሰጽያ ላይዳይ ደኤ። ኡዱማን ደእያ ካላ ሎይሐ ጌሹ፤ ባረ ዛርጋ ድይያን ቆላና፤ ሸን ዳላ ቶኤና ታማን ጉዳና” ያጌዳ።

የሱስ ጸማቀቲዳ
(ማር. 1:9-11፤ ሉቃሳ 3:21-22)

13 የሱስ ሄ ዎደ ዮሃንሳን ጸማቀታናዉ፣ ጋሊላጥ ዮርዳናሳ ጌተትያ ሻፋ እኮ ቤዳ።

14 ሸን ዮሃንስ፣ “ታን ኔናን ጸማቀታናዉ በሰያ ዎደ፣ ኔን ታኮ ያይ?” ያጌደ፣ አ ድጋናዉ ኮዬዳ።

15 ሸን የሱስ ዛሪደ አ፣ “ኑን ጽሎተላ ኦሱዋ ኡባ ሀዋዳን ፖላናዉ በሰያ ድራዉ፣ ሀእ ታዉ ኤና ጋ” ያጌዳ። ዮሃንስካ አዉ ኤኖ ጌዳ።

16 የሱስ ጸማቀቶዋጥ ጉይያን፣ ኤለካ ሃላጥ ከሴዳ፤ ሳሉ ደየትና፣ ጸሳ አያናይ ሀራጽያዳን ሳሉዋጥ ዎጲደ ባረ ቦላ ይያ ዎደ በኤዳ፤

17 ቃይ ሳሉዋጥ፣ “ታን ሲቅያ፣ ታና ናሽቶያ፣ ታ ናአይ ሀዋ” ያግያ ቃላይ ዬዳ።

4

የሱስ ፓጨቲዳ
(ማር. 1:12-13፤ ሉቃሳ 4:1-13)

1 ሄዋጥ ጉይያን፣ ጸላህያን ፓጨታና ማላ፣ ጌሻ አያናይ አሳይ ደኤና ሳኦ የሱሳ አፊዳ።

† 3:11 ጌሻ አያናንነ ታማን ጸማቃና፣ ጉሳይ የሱስ ዪደ አሳ ጋርሳ አያና አሳተላ ላምያዎ ታማርሰያዎ። 3:17 ደመላ 22:2፤ ማዝ. 2:7፤ ኢሳ. 42:1፤ ማቶሳ 12:18፤ 17:5፤ ማር. 1:11፤ ሉቃሳ 9:35

2 የሱስ ኦይታሙ ጋላሳን ኦይታሙ ቃማ ጸዋዋጥ ጉይያን ኮሻቲዳ።

3 ጸላሂ ዪደ አ፣ “ኔን ጸሳ ናኣ ግደፕ፣ አነ ሀ ሹቻቱዋ ኡክላ ግዳና ማላ ጋ” ያጌዳ።

4 ሸን የሱስ ዛሪደ፣ “ጸሳ ማጻፋን፣ ኣሳይ ጸሳይ ሃሳይያ ቃላ ኡባን ደእናፕ አትን፣ ኡክላ ጸላላን ደኤና’ ያገት ጸፈቲዳ” ያጌዳ።

5 ሄዋፕ ጉይያን፣ ጸላሂ የሱሳ ጌሻ ካታማ አፍ ጌሻ ጎልያ ጼራን ኤሲደ።

6 “ኔን ጸሳ ናኣ ግደፕ፣ አነ ዱገ ኩንዳ። አያዉ ጎፕ፣ ጸሳ ማጻፋን፣

“ ጸሳይ ባረ ኪታንቻቱዋ

ነዉ አዛዛናዋ’

ቃይ ኣኢንቲንቲ ነ ገዲ ሹቻን ቋበተና ማላ፣

ባረንቲ ኩሽያን ኔና ደንላናዋንታ’

ያገት ጸፈቲዳ” ያጌዳ።

7 የሱስ ዛሪደ አ፣ “ቃይካ ጸሳ ማጻፋን፣ ጎዳ ነ ጸሳ ፓጮፓ’ ያገት ጸፈቲዳ” ያጌዳ።

8 ቃይ ጸላሂ የሱሳ እት ዳሮ ዋልቃማ ደርያ ጼራ ከሲደ፣ ሀ አላምያን ደእያ ካዉተላ ኡባነ ኡንቲንቲ ቦንቹዋ

9 በሲደ አ፣ “ኔን ታዉ ጉልባታደ ጎይናፕ፣ ታን ሀዋ ኡባ ነዉ እማና” ያጌዳ።

10 ሄ ዋደ የሱስ ዛሪደ አ፣ “ላ ሀ ሴጻናዉ ሃካ፤ አያዉ ጎፕ፣ ጸሳ ማጻፋን፣ ጎዳዉ፣ ነ ጸሳዉ ጎይና፤ አ ጸላላ ጎሽታ’ ጌተት ጸፈቲዳ” ያጌዳ።

11 ሄዋፕ ጉይያን፣ ጸላሂ የሱሳ አግና፣ ኪታንቻቱ ዪደ፣ አዉ አሌድኖ።

የሱስ ባረ ታማርስያ ኦሱዋ ጋሊላን ደሜዳ

(ማር. 1:14-15፤ ሉቃሳ 4:14-15)

12 ዮሃንስ ቃሽቲዳዋ የሱስ ሰሴዳ ዋደ፣ ጋሊላ ጌተትያ ጋድያ ቤዳ።

13 ናዘሬተፕ ከሲደ፣ ቅፍርናሆማ ካታማ ቢደ፣ ያን ደኤዳ፤ ቅፍርናሆም ዛብሎናንን ንፍታሌመ ጋድያን ደእያ ጋሊላ አባ ማታን ደኤ።

14 ሀዌ ሀኔዳዌ ናብያ ኢሰያስ፣

15 “ዘብሎን ጋድያንነ ንፍታሌመ ጋድያን፤
አባ ኦግያን ዮርዳኖስ ሻፋፕ ሄፍንሳ ባጋን፤
አይሁዳ ግደና አሳይ ደእያ ጋሊላን፤

16 ጴጥን ደእያ አሳይ፤
ዎልቃማ ፖኡዋ በኤዳ።
ቃይ ሀይቁዋ ኩዋይ ደእያ ጋድያን ኡቴዳዋንቶ
ፖኡ ከሴዳ”
ያጌዳዌ ፖለታና ማላሳ።

17 ሄ ዎድያፕ ዶሚደ የሱስ፤
“ሀንተ ናጋራ ፓጽተ፤ እያዉ ጎፕ፤
ሳሉዋ ካዉተላይ ማታቴዳ ድራሳ”
ጊደ ቃላ ኦዲዋ ዶሜዳ።

የሱስ ባረና ካልያ ኦይዳቱዋ ጸጌዳ
(ማር. 1:16-20፤ ሉቃሳ 5:1-11)

18 የሱስ ጋሊላ አባ ማታና አዲድ፤ ላኡ እሻቱ ጳጵሮሳ ጌተትያ ሰሞንነ እ እሻ እንድራስ፤ ሞልያ ኦይቂያዋንታ ግዶ ድራዉ፤ ዳባ
* አባን የግያዋንታ በኤዳ።

19 ኡንቱንታ፤ “ታና ካልተ፤ ታን ሀንተና ሞልያ ኦይቂያዋዳን አሳ ታኮ እሀያ ኦግያ ታማርሳና” ያጌዳ።

20 ኡንቱንቱ ኤለካ ባረንቱ ዳባ አጊደ፤ የሱሳ ካሌድኖ።

21 የሱስ ሄዋፕ ሰንሳኮ ቢደ፤ ሀራ ላኡ እሻቱዋ፤ ዘብድዮሳ ናና ያቆባነ እ እሻ ዮሃንሳ በኤዳ፤ ኡንቱንቱ ባረንቱ አዉዋ ዘብድዮሳና ሃላ ቦላን ብያ ዋንግርያ ግዶን ባረንቱ ዳባ ጊግሰያዋንታ በኢደ፤ ጴሴዳ።

22 ኡንቱንቱ ኤለካ ሃላን ብያ ዋንግርያን ባረንቱ አዉዋ አጊደ፤ የሱሳ ካሌድኖ።

የሱስ ጮራ አሳ ታማርሴዳነ ፓሌዳ
(ሉቃሳ 6:17-19)

23 የሱስ አይሁዳ ዋሳ ጎለቱዋን ታማርሲደ፤ ካዉተላ ሞሽራቹዋ ቃላ ኦዲድነ ቃይ ሀርግያ ኡባፕነ ሳኩዋ ኡባፕ አሳ ፓሌዳ፤ ጋሊላ ጋድያ ኡባን ዩዬዳ።

24 እ ዋሪ ሶርያ ጋድያ ኡባ ጋኬዳ፤ ዲማ ዲማ ሀርግያን ኦይቀቲደ ሀርጌዳ አሳ ኡባ፤ ጸላሀቱዋን ኦይቀቴዳዋንታ፤ ዪጩዋ

4:16 እሳ. 9:1-2 * 4:18 ዳባ- ሀዋ ጉሳይ ሞልያ ጸራናዉ ዎይ ኦይቃናዉ ሃላን የግያ አማራጭ ማራብያ ግያዋ።

ሳኩ ደእያዋንታ፥ ቃይ ጉንዴዳዋንታ አሳይ የሱሳኩ አሄዳ፤ እ ኡንቱንታ ፓሌዳ።

25 ጮራ አሳይ ጋለላፕ፥ ታሙ ካታማቱዋፕ፥ የሩሳላመፕ፥ ይሁዳፕን የርዳኖሳፕ ሄፍንፋን ደእያ ጋድያፕ የሱሳ ካሌድኖ።

5

የሱስ ደርያ ቦላን ግዲደ ታማርሴዳ ትምርትያ
(5:1—7:29)

1 የሱስ ጮራ አሳ በኢደ፥ ፑደ ደርያ ከሲደ ኡቴዳ። አ ካልያዋንቱ አኮ ሺቄድኖ።

2 ኡንቱንታ ሀዋዳን ያግ ታማርሱዋ ደሜዳ።

ቱሙ እንጂዋ አክያ አሳቱዋ
(ሉቃሳ 6:20-23)

3 “ባረንቱ እያና ደኡዋን፥
ሀዩሳ ግዴዳዋ ኤርያዋንቱ እንጀቴዳዋንታ፤
እያዉ ሳፕ፥ ሳሉዋ ካዉተላይ ኡንቱንቱሳ።

4 ካዮትያዋንቱ እንጀቴዳዋንታ፤
እያዉ ሳፕ፥ ጸሳይ ኡንቱንታ ምንሳና።

5 አሽከ ግዴዳዋንቱ እንጀቴዳዋንታ፤
እያዉ ሳፕ፥
ኡንቱንቱ ሳኣ ላታና።

6 ጽሎተላ ኮሻትያዋንቱን ሳመትያዋንቱ፥ *
እንጀቴዳዋንታ፤
እያዉ ሳፕ፥ ጸሳይ ኡንቱንታ ካልሳና።

7 ማርያዋንቱ እንጀቴዳዋንታ፤
እያዉ ሳፕ፥
ጸሳይ ኡንቱንታ ማራና።

8 ዋዛና ጌሻቱ እንጀቴዳዋንታ፤
እያዉ ሳፕ፥
ኡንቱንቱ ጸሳ በእና።

9 አሳ ሰገሐያዋንቱ እንጀቴዳዋንታ፤
እያዉ ሳፕ፥ ጸሳይ ኡንቱንታ፥
ባረ ናና ጊደ ጼሳና።

10 ጽሎተላ ድራዉ፥

5:4 እሳ. 61:2 5:5 ማዘ. 37:11 * 5:6 ሀዋ ብለላይ ጸሳዉ ኤኖ ግያዋንታ ዋይ ሎኣባ ዋይ ቱሞባ ኦሐያዋንታ ጉሳ።

የደርሰትያዋንቱ እንጀቴዳዋንታ፤

እያው ጎጥ፡ ሳሉዋ ካውተላይ ኡንቱንቱሳ። †

11 “ህንተ ታና ካልያ ድራው፡ እሳይ ህንተና ቦርያ ዋደነ ዋይሰያ ዋደ፡ ቃይ ህንተ ቦላ ኢታባ ኡባ ዋርዲዋን ሃሳይያ ዋደ፡ ህንተ እንጀቴዳዋንታ።

12 ህንተው ሳሉዋን ዋልቃማ ዋይታይ ደእያ ድራው፡ ናሽትተ፤ ሀሹ ጊተ፤ እያው ጎጥ፡ እሳይ ህንተጥ ካሰ ደኤዳ ናባቱዋ ሄዋዳን የደርሴድኖ።

ማጽንያነ ፖኡዋ ሌምሱዋ

(ማር. 9:50፤ ሉቃሳ 14:34-35)

13 “እሳ ኡባው ህንተ ማጽነ ማላ፤ ሽን ማጽኒ ማልእና ቆዮጥ፡ ዛሪደ እ ዋት ማልኤላኔ? ካረ ኮልና፡ እሳይ እ የጅ ሀመታናጥ እትን፡ ሰንላው እይነ ማደና።

14 “ሀ አላመው ህንተ ፖኡ፤ ደርያ ሁጲያን ኬጸቲዳ ካታማይ ጌማና ዳንዳየና።

15 ጸምፕያ ጸምፕደ፡ ሶይን ደእያ እሳ ኡባው ፖኡና ማላ፡ ቶቂያ ሳን ዋሌጥ እትን፡ ካምያ ሚሻ ግደን ቁምእ ዋልያ እሳይ ኡንነ ባዋ።

16 ሄዋዳንካ፡ እሳይ ህንተ ኦልያ ሎኦ ኦሱዋ በኢደ፡ ሳሉዋን ደእያ ህንተ አውዋ ቦንቻና ማላ፡ ህንተ ፖኡ እሳ ሰንላን ፖኡ።

ሙሴ ህግያባ

17 “ታን ሙሴ ህግያነ ናባቱ ታማርሰያዋ † ቆይሳናው ዬዳዋ ህንተው ማላቶፖ፤ ታን ፖላናው ዬዳዋጥ እትን፡ ቆይሳናው ያበይከ።

18 እያው ጎጥ፡ ታን ህንተው ቱሙዋ ኦዳይ፤ ሳሉነ ሳእይ እቆና ጋካናው፡ ቃይ ኡባባይካ ፖለታና ጋካናው፡ § ህግያጥ እት ጫቻይካ ዋይ ቁር ፕደሊካ እ□ና።

19 ሄዋ ድራው፡ ሀ እዛዙዋ ኡባጥ ጉጽያ እት እዛዙዋ መንልያ ኡራይ ኡንነ፡ ቃይ ሀራቱካ ባረዋዳን ሀናናዳን ታማርሰያ ኡራይ ኡንነ፡ ሳሉዋ ካውተላን ኡባጥ ጉላ ግዳና፤ ሽን እዛዙዋ ኦልያዌነ ሀራንቱካ ኦላናዳን ታማርሰያዌ ኡንነ ሳሉዋ ካውተላን ቶቃ ግዳና።

† 5:10 ሳሉዋ ካውተላይ ኡንቱንቱሳ፡- ጉሳይ ሄ እሳቱ ሳሉዋ ካውተላ ላታናው ዳንዳይያዋንታ ግድያዋ በሴ። † 5:17 ሙሴ ህግያነ ናባቱ ታማርሰያዋ፡- ጉሳይ እይሁድያ ጌሻ ማጸፋ፤ ሄዋኔካ ኤጫ ጫቁዋ። § 5:18 ኡባባይካ ፖለታና ጋካናው፡- ጉሳይ ቃላይ ታማርሰያ ኡባይ ቱማተላን ቆንጫና ጋካናው።

20 አያው ጎተ፡ ህንተ ጽሎተላይ ሙሴ ህግያ ታማርሰያዋንቱ ጽሎተላተን ፓርሳዋቱዋ ጽሎተላተ ዳራና ጳዮተ፡ ሳሉዋ ካውተላ ህንተ ሙላ ገለናዋ ታን ኦዳይ።

21 “በን አሳው፡ ላሳ ዋዲ፤ አሳ ዋዲ ኦን ፕርደታና ጌዳዋ ሰሴድታ።

22 ሸን ታን ህንተው ኦዳይ፤ ባረ እሻ ህንቀትያ ኡባይ ፕርደታና፤ ባረ እሻ ቦርያ ኡባይ ሻንጉዋ ፕርደው ሺቃና፤ ቃይ ባረ እሻ፡ ላሉዋ። ግያ ኡባይ ጋናምያ ታማ ፕርደው ሺቃና።

23 ሄዋ ድራው፡ ኔን ያርሸያሳን ያርሸሸን፡ ነ እሻ ሩቁዳባይ ነው ሄዋን ሀሳየቶተ፡

24 ነ ያርሹዋ ሄዋን አጋደ ባ፤ ካሰታደ ነ እሻና ሰገታ ድጋ፤ ሄዋጥ ካላ ያደ፡ ነ ያርሹዋ ያርሻ።

25 “ኔና ሞትያዋና ዋዲ ደእሸን ኤላ አናና ሰገታ ድጋ፤ ሄዋ ጳዮተ፡ እ ኔና ዳና ሰንላ አላና፤ ቃይ ዳናይ ኔና ፖልሰው አላ እምና፡ ፖልሲ ኔና ቃሾ ጎለን የጋና።

26 ታን ነው ቱሙዋ ኦዳይ፤ ኔን እት ሳንትሚ አተናን፡ ነ ማጋጨዋ ወርሳደ ጭጋና ጋካናው፡ ሙላካ ቃሾ ጎለጥ ከሳካ።

ዋሹማባው እመቶ ትምርትያ

27 “ ዋሹሞፓ ጌዳዋ ሰሴድታ።

28 ሸን ታን ህንተው ያጋይ፤ ማጫወኖ ጸሊደ አሞትያ ኡባይ፡ ባረ ዋዛና ግድን ሄ ዋደ አናና ዋሹሜዳ።

29 ነ ኡሸቻ አይፊ ኔና ናጋራ ኦሰሶተ፡ ኔጥ ዋጫደ ኦላ አጋ፤ አያው ጎተ፡ ነ ቦላይ ሙላካ ጋናምያ ታማን ኦለትያዋጥ፡ አጥ እቱ ፓጭንቶ ነው ሎአ።

30 ቃይ ነ ኡሸቻ ኩሺ ኔና ናጋራ ኦሰሶተ፡ ኔጥ ቃንጸደ ኦላ አጋ፤ አያው ጎተ፡ ነ ቦላይ ሙላካ ጋናምያ ታማን ኦለትያዋጥ፡ አጥ እቱ ፓጭንቶ ነው ሎአ።

ማቶያ የደናዳን እመቶ ትምርትያ

(ማቶሳ 19:9፤ ማር. 10:11-12፤ ሉቃሳ 16:18)

31 “ ቃይ ባረ ማቻቶ የድያ ኦን እዞ የድያ ፓራማ እሞ፡ ጌተቱዳ።

5:21 ከሳ 20:13፤ ዛረ. 5:17 5:27 ከሳ 20:14፤ ዛረ. 5:18 5:29 ማቶሳ 18:9፤ ማር. 9:47 5:31 ዛረ. 24:1-4፤ ማቶሳ 19:7፤ ማር. 10:4

32 ሽን ታን ህንተዉ ያጋይ፤ ሳረ ማቻታ ዋሹመናን ደእሽን የድያ ኦንነ እዞ ዋሹማ ከሴ፤ ቃይ እሰናይ የዴዳ ሞሽራቶ እክያዌ ኦንነ ዋሹሜ።።

ጫቀናዳን እመቶ ትምርትያ

33 “ቃይ በን አሳዉ፣ ሞርዲዋን ጫቆፓ፤ ሽን ነ ጎዳዉ ጫቆዳዋ ፖላ፣ ጌዳዋ ሰሴድታ።።

34 ሽን ታን ህንተዉ ያጋይ፤ ሓባካ ጫቆፕተ፤ ሳሉ ጸሳ ካዉተላ ኦይድያ ግድያ ድራዉ፣ ሳሉዋን ጫቆፕተ።

35 ቃይ ሳኦይ ኦ ገዲ የድያ ሳ ግድያ ድራዉ፣ ሳኦን ጫቆፕተ፤ ቃይካ፣ የሩሳላመ ዋልቃማ ካትያ ካታማ ግድያ ድራዉ፣ የሩሳላመንካ ጫቆፕተ።

36 ኔን እት ብናናካ ቦላ ዋይ ካረላ ከሳናዉ ዳንዳየና ድራዉ፣ ሳ ሁጲያንካ ጫቆፓ።።

37 ሽን ህንተ፣ ሓ፣ ዋይ፣ ግድና፣ ጌተ፤ ሀዋንቱፕ ሀራይ ሴጻናፕ ዬ።።

**ኢታ ኢታን ዛረናዳን እመቶ ትምርትያ
(ሉቃሳ 6:29-30)**

38 “ ሓይፍያ ድራዉ አይፍያ፤ አቻ ድራዉ አቻ፣ ጌዳዋ ሰሴድታ።።

39 ሽን ታን ህንተዉ ያጋይ፤ ህንተዉ ኢታባ ኦላያ ኡራዉ ኢታን ዛርፕተ፤ ኦንነ ነ ኡሽቻ ባጋ ሻይያ ባቆፕ፣ ነ ሀድርሳ ባጋ ሻይያካ ኦ በሳ፤

40 ነ ሻምጭያ አካናዉ እት ኡራይ ኔና ሞቶፕ፣ ሄ ኡራዉ ነ ኮትያካ ጉጃ እማ።።

41 ኦንነ ኔና እት ሳትያ ኦግያ ባረናና ባናዳን ዋልቃንሉፕ፣ አናና ላኡ ሳትያ ኦግያ ባ።።

42 ኔና ዋሰያ ኡራዉ እማ፤ ቃይ ኔፕ ታልኦና ኮይያ ኡራዉካ ድሳፓ።።

**ሞርክያ ሲቃና ማላ እመቶ ትምርትያ
(ሉቃሳ 6:27-36)**

5:32 ማቶሳ 19:9፤ ማር. 10:11-12፤ ሉቃሳ 16:18፤ 1 ቆር. 7:10-11
5:33 ዋጋ 19:12፤ ፓይ. 30:2፤ ዛረ. 23:21 5:35 ኢሳ. 66:1፤ ማዝ. 48:2 5:38 ከሳ 21:24፤ ዋጋ 24:20፤ ዛረ. 19:21

43 “ ሳ ላገላቱዋ ሲቃ፤ ነ ሞርክያ ሞርካ፣ ጌዳዋ ሰሴድታ።

44-45 ሸን ታን ህንተዉ ያጋይ፤ ሳሉዋን ደእያ ህንተ አዋ ናና ግዳና ማላ፡ ህንተ ሞርከቱዋ ሲቅተ፤ ህንተና ሸቂያዋንታ እንጅተ፤ ህንተና እጽያዋንቶ ሎኦባ ኦሐተ፤ ህንተና የደርሰያዋንቶ፡ ጸሳ ዋሰተ፤ እያዉ ሳፕ፡ ኢታ አሳዉካ ሎኦ አሳዉካ ጸሳይ ባረ አዋ አዋጽሴ፤ ቃይ ጽላቶካ ናጋራንቻቶካ ባረ እራ ቡክሴ።

46 ህንተ ህንተና ሲቅያዋንቱ ጸላላ ሲቆፕ፡ ህንተዉ አይ ዋይታይ ደኢ? ሀራይ አቶ፡ ናጋራንቻቱካ ሄዋዳን ኦሊኖ።

47 ህንተ ህንተንቱ እሻቱዋ ጸላላ ሳርቶፕ፡ ሀራቱ ኦሐያዋፕ አጵያባ እያ ኦሴድቱ? ሀራይ አቶ፡ አይሁደ ግደና አሳይካ ሄዋዳን ኦሴ።

48 ሄዋ ድራዉ፡ ሳሉዋን ደእያ ህንተ አዉ ፖሎ ግደዋዳን፡ ህንተካ ፖሎ ግድተ።

6

ህዬሳዉ እምያ ማራ ታማርሱዋ

1 “ህንተ ሎኦ ኦሱዋ አሳ በሳናዉ አሳ ሰንላን ኦፍ ማላ ናገትተ፤ ሄዌ ጳዮፕ፡ ሳሉዋን ደእያ ህንተ አዉ ህንተዉ ጋትያ እመና።

2 “ሄዋ ድራዉ፡ ህንተ አዉደነ ህዬሳዉ እምያ ዋደ፡ ሎኦ ማላትያ ኢታቱ ባረንታ ቦንቶሳናዉ፡ አይሁዳ ዋሳ ጎለንነ ኦግያን ሀራን በኤታናዉ ኦሐያዋዳን ኦሶፕተ፤ ታን ህንተዉ ቱሙዋ ኦዳይ፤ ኤንቱንቱ ባረንቱ ጋትያ አክ ድጌድኖ።

3-4 ሸን ኔን ህዬሳዉ እምያ ዋደ፡ ጌማን እማናዳን፡ ነ ኡሸቻ ኩሺ ኦሐያዋ ሀድርሳ ኩሺ ኤርፖ። * ጌማን ኦሴዳዋ በእያ ነ አቡ፡ ነ ሎኦ ኦሱዋ ጋትያ ዛራናዋ።

ዋሳባ (ሉቃሳ 11:2-4)

5 “ጸሳ ዋሲደ፡ ሎኦ ማላትያ ኢታቱዋዳን ሀኖፕተ፤ እያዉ ሳፕ፡ ባረንታ እሳይ በእና ማላ፡ አይሁዳ ዋሳ ጎለንነ ኦግያ ደናን ኤቂደ፡ ጸሳ ዋሰያዋ ደሲኖ፤ ታን ህንተዉ ቱሙዋ ኦዳይ፤ ኤንቱንቱ ባረንቱ ጋትያ ኡባካ አኬድኖ።

5:43 ከሳ 19:18 5:48 ከሳ 19:2፤ ዛረ. 18:13 * 6:3-4 ኡሸቻ ኩሺ ኦሴዳዋ ሀድርሳ ኩሺካ ኤርፖ፡ ጉሳይ ጸሳፕ አትን፡ ኦንነ ኤርፖ ጉሳ።

6 ሸን ኔን ጸሳ ዋሰያ ዋደ፣ ነ ጎለ ገላ፤ እፍላ ቃቻደ፣ ቤተና ነ ኦወዋ ዋሳ፤ ጌማን ኦሰቶዋ በእያ ነ ኦቡ ነወ እማናዋ።

7 “ጸሳ ህንተ ዋሰያ ዋደ፣ ጸሳ አማነና አሳዳን፣ ጮ መላ ዛረሉዋ ዳርሶፕተ፤ ኡንቱንቱ ሃሳያ ዳሩዋን ሰሰቱ ጊደ ቆፒኖ።

8 ሄዋ ድራወ፣ ሄ አሳዳን ሀኖፕተ፤ አያወ ጎፕ፣ ህንተ አቡ ህንተና ኮሸያዋ ህንተንቱ ዋሳናፕ ካሰቲደ ኤሬ።

9 “ሰም ህንተንቱ ሀዋ ማላ ዋሳ ዋሰተ፤

“ ሳሉዋን ደእያ ኑ አቦ፣
ነ ጌሻ ሱንላይ አንጀቶ።

10 ነ ካወተላይ ዮ፤
ነ ሸኒ ሳሉዋን ሀኔዳዋዳን፣
ሳንካ ሀኖ።

11 ጋላሳን ጋላሳን ኮሸያ ቁማ
ኑወ ሀቼ እማ።

12 ኑን ኑና ናቆዋንቶ
አቶ ያግያዋዳን፣
ኔንካ ኑ ናቁዋ አቶ ጋ።

13 ኑና ኢታባፕ አሻፕ አትን፣
ፓጭያን ገልሶፓ።

ካወተላይ፣ ዋልቃይነ ቦንቹ
መድናወካ ኔሳ።
አመንአ።”

14 “ህንተንቱ ህንተና ናቁዳ ሀራ አሳ ናቁዋ አቶ ጎፕ፣ ሳሉዋን ደእያ ህንተንቱ አወካ ህንተወ አቶ ጋና።

15 “ሸን ህንተንቱ ህንተና ናቁዳ ሀራ አሳ ናቁዋ አቶ ጋና ጳዮፕ፣ ህንተንቱ አወካ ህንተ ናቁዋ አቶ ጌና።

ጸማባ

16 “ቃይ ህንተንቱ ጸምያ ዋደ፣ ሎአ ማላትያ ኢታቱዋዳን፣ ካዮትያዋ ማላቶፕተ፤ አያወ ጎፕ፣ ኡንቱንቱ ጸምያዋ አሳይ በአና ማላ፣ ባረንቱ ሶምእያ ቡላልሲኖ፤ ታን ህንተንቶ ቱሙዋ ኦዳይ፤ ኡንቱንቱ ባረንቱ ጋትያ አኬድኖ።

17-18 “ሸን ህንተንቱ ጸምያ ዋደ፣ ህንተንቱ አቡ ህንተ ጸምያዋ ኤርፕ አትን፣ አሳይ ኤረና ማላ፣ ህንተ ሶምእያ ሜጨትተ፤ ህንተ ሁጲያካ ኑከትተ፤ ያቶፕ፣ ቤተና ህንተ አወ ህንተንቱ ኦልያዋ ጌማን በኢደ፣ ህንተ ጋትያ እማናዋ።

ሳሉዋን ደእያ ሚሻባ
(ሉቃሳ 12:33-34)

19 “ሚሻ ብልክይ ምያሳንነ ብራታይ ሸኢደ ባይዘያሳን፡ ካይሱካ ቦኪደ ወኢያሳን፡ ሀ ሳኣን ሀንተንቱ ሁጺያወ ዳጋዮፕተ።

20 ሸን ብልክይ ሜናሳንነ ሸኤና ሳን፡ ካይሱካ ቦኪደ ወኤና ሳን ሀንተንቱ ሁጺያወ ሳሉዋን ሚሻ ዳጋይተ።

21 እያወ ሳፕ፡ ነ ዎዛናይ ነ ሚሻይ ደእያ ሳን ደኣና።

ቦላ ፖኡዋባ
(ሉቃሳ 11:34-36)

22 “ቦላ ፖኡ አይፍያ፤ ሄዎ ድራወ፡ ነ አይፊ ፓጻ ግዶፕ፡ ነ ቦላ ኡባይ ፖኡ ግዳና።

23 ሸን ነ አይፊ ፓጻ ግዳና ቆዮፕ፡ ነ ቦላ ኡባይ ቆማና፤ ሰም ኔናን ደእያ ፖኡ ቆሞፕ፡ ቆማይ አይ ኬና ዳራኔ!

ደኦ ሀርጋናወ በሰና
(ሉቃሳ 16:13፤ 12:22-31)

24 “ላኡ ጎዳቶ ሞደታናወ ዳንዳይያዌ ኦንነ ባዋ፤ እያወ ሳፕ፡ እቱዋ እጺደ፡ የኩዋ ሰቄ፤ ዎይ እቱዋ ቦንቹደ፡ የኩዋ ካጴ፤ እት አሳይ ጸሳወን ሻሎ ሞደታናወ ዳንዳየና።

25 “ሄዎ ድራወ፡ ታን ሀንተንቶ ኦዳይ፤ ሀንተ ደኦ ማናባወን ኡሻናባወ፡ ዎይ ሀንተ ቦላወ ማያናባወ ሀርጎፕተ፤ ሸምፑ ቁማፕ አ፳ኔ? ቃይ ቦላይ ማዩዋፕ አ፳ኔ?

26 ፓልያ ካፋቱዋ ጸልተ፤ ኡንቱንቱ ዘርክኖ፤ ጫክክኖ፤ ድይያንካ ቆልክኖ፤ ሸን ሳሉዋን ደእያ ሀንተንቱ አወ ኡንቱንታ ምዜ፤ ሀንተንቱ ኡንቱንቱፕ ሎይል ዳርክቱ?

27 ሀንተንቱ ግዶን ዳርሰ ሀርጊደ፡ ባረ ጌሳ ቦላ እት ዋቆ ፑጃናወ ዳንዳይያዌ ኦኔ?

28 “እያወ ማዮ ሀርጊቱ? ደምባን ደእያ ጨሻቱ ዎት ድጨኖንቶ፡ አኬክ ጸልተ፤ ኡንቱንቱ ዳቡርክኖ ዎይ ፑቱዋ ሱቁክኖ።

29 ሸን ታን ሀንተንቶ ኦዳይ፤ ሀራይ አቶ፡ ሶሎሞን ሄዎ ኬና ቦንቹቱዳዎ ግዲደ፡ ሄ ጨሻቱዋፕ እቱዋ ማላካ ማይቤና።

6:19 ኢያሳ 5:2-3 6:28 1 ካታ. 10:4-7፤ 2 ኦዲዋ 9:3-6

30 ሽን ላፋ አማኑ ደእያዋንቶ፣ ጸሳይ፣ ሀቼ ደኢደ፣ ዋንት ታማን ኤጽያ ደምባ ማታ ማይዝያዌ፣ ህንተና ኡንቱዋፕ አሉደ ዋት ማይዘኔ?

31 ሰም፣ ሓን አያ ማኔ? ዋይ አያ ኡሻኔ? ዋይ አያ ማያኔ? ያጊደ ህርጎፕተ።

32 አያው ጎፕ፣ ሄ ኡባባ ጸሳ አማነናዋንቱ ዳርሲደ ኮዪኖ፤ ሄ ኡባይ ህንተና ኮሽያዋ ሳሉዋን ደእያ ህንተንቱ አው ኤሬ።

33 ሽን ካሰቲደ፣ ጸሳ ካውተላነ አ ጽሎተላ ኮይተ፤ እ ህንተንቶ ሄ ኡባባ አማና።

34 ሄዋ ድራው፣ ዋንትባው ህርጎፕተ፤ አያው ጎፕ፣ ዋንት ጋላሳይ ባረው ህርጋና፤ ጋላሳ ኡባውካ እ ሁጳው ግድያ ዋዪ ደኤ።

7

ሀራ አሳ ቦላ ፕርዳናው ኮሸና (ሉቃሳ 6:37-42)

1 “ጸሳይ ህንተንቱ ቦላ ፕርደና ማላ፣ ህንተካ ሀራቱዋ ቦላ ፕርደፕተ።

2 አያው ጎፕ፣ ህንተንቱ ሀራቱዋ ቦላ ፕርድያዋዳን፣ ጸሳይ ህንተንቱ ቦላ ፕርዳና፤ ቃይ ህንተንቱ ሀራቶ አማናው ማክያባን እ ህንተው ማካና።

3 ነ አይፍያን ደእያ ቱሳ በአካ፤ ሽን ነ አሻ አይፍያን ደእያ ሱላ አያው ጸላይ?

4 ዋይ ነ አይፍያን ቱሳይ ደእሸን፣ ኔን ነ አሻ፣ ጎታን ነ አይፍያፕ ሱላ ከሶ ዋናደ ጋናው ዳንዳያይ?

5 ላ ሀ ሎኡዋ ማላትያ ኢታው! ካሰታደ ነ አይፍያፕ ቱሳ ከሳ ድጋ፤ ሄዋፕ ጉይያን፣ ነ አሻ አይፍያፕ ሱላ ከሳናው ጌሻደ ጸላናው ዳንዳያ።

6 “ጌሻባ ካናቶ እምፕተ፤ ኡንቱንቱ ጉያ ሰሚደ፣ ህንተና ሳአና። ቃይ እንቁዋ ጌተትያ ህንተንቱ አልኦ ሹቻ ጉዲንላቱዋ ሰንላን አሎፕተ፤ ኡንቱንቱ ባረንቱ ገድያን የቆና።

ዋሰተ፣ ኮይተ፣ ካርያኮ ዪደ ጸሰተ (ሉቃሳ 11:9-13)

7 “ዋሰተ፤ ህንተ አካና። ኮይተ፤ ህንተ ደማና። ካርያኮ ዪደ ጸሰተ፤ ህንተው ፕንጊ ደየታና።

8 አያው ጎፕ፣ ዋሰያ ኡባይ አካና፤ ኮይያ ኡራይ ደማና፤ ቃይ ካርያኮ ዪደ ጸሰያ ኡራው ፕንጊ ደየታና።

9 ዋይ ህንተንቱ ግደን ባረ ናኢይ፡ ሉክሳ እማ፡ ጎጥ፡ ሹቻ እምያ ኣዉ ደኢ?

10 ቃይ፡ ሞልያ እማ፡ ጎጥ፡ ኣዉ ሸሻ እማናዌ?

11 ህንተንቱ ኢታ ግዲደ፡ ህንተንቱ ናናቶ ሎኦባ እምያዋ ኤርፕ፡ ያትና፡ ሳሉዋን ደእያ ህንተንቱ ኣዉ ባረና ዎሰያዋንቶ ሎኦባ ዎት ዲርሰ እመኔ!

12 ሓዋ ድራዉ፡ ሀራ ኣሳይ ህንተዉ ኦላናዉ ኮይያ ኡባባ ህንተካ ኣሳዉ ኦላተ፤ ኣያዉ ጎጥ፡ ሙሴ ህግያ ብለሳይን ናባቱ ታማርሰያዌ ሀዋ።

ኡንኣ ፐንግያባ
(ሉቃሳ 13:24)

13 ሓኡንኣ ፐንግያና ገልተ። ኣያዉ ጎጥ፡ ባየላዉ ኣፍያ ፐንጊ ኣኩዋ፤ ኦጊካ ዎጋ። ሄዋና ገልያ ኣሳይካ ጮራ።

14 ሸን፡ ደኦ ኣፍያ ፐንጊ ኡንኣ፤ ኦጊካ ዱንላ። ቃይ ሄዋ ደምያዋንቱካ ጉላ።

ምላይ ባረ ኣይፍያን ኤሪቲ
(ሉቃሳ 6:43-44)

15 ሰላ ባጋና ዶርሳ ማላቲደ፡ ህንተኮ ይያ ዎርዶ ናባቱዋፕ ናገትተ፤ ሸን ኡንቱንቱ ጋርሳ ባጋና ዋላቱዋ ማላ።

16 ኡንቱንቱ ኣይፍያ ኣይፍያዋን ህንተ ኡንቱንታ ኤራና፤ ኣጉንላይ ዎደንላ ኣይፍያ ኣይፈና፤ ጎምኦሪካ ኮክያ ኣይፍያ ኣይፈና።

17 ሄዋዳንካ፡ ሎኦ ምላ ኡባይ ሎኦ ኣይፍያ ኣይፌ፤ ሸን ኢታ ምላይ ኢታ ኣይፍያ ኣይፌ።

18 ሎኦ ምላይ ኢታ ኣይፍያ ኣይፋናዉ ዳንዳየና፤ ቃይ ኢታ ምላይካ ሎኦ ኣይፍያ ኣይፋናዉ ዳንዳየና።

19 ሎኦ ኣይፍያ ኣይፈና ምላ ኡባይ ቃንጸቲደ፡ ታማን የገታና።

20 ሄዋ ድራዉ፡ ህንተ ኡንቱንቱ ኣይፍያ ኣይፍያዋን ኡንቱንታ ኤራንታ።

21 ሳሉዋን ደእያ ታ ኣቡ ጌዳዋ ኦላያ ኡራይ ሳሉዋ ካዉተላ ገላናፕ ኣትን፡ ሓዳዉ፡ ጎዳዉ፡ ግያ ኡባይ ገላና።

22 ፕርዳ ጋላስ ዳር ኣሳይ ታና፡ ሓዳዉ፡ ጎዳዉ፡ ኩን ነ ሱንላን ጸሳይ ከቶዋ ኦድበይኮ? ነ ሱንላን ጸላሀቱዋ ከሰበይኮ? ቃይ ኩን ጸሳይ ኦላያ ማሳልሰያባ ነ ሱንላን ኣለበይኮ? ያጋናዋንታ።

23 ታን ሄ ዎደ ኡንቱንታ፡ ታን ህንተና ኡባካ ኤርከ፤ ኢታባ ኣለያዋንቱ ህንተ ታ ማታፕ ሃክተ፡ ያጋና።

ሳኡ ማላ ጎላቱዋ
(ሉቃሳ 6:47-49)

24 “ሄዋ ድራው፤ ሀዋ ታ ቃላ ሰሲደ ኦልያ ኡባይ ሞኖ ዛላ ቦላ ባረ ጎልያ ኬጾዳ ዋዛናማ አሳ ማላ።

25 እራይ ቡኪደ፤ ድኡ ድኤዳ፤ ጫርኩካ ጫርኪደ፤ ሄ ጎልያ ሱጌዳ። ሽን ጎሊ ሞኖ ዛላ ቦላ ኬጾቲዳ ድራው፤ ኩንድቤና።

26 “ሀዋ ታ ቃላ ሰሲደ ኦ□ና አሳይ ኡባይ፤ ባረ ጎልያ ሻፍያ ቦላ ኬጾዳ ቦዛ አሳ ማላ።

27 እራይ ቡኪደ፤ ድኡ ድኤዳ፤ ጫርኩካ ጫርኪደ፤ ሄ ጎልያ ሱግና፤ ጎሊ ኤለካ ኩንዳዳ። ሄ ጎሊ ዋልቃማ ኩንደሳ ኩንዳዳ።”

28 የሱሰ ባረ ሃሳይያዋ ወርሴዳ ዋደ፤ አሳይ እ ታማርሰያዋን ማላለቲድና።

29 አያወ ጎፐ፤ እ ኡንቱንታ ታማርሲደ፤ ሙሴ ሀግያ ታማርሰያዋንቱዳን ግደናን፤ ማታይ ደእያ አሳዳን ታማርሲ ድራሳ።

8

የሱሰ ኦሉ ኦይቄዳ ብታንያ ፓሌዳ
(ማር. 1:40-45፤ ሉቃሳ 5:12-16)

1 የሱሰ ደርያፕ ዋጄዳ ዋደ፤ ጮራ አሳይ አ ካሌዳ።

2 ሄ ዋደ ኦሉ * ኦይቄዳ እት ብታኒ የሱሳኮ ይ አ ሰንፋን ጉልባቲደ፤ “ሳዳው፤ ነ ሽነ ግደፐ፤ ታና ፓላደ ጌሻናው ዳንዳያ” ያጌዳ።

3 የሱሰ ባረ ኩሽያ የድ አ ቦቺደ፤ “ታን ኮያይ፤ ፓጻደ ጌያ!” ያጌዳ። ኤለካ ኦሉ ብታንያ የድ አጌዳ።

4 የሱሰ አ፤ “ሰሞ ሀዋ ኦሰነ ኦደፓ፤ ሽን ቄሳኮ ባደ ነ ፓጻደ ጌዬዳዋ አ በሳ፤ ነ ፓጻደ ጌዬዳዋ አሳ ኤርሳናው ሙሴ አዛዜዳ ያርሹዋ ጸሳው ያርሻ” ያጌዳ።

የሱሰ ጾቱዋ ካፑዋ ቆማ ፓሌዳ
(ሉቃሳ 7:1-10)

5-6 የሱሰ ቅፍርናሆማ ካታማ ገሌዳ ዋደ፤ እት ሮማ ኃደ ጾቱዋ ካፑ አኮ ዪደ፤ “ታ ጎዳው፤ ታ ቆማ ቦላይ ጉንድና፤ ዳሮ ሳከቲደ፤ ሶይን ግሴዳ፤ ሀያ ጎደ ታዉ ፓላርኪ” ያግ ዋሴዳ።

* 8:2 ኦሉ ኦይቄዳ አሳ ቦላይ ቦጼ። ሀዌ ሳክያ አሳይ ሄ ዋደ ደኡዋን አሳና ደእያ ዋጋ ኡባፕ ሻከቲደ ደኡ። ቃይካ ጌሻ ግደና ጌተቲደ ሀራ አሳን ጾሰቲ። 8:4 ዋጋ 14:1-32

7 የሱስ፡ “ታን ባደ አ ፓላና” ያጌዳ።

8 ሽን ጾቹዋ ካፑ ዛሪደ፡ “ታ ጎዳወ፡ ኔና ታ ሶይ ገልሳናወ ታወ በሰና፤ ሽን ኔን ቃላ ጸላላ ሃሳያ፤ ታ ቆማይ ፓጸናዋ።

9 እያወ ጎፕ፡ ታን ታፕ ሶላና ደእያዋንቶ ኤኖ ግያ አሳ፤ ቃይ ታፕ ጋርሳና ዋታዳራቹ ደእኖ። ታን እቱዋ፡ ‘ባ!’ ጎፕ ቤ፤ ቃይ የኩዋ፡ ‘ሃያ!’ ጎፕ ዬ፤ ታ ቆማ፡ ‘ሀዋ ኦላ!’ ጎፕ ኦሌ” ያጌዳ።

10 የሱስ ሄዋ ሰሴዳ ዋደ ማላለቲደ፡ ባረና ካልያ አሳ፡ “ታን ህንተወ ቱሙዋ ኦዳይ፤ ታን ሀዋ ማላ አማኑዋ ሀራይ አቶ፡ እስራኤልያ ጋድያንካ በአበይከ።

11 ጮራ አሳይ አዋይፊ ዶልያ ባጋፕነ ወልያ ባጋፕ ዬደ፡ አብራሃዋና፡ ይሳቃናን ያቆባና ሳሉዋ ካወተላ ጋይታን እትፕ ኡታናዋንታ ያጋይ።

12 ሽን ካወተላን ደእናወ በሰያ አሳይ ዋልቃማ ጳማ ጋርሳ ካረ ኦለታና፤ ሄዋን ኡንቱንቱ ዬካናን ባረንቱ አቻ ጳቃናዋንታ” ያጌዳ።

13 ሄዋፕ ካላ የሱስ ጾቹዋ ካፑዋ፡ “ነ ሶይ ባ፤ ኔን አማኔዳዋዳን ነወ ሀና” ያጌዳ፤ ጾቹዋ ካፑዋ ቆማይ ሄ ሳትያንካ ፓጽ አጌዳ።

የሱስ ጮራ አሳቱዋ ኡንቱንቱ ሀርግያፕ ፓሌዳ
(ማር. 1:29-34፤ ሉቃሳ 4:38-41)

14 የሱስ ጸጽሮሳ ሶይ ቢደ፡ አ ሶሎታታ ቆጶዋ ሀርጋይ ግሴዳወኖ በኤዳ።

15 እዝ ኩሽያ የሱስ ሶቻና፡ ቆጶ እዞ ባሽ አጌዳ፤ እዛካ ደንዳደ አወ ሞያባ ገግሳዱ።

16-17 ሳእይ ኦማርሴዳ ዋደ፡ አሳይ ኢታ እያናቱ ኦይቄዳ ጮራ አሳ የሱሳኮ አሄዳ፤ ናብያ ኢሰያሰ፡ “እ ኑ ዳቡራ ባረወ አኬዳ፤ ቃይ ኑ ሀርግያካ ቶኬዳ” ያጌዳዌ ፖለታና ማላ፡ የሱስ ኢታ እያናቱዋ ባረ ቃላን ከሲደ፡ ሀርጌዳ አሳ ኡባካ ፓሌዳ።

የሱሳ ካልያዋንታ ጋክያ መቱዋ
(ሉቃሳ 9:57-62)

18 የሱስ ጮራ አሳይ ባረ ዩሹዋን ደእያዋንታ በኢደ፡ አባፕ ሄፍንላ ፕናና ማላ፡ ባረና ካልያዋንታ አዛዜዳ።

19 ሄዋፕ ጉይያን ሙሴ ህግያ ታማርሰያ እቱ አኮ ዬደ፡ “ታማርሰያዋ፡ ኔን ብያሳ ኡባ ታን ኔና ካላና” ያጌዳ።

20 የሱስ አ፡ “ዋራካናቶ ኦላይ ደኤ፤ ካፋቱዋሰካ ኬላይ ደኤ፤ ሽን ታወ፡ አሳ ናአወ፡ ሸምፓ አክያሳይካ ባዋ” ያጌዳ።

21 ቃይ ካልያዋንቱ፣ እቱ የሱሳ፣ “ጎዳወ፣ ታን ሰንሳታ ባደ ታ ከባ ሞጋናዉ ባ ያጋርኪ” ያጌዳ።

22 ሽን የሱሰ እ፥ “ኔን ታና ካላ፤ ሀይቄዳዋንቱ ባረንቱ አሃ ሞግኖ” ያጌዳ።

የሱሰ ጎቱዋን ቤታ ጮኡ አሌዳ
(ማር. 4:35-41፤ ሉቃሳ 8:22-25)

23 የሱሰ ዋንግርያን ገሎደ፣ አ ካልያዋንቱ አናና ቤድኖ።

24 ቤታይ ዋንግርያ ምታና ጋካናወ፣ አባን ዋልቃማ ሆቢ ደንዴዳ፤ ሽን የሱሰ ገምእሹዳ።

25 አ ካልያዋንቱ አኮ ቢደ፣ ገምእሹዋ፣ ደንሌድኖ፤ ሄዋ፣ ሰሚደ እ፥ “ጎዳወ፣ ኩን ቆይቶ፤ ኩና አሻርኪ” ያጌድኖ።

26 የሱሰ ኡንቱንታ፣ “ሀ አማኑ ፓጮዳዋንቶ፣ እያዉ ያዩቲ?” ያጌዳ። ሄዋ፣ ጉይያን ደንዲደ፣ ጎቱዋን ቤታ አግተ ጊና፣ ጎቱን ቤታይ ጮኡ ጌዳ።

27 አሳይ ማላለቲደ፣ “ሀዌ ላ ሀራይ አቶ፣ ጎቱን ቤታይ አዛዘትያዌ እይባ አሴ?” ያጌድኖ።

የሱሰ ኢታ አያናይ ኦይቄዳ ላኡ አሳቱዋ ፓሌዳ
(ማር. 5:1-20፤ ሉቃሳ 8:26-39)

28 የሱሰ ጋለላ አባ፣ ሄፍንላን ደእያ ገርገሰኖና ጌተትያ ጋድያ ፕኔዳ፤ ኢታ አያናቱ ኦይቄዳ ላኡ አሳቱ ሄ ጋድያን ደእያዋንቱ ዲፋዋ፣ ከሲደ፣ አናና ጋከቲድኖ። ኡንቱንቱ ዳር ኢታ ግድያ ድራወ፣ ኡን ሄ ኦግና አቆናዉ ዳንዳይቤና።

29 ኡንቱንቱ ባረንቱ ቃላ ቶቄ ኦሊደ፣ “ጸሳ ናእወ፣ ኩና ነዉ አይ አላሊ ደኢ? ዋዲ ጋከናን ኩና ሙራናዉ ያዲ?” ያጌድኖ።

30 ኡንቱንቱ ላፋ ሃክያሳን ጉዲንላ ዉዲ ሄሙቲ።

31 ኢታ አያናቱ የሱሳ፣ “ኔን ኩና ከሰያዋ ግድ፣ ሀን ጉዲንላ ዉድያ ግድ የዳርኪ” ያጌደ ዋሴድኖ።

32 የሱሰ ኡንቱንታ፣ “ቢተ!” ጊና ኡንቱንቱ ብታናቱዋ፣ ከሰ ቢደ፣ ጉዲንላቱዋን ገሌድኖ። ጉዲንላ ዉዲ ኡባይ ካካ ላንቄያና ካጅቲደ፣ አባን ገሊደ፣ ምተት አጌድኖ።

33 ጉዲንላ ዉድያ ሄምያዋንቱ ባቃቲደ ካታማ ብ አጌድኖ፤ ቤዳሳን ኢታ አያናቱ ኦይቄዳ አሳቱ ሀኔዳባ ኡባ ኦይድኖ።

34 ሄዋ ሰሴዳ ካታማን ደእያ አሳይ ኡባይ የሱሳና ጋከታናዉ ከሴድኖ፤ አ ቦኤዳ ዋደ፣ ባረንቱ ጋድያ፣ ሳና ማላ ዋሴድኖ።

9

የሱስ ቦላይ ጉንዴዳ ብታንያ ፓሌዳ
(ማር. 2:1-12፤ ሉቃሳ 5:17-26)

1 ሀዋጥ ካላ የሱስ ዋንግርያን ገሊደ፣ አባ ፕኒደ፣ ባረ ካታማ ዬዳ።

2 አማራዳ አሳይ ቦላይ ጉንዴዳ እት ብታንያ ሻንቻማን ቶኪደ፣ የሱሳኮ አሄድኖ፤ የሱስ ኡንቱንቱ አማኑዋ በኢደ፣ ቦላይ ጉንዴዳ ብታንያ፣ “ታ ናአው፣ ያዮፓ፤ ነ ናጋራይ አቶ ጌተቱዳ” ያጌዳ።

3 ሀግያ ታማርሰያዋንቱ፣ እቱ እቱ ባረንቱ ዋዛናን፣ “ላ ሀ ብታኒ ጸሳ ቦላ ኢታባ ሃሳዬቴ!” ያግ ቆፔድኖ።

4 የሱስ ኡንቱንቱ ቆፋ ኤሪደ፣ ኡንቱንታ ሀዋዳን ያጌዳ፤ “ሀንተንቱ ሀንተ ዋዛናን ሀዋ ማላ ኢታባ አያው ቆፒቱ?”

5 “ሳ ናጋራይ አቶ ጌተቱዳ’ ያግያዌ ማቴዬ? ዋይ፣ ‘ደንዳ ኤቃደ ሀመታ’ ያግያዌ ማቴ?”

6 ሽን ሳኣ ቦላን ናጋራ አቶ ጋናዉ ታዉ፣ አሳ ናአው፣ ማታይ ደእያዋ ታን ሀንተና ኤርሳና” ያጌደ፣ ሄዋጥ ጉየ እ ሄ ቦላይ ጉንዴዳ ብታንያ፣ “ደንዳ ኤቃ፤ ያታደ ነ ሻንቻማ ቶካደ፣ ነ ጎላ ባ” ያጌዳ።

7 ጉንዴዳ ብታኒካ ደንድ ኤቂደ፣ ባረ ጎላ ቤዳ።

8 ሽን ዳር አሳይ ሄዋ በኢደ ያዬድኖ፤ አሳዉ ሀዋ ማላ ማታ እማዳ ጸሳ ጋላቴድኖ።

የሱስ ሌዌያ ማቶሳ ጸሴዳ
(ማር. 2:13-17፤ ሉቃሳ 5:27-32)

9 የሱስ ሄዋና አዲደ፣ ማቶሳ ያግያዌ ቃራጸ ቃንጽያ ሳን ኡቴዳዋ ደሚደ አ፣ “ታና ካላ” ያጌዳ።

ማቶሳካ ደንድ ኤቂደ፣ አ ካሌዳ።

10 የሱስ ማቶሳ ጎላን ቁማ ማናዉ ኡት ደእሽን፣ ቃራጸ አክያ ጮራ አሳይነ ናጋራንቻቱ ዪደ፣ አናናነ አ ካልያዋንቱና እትፕ ጋይታን ኡቴድኖ።

11 እት እት ፓርሳዋቱ ሄዋ በኢደ፣ የሱሳ ካልያዋንታ፣ “ሀንተና ታማርሰያዌ ቃራጸ ቃንጽያዋንቱናነ ናጋራንቻቱዋና ቁማ አያው እትፕ ሚ?” ያጌድኖ።

12 ሽን የሱስ ኡንቱንቱ ያግያዋ ሰሲደ፣ “ሀርጋንቻቱዋ፣ እትን፣ ፓጸቶ አክሚ ኮሸና።

13 ሽን ሀንተንቱ ቢደ፣ ጸሳ ማጻፋይ፣ ‘ታን ማርተላ ኮያይፕ እትን፣ ያርሹዋ ኮይኮ’ ያግያዌ ዋግያዌንቶ ኤርተ፤ አያው ጎፕ።

ታን ናጋራንቻቱዋ ጸሳናው ዬዳዋፕ አትን፡ ጽላቱዋ ጸሳናው ያበይከ” ያጌዳ።

ጸማባ ኦቼዳ ኦሻ
(ማር. 2:18-22፤ ሉቃሳ 5:33-39)

14 ሄ ዋደ ዮሃንሳ ካልያዋንቱ የሱሳኮ ዪደ፡ “ኑንነ ፓርሳዋቱ ኡባ ዋደ ጸማቶ፤ ሽን ኔና ካልያዋንቱ እያው ጸምክና?” ያጌደ አ ኦቼድና።

15 የሱሳኮ ኡንቱንታ፡ “ቡላቻ ዬዳ አሳይ ማቻቶ አክያዌ ባረንቱና ደእሽን፡ ካዮታናው ዳንዳዪና? ዳንዳይክና፤ ሽን ማቻቶ አክያዋ ኡንቱንቱ ማታፕ አፋና ዋዲ ያና፤ ኡንቱንቱ ሄ ዋደ ጸማናዋንታ” ያጌዳ።

16 “ኤጫ ማዩዋ ቦላ ኦራላ □ፍያ ዋሲደ ሰክያ አሳይ ባዋ፤ እያው ጎፕ፡ ኦራላ □ፊ ኤጫ ማዩዋ ፔ□ሬላና፤ ፔ□ላይካ ካሰዋፕ ዳራናዋ።

17 ሆኦ ዋይንያ ኤሳ ኤጫ ኦጎሩዋን ናእያ አሳይ ባዋ። ሽን ናኦፕ፡ ሄ ዋይንያ ኤሳይ ኦጎሩዋ ዳካና፤ ባረጋካ ዋፊታና፤ ኦጎሩካ ባያናዋ። ሽን፡ ሆኦ ዋይንያ ኤሳ ኦራላ ኦጎሩዋን ናእናው በሴ፤ ላኡካ ባይክና” ያጌዳ።

ያእሮሳ ናትባነ የሱሳ ማዩዋ ቦቼዳ ምሽራትባ
(ማር. 5:21-43፤ ሉቃሳ 8:40-56)

18 የሱሳኮ ኡንቱንቶ ሄዋ ኦድሽን፡ አይሁደ ዋሳ ጎላ ካፓቱዋፕ እቱ አኮ ይ አ ሰንላን ጉልባቲደ፡ “ታ ናታ ሀእ ሀይቃዲ፤ ሽን ኔን ያደ ነ ኩሽያ እዘ ቦላ ዋላርኪ፤ እዛ ደኡዋን ደእናውኑ” ያጌዳ።

19 የሱሳኮ ደንዲደ፡ ባረና ካልያዋንቱና እትፕ ብታንያ ካሊደ ቤዳ።

20 ሄ ዋደ ታማነ ላኡ ላይላ ኩመንላ፡ እዘ ቦላፕ ሱላይ ጎግያ እት ምሽራታ ጉየና ሺቃደ፡ የሱሳ ማዩዋ ማጫራ ቦቻዲ።

21 ሀዋ እዛ ኦላዌ፡ እዛ ባረ ዋዛናን፡ “ታን አ ማዩዋ ጸላላ ቦቻንቶ ፓጸና” ያጋደ ቆፓዲ።

22 ሽን የሱሳኮ ዩይ እዘ ጸሊደ፡ “ታ ናቱ፡ ያዮፓ፤ ኔና ነ አማኑ ፓሌዳ” ያጌዳ። ሄ ማንእያን ምሽራታ ፓጸ አጋዲ።

23 የሱሳኮ አይሁዳ ዋሳ ጎላ ካፑዋ ሶይ ጋኬዳ ዋደ፡ ዬኩዋን ድንካ ፑንያ አሳነ ዬክያ አሳ በእደ።

24 “ካረ ከሰተ፤ ጉላ ናታ ገምእሻዲፕ አትን፡ ሀይቃበይኩ” ያጌዳ። ሄዋፕ ጉይያን አሳይ አ ቦላ ዳሪ ሚጨድዳ።

25 ሸን ጮራ አሳ ካረ እ ከሴዳዋፕ ጉይያን፣ ጎለ ገሊደ፣ ናት ኩሽያ ኦይቆዳ፤ ናታካ ደንዳ አጋዲ።

26 ሄ ዋሪ፣ ሄ ማንእያን ሄ ጋድያን ኡባን ሰሰቱዳ።

የሱስ ላኦ ቆቃቱዋ ፓሴዳ

27 የሱስ ሄዋና አጂደ ብያ ዋደ፣ ላኦ ቆቃቱ ባረንቱ ቃላ ቶቁ አሊደ፣ “ዳዊተ ናአው፣ ኦና ማራርኪ” ያጊደ እ ካሌድኖ።

28 የሱስ ጎለ ገሊዳ ዋደ፣ ቆቃቱ አኮ ዬድኖ፤ የሱስ ኡንቱንታ፣ “ታን ሀዋ ኦላናው ዳንዳይያዋ አማኒቱ?” ያጌዳ።

ኡንቱንቱ፣ “ኤ ጎዳው” ያግ ዛሬድኖ።

29 ሄዋፕ ጉይያን፣ የሱስ ኡንቱንቱ አይፍያ ባረ ኩሽያን ቦቺደ ኡንቱንታ፣ “ሀንተው ሀንተንቱ አማኑዋዳን ሀኖ” ያጌዳ።

30 ኡንቱንቱ አይፊ ደየት አጌዳ፤ የሱስ ኡንቱንቶ፣ “ሀዋ ኦስነ አዶፕተ” ያጊደ ሞንሲደ ኦዴዳ።

31 ሸን ኡንቱንቱ ቢደ፣ ሄ ጋድያ ኡባን የሱሳባ ኦዴድኖ።

የሱስ እት ዲድያ ፓሴዳ

32 ኡንቱንቱ ከሲደ ብያ ዋደ፣ አማራዳ አሳይ ኢታ አያናይ አይቆና ዲዴዳ ብታንያ የሱሳኮ አሄድኖ።

33 የሱስ ኢታ አያና ከሴዳዋፕ ጉይያን፣ ዲደ ብታኒ ሃሳዬዳ። አሳይ፣ “ሀዌ ኦራላባ፤ ሀዋ ማላባይ እሰራኤልያ ጋድያን ኡባካ ሀንቤና” ያግ ማላለቱድኖ።

34 ሸን ፓርሳዋቱ፣ “እ ኢታ አያናቱዋ ካፑዋ ዋልቃን ጸላሀቱዋ ከሴ” ያጌድኖ።

የሱስ አሳው ቃረቱዳ

35 የሱስ ኡንቱንታ አይሁዳ ዋሳ ጎለቱዋን ታማርሲደነ ካውተላ ዋንጋላ ሞሽራቹዋ ኦዲደ፣ ቃይ ሀርግያ ኡባፕነ ሳኩዋ ኡባፕ አሳ ፓሴደ፣ ዋጋ ካታማቱዋን ቁር ካታማቱዋ ኡባን ዩዬዳ።

36 ጮራ አሳ በኢደ፣ ሄሞያ አሳይ ባይና ዶርሳዳን አሳይ ሀርገትያ ድራውነ አሳ ማድያባይ ባይና ድራው፣ አሳው ቃረቱዳ።

37 ያቲደ ባረና ካልያዋንታ፣ “ቆይቻው ጋካ ካላይ ዳራ፤ ሸን ጫክያ አሳይ ጉላ።

38 ሰሞ ካላ ጎዳይ ካላ ጫካናው ኦሳንቻቱዋ የዳና ማላ፣ አ ዋስተ” ያጌዳ።

9:34 10:25፤ 12:24፤ ማር. 3:22፤ ሉቃሳ 11:15 9:35 ማቶላ 4:23፤ ማር. 1:39፤ ሉቃሳ 4:44 9:36 ፓይ. 27:17፤ 1 ካታ. 22:17፤ 2 ኦዲዋ 18:16፤ ህዝ. 34:5፤ ማር. 6:34

10

የሱስ ኪቴዳ ታማነ ላኤ አሳቱዋባ
(ማር. 3:13-19፤ ሉቃሳ 6:12-16)

1 የሱስ ባረ ታማነ ላኤ ካልያዋንታ ጾሲደ፣ ኤንቱንቱ ኢታ አያና ከሳና ማላ፣ ቃይ ሀርግያ ኡባነ ሳኩዋ ኡባ ፓላና ማላ፣ ኤንቱንቶ ማታ እሜዳ።

2 የሱስ ኪቴዳ ታማነ ላኤቱዋ ሱንላይ፣ ኮይሮዌ ጳጳሮሳ ጌተትያ ሰሞናን እ እሻ እንድራሳ፣ ዛብድዮሳ ናና፣ ያቆባነ ዮሃንሳ፣

3 ፕልጳሳ፣ ባርታላሞሳ፣ ቶማሳ፣ ቃራጸ አክያ ማቶሳ፣ አልፕዮሳ ናኣ ያቆባነ ታደሳ፤

4 ባረ ጋደዉ ቃረትያ ሰሞናን የሱሳ አል እሜዳ አሰቆሮቱ ይሁዳ።

የሱስ ኪቴዳ ታማነ ላኤቱ ታማርሳናዉ ኪተቴድና
(ማር. 6:7-13፤ ሉቃሳ 9:1-6)

5 የሱስ ሀ ታማነ ላኤቱዋ ሀዋዳን ያጊደ ኪቴዳ፤ “አይሁዳ ግደና አሳ ጋድያ ቦፕተ፤ ቃይ ሳማረቱዋ ካታማካ ገሎፕተ፤

6 ሄዋ ድራ ባዬዳ ደርሳኩ፣ እሰራኤልያ አሳኩ

7 ቢደ፣ ‘ሳሉዋ ካወተላይ ማቴዳ’ ያጊደ ኦድተ።

8 ሀርጋንቻቱዋ ፓሐተ፤ እሃ ሀይቁዋፕ ደንሐተ፤ አሉ ኦይቁዳዋንታ ፓሐተ፤ ኢታ አያናቱዋካ ከሰተ። ሀንተንቱ ጮ አኬድታ፤ ጮ አሞተ።

9 ዋርቃ ዋይ ብራ ዋይ ሳንትሞያ ሀንተንቱ ኪሰያን ኦይቆፕተ፤

10 ዋይ አገዉ ቃርጨትያ፣ ዋይ ላኤንሐያ ማዩዋ፣ ዋይ ጫማ ዋይ ጸሞኣ ኦይቆፕተ። አያዉ ሳፕ፣ ኦሳንቻዉ ኮሽያባይ ቁማ።

11 “ሀንተንቱ ገልያ ካታማን ዋይ ቁር ካታማ ኡባን ሀንተና ሞካናዉ ናሽትያዌ ኦንንቶ አኬካን ጸሞሰተ፤ ሀንተንቱ ሄዋፕ ከሳና ጋካናዉ፣ ሄዋን ኡትተ።

12 ቃይ ጎለ ገሊደ ሳርትተ።

13 ሄ ጎለን ደእያ አሳይ ሀንተና ሞኮፕ፣ ሀንተንቱ ሳርቴዳ ሳርታይ ኤንቱንታ ጋኮ። ሽን ኤንቱንቱ ሀንተና ሞከናን እጸፕ፣ ሀንተንቱ ሳርቴዳ ሳርታይ ሀንተዉ ጉዩ ሰሞ።

14 ቃይ እት እት ጎሊ ዋይ ካታማይ ሀንተና ሞከናን ዋይ ሀንተንቱ ኦድያዋ ሰሰናን እጸፕ፣ ሄ ጎለፕ ዋይ ሄ ካታማፕ ከሲደ፣ ሀንተንቱ ገድያፕ ባና ሾጭተ።

10:7 ሉቃሳ 10:4-12 10:10 1 ቆር. 9:14፤ 1 ጵሞ. 5:18

15 ታን ህንተዉ ቱሙዋ ኦዳይ፤ ጸሳይ ፕርድያ ጋላስ ሄ ካታማ አሳፕ፡ ሶድማ ካታማ አሳዉን ጋሞራ ካታማ አሳዉ ፕርዳ ካዉሸሳና።

ጎዳይ ያናፕ ካሰቲደ፡ የደርሱነ መቱ ሀናና
(ማር. 13:9-13፤ ሉቃሳ 21:12-17)

16 “በእተ! ታን ህንተና ደርሳ ዋላቱዋ ግዶ የድያዋዳን የዳይ። ሄዋ ድራዉ፡ ሾሻዳን ጭንጫ ግድተ፤ ቃይ ሀራጵያዳን፡ አሸከ ግድተ።

17 ሸን አሳፕ ናገትተ። አያዉ ጎፕ፡ አሳይ ህንተና ፕርዳ ጎለዉ አሊደ እማና፤ ቃይ ባረ አይሁዳ ዋሳ ጎለቱዋንካ ህንተና ልሱዋን ፔዳና።

18 ጋድያ አይሰያዋንቱ ሰንፋንካ ካታቱዋ ሰንፋን ታ ድራዉ ህንተንቱ ኤቁደ፡ ኤንቱንቱነ አይሁዳ ግደና አሳ ሰንፋን ታዉ ማርካ ግዳንታ።

19 ሸን ኤንቱንቱ ህንተና ፕርዳዉ አለያ ዋደ፡ ህንተንቱ ሃሳያናባ ሄ ሳትያን ጸሳይ ህንተዉ እምያ ድራዉ፡ ህንተንቱ ጋናባዉን ዋይ ዋጊደ ሃሳያንቱነ ህርጎፕተ።

20 አያዉ ጎፕ፡ ህንተንቱን አቁደ ሃሳይያዌ ህንተንቱ አዉዋ ጌሻ አያናፕ አትን፡ ሃሳይያዋንቱ ህንተንታ ግድክታ።

21 “አሻይ ባረ እሻ፡ አዉ ባረ ናኦ ቦላ ደንዳና፤ ናናይ ባረንቱ አትነ አዉዋ ቦላ ደንዲደ፡ ኤንቱንታ ዋድሳና።

22 ቃይ አሳይ ኡባይ ህንተንታ ታ ሱንፋ ድራዉ እጻና፤ ሸን ዉርሰላይ ጋካናዉ ገንጭያዌ አታናዋ።

23 ኤንቱንቱ ህንተና እት ካታማፕ የደርሶፕ፡ ሀራ ካታማ ቢተ። አያዉ ጎፕ፡ ታን ህንተዉ ቱሙዋ ጋይ፤ ታን፡ አሳ ናኦይ፡ ያና ጋካናዉ፡ ህንተንቱ ህንተ ኦሱዋ እሰራኤልያ ካታማ ኡባን አሊደ ዉርሰክታ።

24 “ታማርያዌ ባረና ታማርሰያዋፕ ዳረና፤ ቆማይካ ባረ ጎዳፕ ዳረና።

25 ታማርያዌ ባረና ታማርሰያዋ ኬና ግድያዌ፡ ቆማይካ ባረ ጎዳ ኬና ግድያዌ አዉ ግዳና፤ ኤንቱንቱ ጎለ ጎዳ ብኤል-ዘቡላ ጊደ ጸሶፕ፡ አ ጎለ አሳ ዋግ ጸሳኔሻ!

ኦሰ ያያናዉ በሰንቶ
(ሉቃሳ 12:2-7)

10:15 ማቶላ 11:24፤ ዶሙላ 19:24-28 10:17 ማር. 13:9-11፤ ሉቃሳ 12:11-12፤ 21:12-15

26 “ሰሞ አሳዉ ያዮፕተ፤ አያዉ ጎፕ፡ ገንሐ ዋሌዳባይ ቆንጫያ ከሰናን አተና፤ ቆሴዳባይካ ኤረተናን አተና።

27 ታን ህንተንቶ ቋማን ኦድያባ ፖኡዋን ሃሳይተ፤ ህንተዉ ሀይላን ሳሱኪደ ኦዳዳዋ፡ ቋቃሳን አዋይተ።

28 አሹዋ ዋድያዋንቶ ያዮፕተ፤ ኡንቱንቱ፡ ሸምፑዋ ዋዳናዉ ዳንዳይክና። ሸን ሸምፑዋን አሹዋ ጋናምያን ቋይሳናዉ ዳንዳይያ ጸሳዉ ያይተ።

29 ላኡ ሱንያ ካፋቱ ሳንትምያን ዛልኤትክና? ህንተንቱ አዉዋ ሸንያ ግዳና ቋዮፕ፡ ሄ ሱንያ ካፋቱዋፕ አትናካ ሳኣን ዋዳደ ባዩከ።

30 ሸን ሀራይ አቶ፡ ህንተንቱ ሁጲያን ደእያ ብናናይ ኡባይካ ፓይዱዋን ደኤ።

31 ሰሞ ያዮፕተ፤ ዳሮ ሱንያ ካፋቱዋፕ ህንተንቱ አዲታ።

**ክርስቶሳባ ማርካታናዉ በሴ
(ሉቃሳ 12:8-9)**

32 “ሄዋ ድራዉ፡ አሳ ሰንላን ታባ ማርካታያ ኦሰ ግደፕነ፡ ታንካ ሳሉዋን ደእያ ታ አቡ ሰንላን ማርካታና፤

33 ሸን አሳ ሰንላን ታና ካድያ ኦናን ታንካ ቃይ ሳሉዋን ደእያ ታ አቡ ሰንላን አ ካዳና።

34 “ታን ሳአዉ ሳሮተላ አሀናዉ ዬዳዋ ህንተዉ ማላቶፖ፤ ታን ቶራ አሀናዉ ዬዳዋፕ አትን፡ ሳሮተላ አሀናዉ ያበይከ።

35 አያዉ ጎፕ፡ ታን ናኣ አ አቡፕ፡ ናቶ እዝ ዳይፕ፡ ናኣ ማቻቶካ እዝ ቦሎታትፕ ሻካናዉ ያድ፤

36 አሳዉ ሞርከቱ አ ጎለ አሳቱዋ ግዳናዋንታ።

37 “ባረ አባ ዋይ ባረ ዳዮ ታፕ አሌደ ሲቅያዌ ታዋ ግዳናዉ በሰና፤ ባረ አቱማ ናኣ ዋይ ባረ ማጫ ናቶ ታፕ አሌደ ሲቅያዌ ታዋ ግዳናዉ በሰና።

38 ባረ ማሰቃልያ ቶኪደ፡ ታ ጌዱዋ ካለናዌ ታዋ ግዳናዉ በሰና።

39 ባረ ሸምፑዋ አሸያዌ ባይዛናዋ፤ ሸን ታ ድራዉ ባረ ሸምፑዋ ባይዝያዌ አሻናዋ።

40 “ህንተንታ ሞክያዌ ታና ሞኬ፤ ቃይ ታና ሞክያዌ ታና ከቲዳዋ ሞኬ።

41 ናብያ፡ ናብያ ሱንላን ሞክያዌ፡ ናብያ ጋትያ አናና ግሸታናዋ፤ ቃይ ጽሉዋ፡ ጽሉዋ ሱንላን ሞክያዌ፡ ጽሉዋ ጋትያ አናና ግሸታናዋ።

42 ኦንነ ሀ ታና ካልያዋንቱፕ ጉጽያ እቶ፡ ሀራይ አቶ ቡልያ ሃላ ጸላላ ኡሻናው እምፕካ፡ ታን ሀንተንቶ ቱሙዋ ጋይ፤ እ ባረ ጋትያ አካና” ያጌዳ።

11

ጸማቅያ ዮሃንሳፕ የሱሳኮ ኪተቴዳ አሳቱዋ
(ሉቃሳ 7:18-35)

1 የሱሰ ባረ ታማነ ላኡ ካልያዋንታ አዛዝያዋ ፖሌዳ ዋደ፡ ሄዋፕ ደንዲደ፡ ካታማቱዋን ታማርሳናውነ ኦዳናው ቤዳ።

2 ጸማቅያ ዮሃንሰ ቃሾ ጎለን ደኢደ፡ የሱሰ ኦሌዳዋ ሰሲደ፡ ባረና ካልያዋንታ እኮ ኪተደ፡

3 “ያናዌ ኔኔየ? ዋይ ሀራ ናጋኔ?” ያግ አቻናዳን አሌዳ።

4 የሱሰ ዛሪደ፡ ኡንቱንቶ ሀዋዳን ያጌዳ፤ “ቢደ ሀንተንቱ በእያዋነ ሰሰያዋ ዮሃንሳው ኦድተ፤

5 ቆቃቱ ጼሊኖ፤ ዋባቱ ሀመቲኖ፤ ኦሉ ኦይቄዳዋንቱ ፓጺደ ጌዩኖ፤ * ቱላቱ ሰሲኖ፤ ሀይቄዳዋንቱ ደንዲኖ፤ ሀዬሳቱ ዋንጋላ ምሽራቹዋ ሰሲኖ።

6 ታባ ሰፍ ኡራይ አንጀቴዳዋ” ያጌዳ።

7 ዮሃንሳ ካልያዋንቱ ሰም ቤዳ ዋደ፡ የሱሰ ዮሃንሳባ ሸቄዳ አሳው ሀዋዳን ያግ ሃሳዬዳ፤ “እያ በአናው አሳይ ደኤና መላ ቢታ ከሴድቴ? ጫርኩ ቃላያ ማቃ በአናው ከሴድቴ?

8 ያትና፡ እያ በአናው ከሴድቴ? ሎእያ ማዩዋ ማዬዳ ብታንያ በአናው ከሴድቴ? ሎእያ ማዩዋ ማዬዳዋንቱ ካታቱዋ ጎለን ደኢኖ።

9 ያትና፡ እያ በአናው ከሴድቴ? ናብያ በአናው ከሴድቴ? ኤ፡ ታን ሀንተው ኦዳይ፤ ናብያፕካ አድያዋ በኤድታ።

10 እያው ጎፕ፡ ጸሳ ማጸፋን፡

“ ጸሳይ፡ “በአ፡ ታን ኪትያዋ ኔፕ ሰንሳው የዳና።”

እ ነው አግያ ገግሳናዋ ያጌዳ ጌተቲደ ዮሃንሳባይ ጸፈቴዳ።”

11 ታን ሀንተንቶ ቱሙዋ ኦዳይ፤ አት ኡሉዋፕ የለቴዳ አሳ ኡባን ጸማቅያ ዮሃንሳፕ አድያዌ ኦንነ ደንድቤና፤ ሸን ሳሉዋ ካውተላን ኡባፕ ላፍያዌ አፕ አቆና።

* 11:5 ፓጺደ ጌዩኖ ግያዋ ሎይላ እኬካናው 8:2 ጸደና ደእያ ብላላን ጸፈቴዳዋ በአና ዳንዳየቱ። 11:5 አሳ. 35:5-6፤ 61:1 11:10 ሚልክ. 3:1

12 ጸማቅያ የሃንሳ ዋድያፕ ደሚደ፣ ሀቼ ጋካናው፣ ሳሉዋ ካውተላታ ዳሮ ናቀታው፤ ምን ባጸትያዋንቱ እዘ ደሚኖ።

13 እያው ጎፕ፣ ናባቱ ኡባቱነ ሙሴ ህጊ የሃንሳ ዋዲ ጋካናው፣ ትምቢትያ ሃሳዬድኖ፤

14 ሰም ህንተንቱ ኡንቱንቱ ሃሳዮዋ አማናናዋ ግደፕ፣ ያናዋ ጌተቱዳ ኤላስ ሀ የሃንሳ።

15 ሰሰያ ሀይላይ ደእያዌ ሰሶ!

16 “ሽን ታን ሀ ዋድያ አሳ እያና ለምሶ? ኡንቱንቱ ቆጫን ኡትያ ናና ማላቲኖ፤ ኡንቱንቱ ባረንቱ ላገላቱዋ ጸሲደ።

17 ጭን ህንተንቶ ህጽጽያ ፑኔደ፤ ሽን ዱርባይክታ፤ ዬኩዋ የላካ ከሴደ፤ ሽን ዬክባይክታ፣ ያጊኖ።

18 እያው ጎፕ፣ የሃንሰ ጸሚደነ ዋይንያ ኤሳ ኡሸናን ዪና ኡንቱንቱ፣ ጭ ሶላ ኢታ እያናይ ደኤ፣ ያጌድኖ።

19 ታን፣ አሳ ናአይ፣ ማደነ ኡሻደ ዪና፣ ኡንቱንቱ ታና፣ ሳ ናፍሳማነ ዋይንያ ኤሳ ኡሸያዋ በአተ፤ ቃራጸ ቃንጽያዋንቱናነ ናጋራንቻቱዋና ሲቀቱ፣ ያጊኖ፤ ሽን ጸሳ እዴዳ ኤራተላይ ባረ ኡሱዋን ቱማ ግዲደ ቤቴ” ያጌዳ።

አማናናን እጼዳ ድራው ቶሽቴዳ ካታማቱዋ (ሉቃሳ 10:13-15)

20 ሄዋፕ ጉይያን፣ የሱስ ባረ ማላታፕ ዳርያ ባጋ ኦፊዳ ካታማቱዋን ደእያ አሳይ ባረንቱ ናጋራፕ ሰምቤና ድራው፣ ኡንቱንታ ሀዋዳን ያጊደ፣ ቶሽያ ደሜዳ፤

21 “ኩራዚነ ካታማው፣ ነዉ አየሮ፤ ቤተሳይዳ ካታማው፣ ነዉካ አየሮ፤ እያው ጎፕ፣ ህንተንቱ ሶላ ጸሳይ ኦፊዳ ማላታይ ጸረሳ ካታማንነ ሲደና ካታማን ኡሰቶዋ ግድንቶ፣ ኡንቱንቱ ማቅያ ማዪደ፣ ብድንሳ ኦክቲደ፣ በን ባረንቱ ናጋራፕ ሰማናዋንታሽን።

22 ታን ህንተው ኦዳይ፤ ፕርዳ ጋላስ ጸሳይ ህንተፕ ጸረሳ ካታማውነ ሲደና ካታማው ፕርዳ ካዉሸሳና።

23 ቃይ ቅፍርናሆማ ካታማው፣ ኔን ሳሉዋ ፑደ ቶቁ ጋናዉ ኮያድ? ኔን ሰኦልያ ዱገ የገታና፤ እያው ጎፕ፣ ነ ሶላ ጸሳይ ኦፊዳ ማላታይ ሶዶማ ካታማን ኡሰቶዋ ግድንቶ፣ ሶዶማ ካታማይ ሀቼ ጋካናሰካ ደአናዋሽን።

11:14 ሚላክ. 4:5፤ ማቶሳ 17:10-13፤ ማር. 9:11-13 11:21 እሳ. 23:1-18፤ ህዝ. 26:1—28:26፤ እዪ. 3:4-8፤ አዋጸ 1:9-10፤ ዛካ. 9:2-4 11:23 እሳ. 14:13-15፤ ዶሞላ 19:24-28

24 ታን ህንተዉ ኦዲይ፤ ፕርዳ ጋላስ ጸሳይ ኔፕ ሶድማዉ ፕርዳ ካዉሸሳና” ያጌዳ።

የሱሳን ሸምፑዋ ደምያዋ
(ሉቃሳ 10:21-22)

25 የሱስ ሄ ዎደ ዛሪድ፣ ሀዋዳን ያጌዳ፤ “ታ አቦ፣ ሳሉዋ ሳኣ ጎዳዉ፣ ኔን ሀዋ አዴዳ ኤራንቻቱዋፕን አከካንቻቱዋፕ ገንፋድ፣ ኤረና ናናቶ ቆንጭሴዳ ድራዉ፣ ኔና ጋላታይ፤

26 ኤ ታ አቦ፣ አያዉ ጎፕ፣ ሀዌ ነ ሸንያዳን ኦስቴዳ።

27 “ታ አቦ ታዉ ኡባባ እሜዳ፤ አዉዋፕ ሀራይ ናኣ ኤረና፤ ናኣፕን ናኣይ አዉዋ ቆንጭሳናዉ ኮይያ አሳፕ አትን፣ ሀራይ አዉዋ ኤረና።

28 “ዳቡራንቻቶ፣ ዴዱዋ ቶኮዋንቶ ኡባቶ፣ ታኮ ሃ ዪተ፤ ታን ህንተንታ ሸምፕሳና።

29 ታን ጋራነ ታ ዎዛናን አሸከ ግደ ድራዉ፣ ታ ሞርገ ሞላን ዎጸትተ፤ ታፕ ታማርተ፤ ህንተንቱ ሸምፖካ ህንተ ሸምፑዋ ደማና።

30 አያዉ ጎፕ፣ ታ ሞርገ ሞላይ ጌጋ፤ ቃይ ታን ህንተንታ ቶሴዳዌካ ካዉሻ” ያጌዳ።

12

ሳምባታባዉ ሸቄዳ አሻ
(ማር. 2:23-28፤ ሉቃሳ 6:1-5)

1 የሱስ ሄ ዎደ ሳምባታ ጋላስ፣ ትሻ ባንጋ ግደና አድሸን አ ካልያዋንቱ ኮሻቲድ፣ ትሻ ባንጋ ዱሲድ፣ ሙሳ ደሜድና።

2 ሸን ፓርሳዋቱ ሄዋ በኢደ የሱሳ፣ “በኣ፣ ኔና ካልያዋንቱ ሳምባታ ጋላስ ኦላናዉ ዎጋ ግደናባ ኦሊና” ያጌድና።

3 ሸን የሱስ ኡንቱንቶ ሀዋዳን ያጌዳ፤ “ዳዊተን አናና ደእያዋንቱ ኮሻቲዳ ዎደ፣ ዳዊተ ኦሌዳዋ ናባብ በይክቲ?

4 ዳዊተ ጸሳ ጎላ ገሊድ፣ ቄሳቱዋ ጸላላይ ማናፕ አትን፣ እነ አናና ደእያዋንቱ ማናዉ ዎጋ ግደና ጸሳዉ ያርሼዳ ቁማ ሜዳ።

5 ዎይ ሳምባታ ኡባን ጌሻ ጎልያን ደእያ ቄሳቱ ሳምባታ ዎጋ ሙንሐያዋ፣ ቃይ ኡንቱንቶ ሄዌ ባይዞ ግደናዋ ሙሴ ህግያን ናባብ በይክቲ?

11:29 ኤር. 6:16 12:1 ዛሪ. 23:25 12:3 1 ሳሜላ 21:1-6 12:4 ዎጋ 24:9 12:5 ፓይ. 28:9-10

- 6 ሽን ታን ህንተዉ ኦዳይ፤ ጌሻ ጎልያፕ አቋያዌ ሀዋን ደኤ።
- 7 ጸሳ ማጸፋይ፣ ታን ማርተላ ኮያይፕ አትን፣ ያርሹዋ ኮይከ፣ ያገያዌ ዋግያዌንቶ ህንተንቱ ኤሪተንቶ፣ ባይዙ ባይና አሳ ቦላ ፕርድክታ።
- 8 እያዉ ጎፕ፣ ታን፣ አሳ ናአይ፣ ሳምባታ ጎዳ” ያጌዳ።

የሱስ ኩሺ ጉንዴዳ ብታንያ ፓሌዳ
(ማር. 3:1-6፤ ሉቃሳ 6:6-11)

- 9 የሱስ ሄዋፕ ደንዲደ፣ አይሁዳ ዋሳ ጎለ ቤዳ።
- 10 ሄዋን ኩሺ ጉንዴዳ እት ብታኒ ደኤ፤ የሱሳ ሞታናዉ ጋሱዋ ኮይያ አሳቱ፣ “ሳምባታን፣ ሀርጋንቻ ፓሌያዌ ዋጌ?” ያጌደ አ ኦቼድና።
- 11 የሱስ ኡንቱንታ፣ “ህንተንቱ ግደን እት ደርሳይ ደእያ ኡራይ፣ ሄ ደርሳይ ሳምባታ ጋላስ ኦላን ኩንደፕ፣ ኦይቂደ ከሰናዌ ኦኔ?”
- 12 ያትና፣ አሳይ ደርሳፕ ዋት ሎይሊደ ዳረኔ! ሄዋ ድራዉ፣ ሳምባታ ጋላስ ሎኦባ አሌያዌ ዋጋ” ያጌዳ።
- 13 ሄዋፕ ጉይያን ብታንያ፣ “ነ ኩሺያ ፕድ ኦላ” ያግና ብታኒ ፕድ ኦላዋፕ ጉይያን፣ አ ኩሺ የኮ ኩሺያዋዳንካ ፓጽ አጌዳ።
- 14 ሽን ፓርሳዋቱ ካረ ከሲደ፣ የሱሳ ዋት ዋጳንንቶ ማቀቱድና።

ጸሳይ ደሬዳ አይልያ

- 15 ሽን የሱስ ኡንቱንቱ ዘረታ ኤሪደ፣ ሄዋፕ አጌደ ብያ ዋደ፣ ዳር አሳይ አ ካሌዳ፤ ሀርጌዳ ኡባ ፓሌዳ።
- 16-17 ጸሳይ ናብያ ኢሰያሳ ባጋና ኦይዳዌ ፖለታና ማላ፣ የሱስ አሳቶ፣ “ታባ ሀራ አሳዉ ኦደፕተ” ያጌዳ።
- 18 ጸሳይ ኢሰያሳ ባጋና ሀዋዳን ያጌዳ፤ “ታን ደሬዳ ታ አይሊ፣ ታን ሲቅያ፣ ታና ናሽቻያዌ ሀዌኩ። ታን ታ እያና አ ቦላ ዋላና። እ ሱረ ፕርዳ አሳዉ ኡባዉ ኦዳናዋ።
- 19 እ ፓሉመተና፤ ዋይ ዋሰና። ባረ ቃላካ ኦግያን ሰሰና።
- 20 ሱረ ፕርዳይ ጸን ከሳና ጋካናዉ።

ትንጨቴዳ ማቃ መንግስት፤*

ቃይ ጨዋትያ ሙቃዳ ቁንጨቴትያካ እ ቶይሰና።

21 አይሁዳ ግደና አሳይ ኡባይ።

አ ቦላ ባረንቴ ህደታ ዋላና”
ያጌዳ።

የሱሳባን ብኤል-ዘቡላባ

(ማር. 3:20-30፤ ሉቃሳ 11:14-23)

22 ሄዋጥ ጉይያን፣ አማራዳ አሳቴ ኢታ አያናይ ኮይቂና ዱዳዳ እት ቆቃ ብታንያ የሱሳቦ አሄድኖ፤ የሱሰ ሄ ዱደ ብታንያ ፓሌዳ፤ ብታኒካ ሃሳያን ጸላ ደሜዳ።

23 አሳይ ኡባይ ማላለቲደ፣ “ላ ሀዌ ዳዊተ ናኣ ግዳንዴሻ?”
ያጌድኖ።

24 ሸን ፓርሳዋቱ ሄዋ ሰሲደ፣ “ሀ ብታኒ ኢታ አያናቱዋ ካፑ ‘ብኤል-ዘቡል’ ባረጧ ዋልቃ እምና፣ ጸላሀቱዋ ከሴ” ያጌድኖ።

25 ሸን የሱሰ ኡንቴንቴ ቆፋ ኤሪደ፣ ኡንቴንታ ሀዋዳን ያጌዳ፤ “ባረ ግደን ሻከትያ ካወተላይ ኡባይ ጳያና፤ ቃይ ባረ ግደን ሻከትያ ካታማይ ዋይ ጎለን ደእያ አሳይካ ምነና።

26 ቃይ ሴጻናይ ሴጻና ከሰያዋ ግደፕ፣ ባረ ግደን ሻከቴ፤ ያትና፣ አ ካወተላይ ዋኒደ ምን ኤቃናዋ?

27 ታዉ ብኤል-ዘቡል ዋልቃ እምና፣ ታን ጸላሀቱዋ ከሰያዋ ግደፕ፣ ህንተንቴ አሳዉ ዋልቃ ኦን እምና ጸላሀቱዋ ከሳኔ? ሄዋ ድራዉ፣ ኡንቴንቴ ህንተ ቦላ ፕርዳና።

28 ሸን ጸሳ ጌሻ አያናይ ታዉ ዋልቃ እምና፣ ታን ጸላሀቱዋ ከሰያዋ ግደፕ፣ ሰም ጸሳ ካወተላይ ህንተ ቦላ ይ ድጌዳ።

29 “ዋይ አሳይ ካስቲደ፣ ዋልቃማ አሳ ቃቼናን ደኢደ፣ አ ጎለ ገሊደ፣ አ ሚሻ ቦንቃናዉ ዋኒደ ዳንዳዬ? ቃቼዳዋጥ ጉይያን፣ አ ሚሻ ቦንቃናዉ ዳንዳዬ።

30 “ታ ባጋ ግደና ኡራይ ታዋ እጹ፤ ቃይ ታናና እትጥ ሺሸናዌ ላሌ።

31 ሄዋ ድራዉ፣ ታን ህንተዉ ኦዳይ፤ ጸሳይ አሳዉ አይ ናጋራ ግድናካ፣ ቃይ አይ ቦረ ግድናካ አቶ ጋና፤ ሸን ጌሻ አያና ቦርያዋ አቶ ጌና።

* 12:20 እ። ትንጨቴዳ ማቃ መንግስት፤ ሀዋ ጉሳይ፣ ማዳ ባይናዋንቶን ዳቡራንቻቶ የሱሰ ከካን ጋራ ጉሳ። ብ። ጨዋትያ ሙቃዳ ቁንጨቴትያካ እ ቶይሰና ጉሳይ፣ የሱሰ ዳቡራንቻቶ ጉዙማ ግደናዳን ከካ ጉሳ።

32 ታ ቦላ፡ አሳ ናኦ ቦላ፡ ኢታባ ሃሳይያ ኦ ናጋራነ ጸሳይ አቶ ጋና፤ ሽን ጌሻ አያና ቦላ ኢታባ ሃሳይያ ኦ ናጋራነ ሳኣን ግድና፡ ሳሉዋንካ ጸሳይ አቶ ጌና።

ሎኦ ምሳይ ባረ አይፍያን ኤረቲ (ሉቃሳ 6:43-45)

33 “ሎኦ አይፍያ ደማናዉ ሎኦ ምሳ ድቻናዉ በሴ፤ ኢታ ምሳ ህንተንቱ ድቻ፡ ኢታ አይፍያ ደማንታ፤ አያዉ ሳ፡ ምሳይ ኤረትያዌ ባረ አይፍያ አይፍያዋና።

34 ሸሻቶ፡ ህንተንቱ ኢታ ግዲደ፡ ዋት ሎኦባ ሃሳያናዉ ዳንዳዪቴ? አያዉ ሳ፡ ደናይ ዋዛና ግድን ኩሜዳዋ ሃሳዬ።

35 ሎኦ አሳይ ባረ ሎኦ ምንጂዋ፡ ሎኦባ ከሴ፤ ቃይ ኢታ አሳይ ባረ ኢታ ምንጂዋ፡ ኢታባ ከሴ።

36 ታን ህንተንቶ ኦዳይ፤ አሳይ ባረ ሃሳዬዳ ማደና ሃሳያ ኡባዉ ፕርዳ ጋላስ ዛሩዋ እማናዋ።

37 አያዉ ሳ፡ ነ ሃሳያይ ኔና ጽልሳና፤ ዋይ ነ ሃሳያይ ነ ቦላ ፕርድሳና” ያጌዳ።

ማላታ በእናዉ ሺቄዳ ኦሻ (ማር. 8:11-12፤ ሉቃሳ 11:29-32)

38 ሄዋ፡ ጉይያን፡ ህግያ ታማርሰያ እት እት አሳይነ ፓርሳዋቱ ዛሪደ የሱሳ፡ “ታማርሰያዎ፡ ኔን ማላታ ኦሻሽን፡ ኔን በእናዉ ኮዬቶ” ያጌድና።

39 ሽን እ ዛሪደ፡ ኡንቱንቶ ሀዋዳን ያጌዳ፤ “ሀ ዋድያ አሳይ ኢታነ ጸሳ አማነና ድራዉ፡ ማላታ ኮዬ፤ ናብያ ዮናሳ ማላታ፡ እትን፡ ሀራ ማላታይ እመተና።

40 ዮናሰ ዋጋ ሞልያ ኡሉዋን ሄዙ ጋላሳነ ሄዙ ቃማ ደኤዳዋዳን፡ አሳ ናኦይካ፡ ቢታ ግድን ሄዙ ጋላሳነ ሄዙ ቃማ ደእናዋ።

41 ነዌ አሳይ ዮናሰ ኦዳዳዋን ባረንቱ ናጋራ፡ ሰሜዳ ድራዉ፡ ፕርዳ ጋላስ ደንዲደ፡ ህንተንታ ሞታናዋንታ፤ በይተ፡ ዮናሳ፡ አድያዌ ሀዋን ደኤ።

42 ዲገ ባጋ ጋድያ ካታታ ሶሎሞነዉ ደእያ አዶ ኤራተሳ ሰሳናዉ ሳኦ ጋጸ፡ ዬዳ ድራዉ፡ ፕርዳ ጋላስ ደንዲደ፡ ህንተንታ ሞታናዉኤ፤ በይተ፡ ሶሎሞነ፡ አድያዌ ሀዋን ደኤ።

12:42 1 ካታ. 10:1-10፤ 2 ኦዲዋ 9:1-12

ኢታ ኢየሩሳሌም አሳ ጋርሳ ሰሚደ ገልጻዋ
(ሉቃሳ 11:24-26)

43 “ኢታ ኢየሩሳሌም አሳጥ ከሴዳ ዋደ፡ ባረወ ሸምጥያ ሳ ኮዪደ፡ ሃላይ ባይና መላሳና ዩዩ፤ ሽን ደመና።

44 ሄ ዋደ፡ ታን አጋደ ዬዳ ታ ጎለ ሰማና’ ያጌ፤ ሰሚደ ይያ ዋደ፡ ጎሊ መላ ደእያዋን ፕተት ጌዪደ፡ ገግ ኡቴዳዋ ደሜ።

45 ሄዋፕ ጉይያን፡ ቢደ ባረፕ ኢትያ ላፑ ሀራ ኢየሩሳሌም አኪደ ዩ፤ ሄ ኢየሩሳሌም ገሊደ፡ ሄዋን ደኢና። ሄ ብታንያ ደኡ ካሰዋፕ ዳሪ ኢቴ። ሀ ዋድያ ኢታ አሳወካ ቃይ ሄዋዳን ሀናና” ያጌዳ።

የሱሳ ዳዮን አ እሻቱዋ
(ማር. 3:31-35፤ ሉቃሳ 8:19-21)

46 የሱሳ ዳር አሳወ ሃሳይሽን፡ አ ዳያን አ እሻቱ አናና ሃሳያናወ ኮዪደ፡ ካረን ኤቄድና።

47 ሄዋን ደእያ አሳጥ እቱ አ፡ “ሳ ዳያን ነ እሻቱ ኔናና ሃሳያናወ ኮዪደ፡ ካረን ኤቄድና” ያጌዳ። †

48 ሽን የሱሳ ዛሪደ፡ “ታ ዳያ ኦኔ? ታ እሻቱ ኦኔ?” ያጌዳ።

49 ባረ ኩሽያን ባረና ካልያዋንቱኮ ጸርሲደ፡ “ቢይተ፡ ታ ዳያን ታ እሻቱ ሀዋንቱሽ።

50 እያወ ጎፕ፡ ሳሉዋን ደእያ ታ አቡ ሽንያ ኦልያ ኡባይ፡ ታ እሻ፡ ታ ሞቻቶን ታ ዳዮ” ያጌዳ።

13

ዘርያዋ ሊሞሱዋ
(ማር. 4:1-9፤ ሉቃሳ 8:4-8)

1 የሱሳ ሄ ጋላሰ ሶይፕ ከሲደ፡ አባ ጋጸን ኡቴዳ።

2 ዳር ጮራ አሳይ ባረ ዩሹዋን ዩይ አጂደ ሽቅና፡ ዋንግርያ ግዶ ገሊደ ኡቴዳ፤ አሳይ ኡባይ አባ ጋጸን ኤቄዳ።

3 አሳወ ሊሞሱዋን ዳርባ ሀዋዳን ያጌደ ኦዴዳ፤ “እት ብታኒ ዘረሳ ዘራናወ ከሴዳ።

4 እ ዘርሽን፡ እት እት ዘረሳይ ኦግያ ዶናን ዋዴዳ፤ ያትና ካፋ ዪደ ሜዳ።

5 ቃይ እት እት ዘረሳይ እንጮ ግዴዳ ቢታ ቦላ ዋዴዳ፤ ዳር ቢታይ ባይና ድራወ፡ ሄ ዘረሳይ ኤለካ ደሌዳ።

† 12:47 እት እት ጌሻ ማጻፋ ብለላን ሀ ፓይዱ ባዋ።

6 ሽን አዋይ ከሱዳ ዋደ ጫርሻይ ሹሌዳ፤ አዲሳ ጸጹዋ ድብና ድራጫ መል አጌዳ።

7 እት እት ዘረላይ አጉንላ ግደን ዋዴዳ፤ ሄዋን ደሌዳዋ አጉንላይ ድጨደ ጨሌዳ።

8 እት እት ዘረላይ ቱኤ ቢታን ዋዲደ ደሌዳ፤ እቱ ጾቱ አይፍያ፡ እቱ ኡሱፑን ታሙዋ፡ እቱ ሀታሙዋ አይፈፈዳ።

9 ሰሰያ ሀይላይ ደእያ ኡራይ ሰሶ!” ያጌዳ።

የሱስ ሌምሱዋን ኦዶ ጋሱዋ
(ማር. 4:10-12፤ ሉቃሳ 8:9-10)

10 የሱሳ ካልያዋንቱ አኮ ሸቂደ፡ “ኔን አያዉ አሳዉ ሌምሱዋን ኦዳይ?” ያጌድኖ።

11 የሱስ ዛሪደ፡ ኡንቱንቶ ሀዋዳን ያጌዳ፤ “ሀንተንቶ ሳሉዋ ካዉተላ ጹራ ኤሩሳይ እመቲዳ፤ ሽን ኡንቱንቶ እመትቤና።

12 አያዉ ጎፕ፡ ደእያዋ ጉጀታና፤ አዉ ዳራናዋ፤ ሽን ባይናዋፕ ሀራይ አቶ፡ ሄ ደእያዋካ አከታናዋ።

13 ታን ኡንቱንቱ ጸሊደ ጸለናዋዳን፡ ሰሲደ ሰሰናዋዳን ሀንያ ድራጫ፡ ዋይ ቃይ አኬከና ድራጫ ኡንቱንቶ ሌምሱዋን ኦዳይ።

14 “አሰያሰ ኡንቱንቱባ ሀዋዳን ኦዶዌ ፖለታናዋ፤

“ ሀንተንቱ ሰሳ ሰሳና፤

ሽን ሀንተንቶ ገለና፤

ሀንተንቱ ጸላ ጸላና፤

ሽን በእክታ።

15 አያዉ ጎፕ፡ ሀ አሳ ዋዛናይ ጉዙሜዳ፤

ባረንቱ ሀይላ ቱልሴድኖ፤

ባረንቱ አይፍያካ ጨሉሜድኖ።

ሀዌ ባዌንቶ፡ ኡንቱንቱ ባረንቱ አይፍያን በእና፤

ባረንቱ ሀይላን ሰሳና፤

ባረንቱ ዋዛናንካ አኬካና፤

ኡንቱንቱ ታኮ፡ ጸሳኮ ሰማና፤

ታንካ ኡንቱንታ ፓላና

ያጌ።

16 “ሽን ሀንተንቱ አይፊ ጸልያ ድራዉን ሀንተንቱ ሀይላይካ ሰሰያ ድራጫ፡ ሀንተንቱ አንጀቲዳዋንታ።

17 ታን ሀንተንቶ ቱሙዋ ኦዳይ፤ ዳር ናባቱን ጽላቱ ሀንተንቱ በእያዋ በእናዉ አሞቲድኖ፤ ሽን በእበይክኖ። ሀንተንቱ ሰሰያዋ ሰሳናዉ አሞቲድኖ፤ ሽን ሰሰበይክኖ።

የሱስ ዘርያዋ ሌምሱዋ ብለላ ኦዴዳ
(ማር. 4:13-20፤ ሉቃሳ 8:11-15)

- 18 “ስም ካላ ዘርያዋ ሌምሱዋ ብለላይ ግያዋ ሰሰተ።
- 19 ካወተላ ቃላ ሰሲደ፡ እኬከና ኦንነ ኦግያ ደናን ዎጴዳ ዘርላ ማላ፤ ጸላህያ ካቸ ዪደ፡ ኡንቱንቱ ዎዛናን ዘርቲዳዎ ማጽ ድጌ።
- 20 እንጮ ቢታን ዎጴዳ ዘርላይ ቃላ ሰሲደ፡ ኤለካ ናሽቻን አክያዋንታ ማላቲ።
- 21 ሽን ሄ አሳቱ ሀአሳፕ አትን፡ ኡንቱንቱን ጸጹ ባዋ፤ ቃላ ጋሱዋን መቱ ዎይ የደሳይ ይያ ዎደ፡ ኤለካ ጹብት አጊኖ።
- 22 ቃይ አጉንላ ግደን ዎጴዳዌ ቃላ ሰሰያዎ በሴ፤ ሽን ሀ ሳኣ ደኦ ሀርጉሳይነ ዲረተላ ሲቁሳይ ቃላ ጨሌ፤ ሀ ጋሱዋን ሄ ዘርላይካ አይፈናን አት አጌ።
- 23 ቱኤ ቢታን ዘርቲዳዌ፡ ቃላ ሰሲደ፡ እኬክያ አሳ በሴ፤ እካ አይፊ፤ እቱ ጶቱዋ፡ እቱ ኡሱፕን ታሙዋ፡ እቱ ሀታሙዋ አይፊ” ያጌዳ።

ዛርንግያ ሌምሱዋ

- 24 የሱስ ኡንቱንቶ ሀራ ሌምሱዋ ሀዋዲን ያጊደ ኦዴዳ፤ “ሳሉዋ ካወተላይ ባረ ጎሻን ሎኦ ዘርላ ዘራዳ ብታንያ ማላቲ።
- 25 ሽን ቃማ አሳይ ገምእሽድግና፡ እ ሞርኪ ዪደ፡ ዛርጋ ዘራዳዎ ቦላ ዛርንግያ ዘራደ ቤዳ።
- 26 ሽን ዛርጋይ ዶል አይፊዳ ዎደ፡ ዛርንጊ ሄ ዎደ ቤቲዳ።
- 27 “እ ቆማቱ እኮ ዪደ፡ ኅዳወ፡ ኔን ነ ጎሻን ሎኦ ዘርላ ዘራቢይኪ? ያትና፡ ዛርንጊ ሀቃፕ ዬዳ?” ያጌድኖ።
- 28 “ሄዋፕ ጉይያን ጎዳይ፡ ሄዋ ሞርኪ ኦሌዳ” ያጌድኖ።
ቆማቱ፡ ኅን ቢደ ሾዳናዳን ደሳይ?” ያጌድኖ።
- 29 “ሽን እ፡ ኅግተ፡ ዛርንግያ ሀንተንቱ ሾዲደ፡ ዛርጋና ሾዳንታ።
- 30 ቦቾፕተ፤ ቆይጭያ ዎዲ ጋካናወ፡ እትፕ ድጭኖ። ቆይጭያ ዎዲ ጋኮደ፡ ታን ቆይጭያዋንታ፡ ካሰቲደ ዛርንግያ ማጽተ፤ ታማን ጉዳናወ ፖቾያን ፖቾያን ቃቾተ፤ ሽን ዛርጋ ሺሺደ ድይያን ቆልተ” ጋና” ያጌዳ።

ሳናፍጭያ ጌተትያ ሞላት ዘርላ ሌምሱዋ
(ማር. 4:30-32፤ ሉቃሳ 13:18-19)

- 31 የሱስ ኡንቱንቶ ሀራ ሌምሱዋ ያጊደ ኦዴዳ፤ “ሳሉዋ ካወተላይ ሳናፍጭያ ጌተትያ ጉላ ሞላት አይፍያ ማላቲ፤ ሄ ሞላት አይፍያ አሳይ አኪደ፡ ባረ ጎሻን ዘራዳ።

32 ሄ ዘረላታ ሀራ ዘረላ ኡባጥ ጉጸው፤ ሸን ድጩዳ ዋደ፤ ሀራ ኢታክልትያ ኡባጥ ዳራው፤ ካፋ ዪደ፤ እዝ ቃንካን ኬጸያዎ ኬና ዋጋ ምላ ግዳዲ” ያጌዳ።

እርሹዋ ሌምሱዋ
(ሉቃሳ 13:20-21)

33 ቃይ የሱስ ሀራ ሌምሱዋ ኡንቱንቶ ያጊደ ኦዴዳ፤ “ሳሉዋ ካውተላይ እት ምሽራታ ሄዙ ከርያ ጲልያ አካደ፤ ሙናቄዳ ሙናቃይ ኡባይ ደንዳና ጋካናው፤ እን ትጌዳ እርሹዋ ማላቱ” ያጌዳ።

የሱስ ሌምሱዋን ታማርሴዳ ጋሱዋ
(ማር. 4:33-34)

34-35 የሱስ አሳው ሄ ኡባ ሌምሱዋን ኦዴዳ፤ ሌምሱ ባይናን እ እትባካ ኦደና፤ ናቢ፤ “ታን ኡንቱንቶ ሃሳይያ ዋደ፤ ሌምሱዋን ሃሳያይ። አላሚ መፍታደጥ ደሚደ ጌሜዳ የዋቱዋ ኦደይ” ያጌዳዌ ፖለታና ማላ፤ ሄዋ እ ኦዴዳ።

የሱስ ዛርንግያ ሌምሱዋ ብለላ ኦዴዳ

36 ሄዋጥ ጉይያን፤ የሱስ አሳ አጊደ፤ ሶይ ገሌዳ፤ አ ካልያዋንቱ አኮ ቢደ፤ “ኅሻን ደእያ ዛርንግያ ሌምሱዋ ብለላ ኦው ኦዳ” ያጌድኖ።

37 የሱስ ዛሪደ፤ ሀዋዳን ያጌዳ፤ “ሎኦ ዘረላ ዘርያዌ አሳ ናኣ፤

38 ኅሻይ ሀ አላምያ፤ ሎኦ ዘረላይ ጸሳ ካውተላ አሳ፤ ዛርንጊ ጸላህያ ካፑዋ ናና።

39 ዛርንግያ ዘሪዳዌ ሞርክያ ጸላህያ፤ ቆይቻ ዋዳ፤ ዋድያ ወርሰላ፤ ቃይ ቆይጭያዋንቱ ኪታንቻቱዋ።

40 “ሄዋ ድራው፤ ዛርንግያ ማጺደ፤ ታማን ጉድያዋዳን፤ ዋድያ ወርሰላን ሄዋ ማላ ግዳናዋ።

41 አሳ ናኣይ፤ ኪታንቻቱዋ ኪታናዋ፤ ኡንቱንቱ አ ካውተላ ግድን ናጋራው ጋሶ ግድያ ኡባቱዋን ኢታባ ኦልያዋንታ ማጺደ ከሳናዋንታ።

42 ያቲደ ቶኤና ታማን ኦላናዋንታ፤ ሄዋን ኡንቱንቱ ዬካናዋንታን አቻ ጳቃናዋንታ።

43 ሄ ዎደ ጽላቱ ባረንቱ አቡ ካውተላን አዋዳን ፖኦና። ሰሰያ ሀይላይ ደእያ ኡራይ ሰሶ!

ሞገቲዳ ሚሻ ሌምሱዋ

44 “ሳሉዋ ካውተላይ ጎሻን ሞገቲዳ ሚሻ በሴ፤ እት ብታኒ ሄ ሚሻ ደሚደ። ዛሪደ ሞግ አጌዳ፤ ዳሮ ናሽቲደ ቢደ። ባረዉ ደእያዋ ኡባ ዛልኢደ። ሄ ጎሻ ሻሜዳ።

እንቁዋ ጌተትያ ዳሮ አልኦ ሹቻ ሌምሱዋ

45 “ቃይ ሳሉዋ ካውተላይ እንቁዋ ጌተትያ ዳሮ አልኦ ሹቻ ሻማናዉ ኮይያ ዛልኦንቻ ማላቲ።

46 ሄ ዛልኦንቻይ ዳሮ አልኦ እንቁዋ ደሚደ። ቢደ ባረዉ ደእያዋ ኡባ ዛልኢደ። አ ሻሜዳ።

ዳባ ሌምሱዋ

47 “ቃይ ሳሉዋ ካውተላይ ኡባ ቆሞ ሞልያ ኦይቂያ። አባን የገቲዳ ዳባ ማላቲ።

48 ሞሊ ዳባ ኩሜዳ ዎደ። ሞልያ ኦይቂያ አሳቱ አባፕ ጋጸ ከሲደ ኡቴድኖ፤ ያቲደ ሎኦ ሞልያ ቆሪደ። የግያ ሚሻን የጌድኖ፤ ሸን ኢታ ሞልያ ዎራ ኦሌድኖ።

49 ዎድያ ዉርሰላን ሄዎዳን ሀናና፤ ኪታንቻቱ ዪደ። ናጋራንቻቱዋ ጽላቲዋ ግደፕ ቆሪደ።

50 ቶኤና ታማን ኦላናዋንታ፤ ሄዎን ኡንቱንቱ ዩካናዋንታን አቻ ቋቃናዋንታ።

51 “ሀዌ ኡባይ ሀንተንቶ ገሌዴ?” ያጊደ ኡንቱንታ ኦቼዳ። ኡንቱንቱ። “ኤ” ያጌድኖ።

52 እ። “ሄዎ ድራዉ። ሳሉዋ ካውተላ ጸራ ሎይሳ ኤርያ። ሀግያ ታማርሰያ ኡባይ። ባረ ሚሻ ሺሽ ዎጴዳ ጎልያፕ ኦራላ ሚሻን ኤጫ ሚሻ ሻክ ከሰያ እዛዋ ማላቲ” ያግ ዛሬዳ።

ናዝሬተን የሱሳ ጋኬዳ እጸዋ (ማር. 6:1-6፤ ሉቃሳ 4:16-30)

53 የሱሰ ሀ ሌምሳቱዋ ኦድ ዉርሶዋፕ ጉይያን። ሄዋፕ ደንዲደ።

54 ባረ ካታማ ናዝሬተ ቤዳ። አይሁዳ ዎሳ ጎለን ታማርሰያዋ ሰሴዳ አሳይ ማላለቲደ። ሀዎዳን ያጌዳ፤ “ሀዌ ሀ አጵ ኤራተላን ጸሳይ ኦልያ ማላታ ኦላናዉ ዎልቃ ሀቃፕ አኬዴ?

55 ሀዌ አናጽያ ናኦ ግደኔ? አ ዳያ ማይራዎ ግደኬ? አ እሻቱ ያቆባ። የሴፎ። ሰሞናን ይሁዳ ግድክኖ?

56 እ ምቻቱ ኡባይ ኑናና ደእክኖ? ያትና፡ እ ሀ ኤራ ኡባ ሀቃፕ ደሜዴ?” ያጌድኖ።

57 ኡንቱንቱ እ ግያባ አከናን እጾድኖ።

ሽን የሱስ ሄ አሳወ፡ “ናቢ ባረ ጋድያንነ ባረ ሶይ አሳን ቦንቹተና፤ ሽን ሀራሳ ኡባን ቦንቹቱ” ያጌድኖ።

58 ኡንቱንቱ አማንቤና ድራወ፡ የሱስ ዳሮ ማላታ ሄ ሳን አለቤና።

14

ጸማቅያ የሃንሳ ሀይቁዋ

(ማር. 6:14-29፤ ሉቃሳ 9:7-9)

1 ሄ ዋደ ጋሊላ ጋድያ አይስያ ሄሮድስ የሱሳባ ሰሴዳ፤

2 ያቲደ ባረ ቆማቶ፡ “ሀዌ ሀይቁዋፕ ደንዴዳ ጸማቅያ የሃንሳ፤ ጸሳይ ኦልያ ዋልቃማ ማላታ እ ኦልያዌ ሄዋሳ” ያጌድኖ።

3 አያወ ጎፕ፡ ሄሮድስ ባረ እሻ ፕልጶሳ ማቻት ሄሮድያድ ጋሶታን የሃንሳ ኦይል ቃሽሲደ፡ ቃሾ ጎለን የግ ዋሴዳ።

4 አያወ ጎፕ፡ የሃንሰ ሄሮድሳ፡ “ኔን ሄሮድያድ፡ ነ እሻ ማቻቶ አካናወ ሀጊ ድጌ” ያጌድኖ።

5 ሄሮድስ የሃንሳ ዋቆናወ ኮዬዳ፤ ሽን ይሁዳ አሳይ ናብያዳን የሃንሳ ጾሌዳ ድራወ፡ አሳወ ያዬዳ።

6 ሽን ሄሮድስ የለቴዳ ጋላሳ ባላይ ጋክና፡ ሄሮድያድ ናታ አሳ ሰንላን ዱራደ ሄሮድሳ ናሽቻወ።

7 ሄሮድስ ናቶ፡ “ኔና ሎኤዳዋ አያነ ግደፕ፡ ታና ኦቻ፤ ታን ነወ እማና” ያጊደ እዝወ ጫቄዳ።

8 ናታ ባረ ዳይ ዘርያ አካደ ሄሮድሳ፡ “ጸማቅያ የሃንሳ ሀጲያ ሀ ዋጪትያን ዋላደ ታወ እማ” ያጋዱ።

9 ካቲ አወ ቃረቴዳ፤ ሽን ባረ ጫቁዋ ድራወነ ባረናና ማዳን ኡቴዳ እማሳ ድራወ፡ እዝወ የሃንሳ ሀጲ እመታና ማላ አዛዜዳ።

10 ካቲ ከቲደ፡ የሃንሳ ቆጵያ ቃሾ ጎለን ሙጭሴዳ።

11 ሀጲያ ዋጪትያን ዋል አሂደ፡ ናትወ እማድኖ፤ ናታ ሄ ሀጲያ ባረ አትኮ አፋዱ።

12 የሃንሳ ካልያዋንቱ ዪደ፡ አ አሃ አፊደ ሞጌድኖ፤ ሄዋፕ ሰሚደ ሀ የወዋ የሱሳወ ቢደ ኦዴድኖ።

የሱስ እቼሹ ሻእ አሳ ሞዜዳ

(ማር. 6:30-44፤ ሉቃሳ 9:10-17፤ የሃ. 6:1-14)

13 የሱስ ሄዋ ሰሲደ፣ ዋንግርያን ገሊደ፣ ሄዋጥ ባረካ አሳይ ባይናሳ ቤዳ፤ አሳይ ሄዋ ሰሲደ፣ ካታማጥ ደንዲደ፣ ገድያን ኦ ካሌድኖ።

14 የሱስ ዋንግርያጥ ከሴዳ ዋደ፣ ዳር አሳ በኢደ፣ ሄ አሳዉ ቃረቱዳ፤ ያቲደ ኡንቱንቱና ደእያ ሀርጋንታቱዋ ፓሌዳ።

15 ሳአይ ኦማርሰያ ዋደ፣ የሱሳ ካልያዋንቱ እኮ ዪደ፣ “ሀዌ ሳአይ አሳይ ባይናሳ፤ ሀእ ሳአይ ቃም ድጌዳ፤ አሳይ ኡባይ ቁር ካታማቱዋ ቢደ፣ ባረንቶ ቁማ ሻማና ማላ፣ አሳ ሞይዛ” ያጌድኖ።

16 ሸን የሱስ ኡንቱንታ፣ “አሳይ ባናዉ ኮሸና፤ አሳዉ ሜተትያባ ሀንተንቱ እምተ” ያጌዳ።

17 ኡንቱንቱ ዛሪደ እ፣ “ኑዉ ሀዋን እቼሹ ኡክፋጥነ ላኡ ሞልያጥ እትን፣ ሀራይ ባዋ” ያጌድኖ።

18 የሱስ ኡንቱንታ፣ “ሄዋንታ፣ ሃ ታኮ አሀተ” ያጌዳ።

19 አሳይ ማታን ኡታና ማላ፣ የሱስ አዛዜዳ፤ እቼሹ ኡክፋነ ላኡ ሞልያ ኦይቂደ፣ ሳሉዋ ፑደ ጸሊደ፣ ጸሳ ጋላቲዳ፤ ሄ ኡክፋ መንሊደ፣ ባረና ካልያዋንቶ እምና፣ ኡንቱንቱ ጮራ አሳዉ ግሼድኖ።

20 አሳይ ኡባይ ሚደ ካሌዳ፤ አቲዳ ሱፓ ዶካ ታማነ ላኡ ዛምቤልያ ኩሜዳዋ ደንሊድኖ።

21 ሜዳ አሳይ ማጫ አሳነ ናና ፓይደናን፣ እቼሹ ሻእ ግድያዋ ከና።

የሱስ አባ ቦላና ሀመቲደ ቤዳ
(ማር. 6:45-52፤ ዮሃ. 6:15-21)

22 የሱስ ጮራ አሳ ሞይዚደ፣ ባረና ካልያዋንታ ዋንግርያን ገሊደ፣ ባረጥ ሰንፋቲደ፣ አባጥ ሄፍንፋ ፕናና ማላ አዛዜዳ።

23 አሳ ሞይዚደ፣ ጸሳ ዋሳናዉ ደርያ ሁጲያ ባረካ ከሴዳ፤ ሳአይ ቃም ድግናካ ሄዋን ባረካ ደኤ።

24 ሸን ዋንግሪ ሄ ዋደ፣ አባ ቦላን ደእሸን፣ ሰንፋ ባጋና ጫርኩ ጫርክያ ድራዉ፣ ቤታይ ዋንግርያ ያነ ሃነ ሱጌ።

25 ባይራ ኩቱ ዋሰ ሰምና፣ የሱስ አባ ቦላ ሀመቲደ፣ ኡንቱንቱኮ ዬዳ።

26 አ ካልያዋንቱ አባ ቦላ እ ሀመትሸን በእ ዳጋሚደ፣ “ሀዌ ሞይትልያ ግደኔ!” ግ ያዪደ ዋሴድኖ።

27 ሸን የሱስ ኤለካ ኡንቱንታ፣ “አይነ ባዋ፤ ታናተ፤ ያዮፕተ!” ያጌዳ።

28 ጳጵርሰ ዛሪደ እ፣ “ታ ጎዳዉ፣ ሀዌ ኔና ግደጥ፣ ታን ሃፋ ቦላና ኔኮ ባና ማላ፣ ታና አዛዛርኪ” ያጌዳ።

29 የሱስ ጳጳርሳ፡ “ሃያ!” ያጌዳ።
ጳጳርሱ ዋንግርያጥ ዋጂደ፡ ሃላ ቦላና ሀመቲደ፡ የሱሳኮ ቡሳ ደሜዳ።

30 ሸን ጫርኩዋ ዋልቃ በኢደ፡ ያዬዳ፤ ሃላይ ባረና ሞቱዋ ደሜዳ ዋደ፡ ባረ ኮሻ ጶቁ ኦሊደ፡ “ታ ጎዳዉ ታና እሻርኪ!” ያግ ዋሴዳ።

31 ሄ ማንእያን የሱስ ባረ ኩሽያ የድ ጳጳርሳ ኦይቂደ፡ “ላ ሀ አማኑ ላፌዳዎ! አያዉ ሰጃዲ?” ያጌዳ።

32 ኡንቱንቱ ላኡ ዋንግርያን ገሌዳ ዋደ፡ ጫርኩ ዋፑ ጌዳ።

33 ዋንግርያ ግድን ደእያ አ ካልያዋንቱ የሱሳ፡ “ኔን ጸሳ ናአ ግዴዳዌ ቱማ” ያጊደ አዉ ጎይኔድኖ።

የሱስ ገንሳሬጸን ሀርጋንቻ ፓሌዳ
(ማር. 6:53-56)

34 ኡንቱንቱ አባ ፕኒደ፡ ገንሳሬጸ ጌተትያ ጋድያ ጋኬድኖ።

35 ሄ ጋድያ አሳይ የሱሳ ግድያዋ ኤሬድኖ፤ ሄዋ ሄራ ጋድያ ኡባ ከቲደ፡ ሀርግያ አሳ ኡባ አኮ አሄድኖ።

36 ሀርግያ አሳይ አ ማዩዋ ማጫራ ጸላላ ቦቻና ማላ፡ አ ዋሴድኖ፤ አ ማዩዋ ማጫራ ቦቹዳ ኡባይካ ፓጶዳ።

15

አዎቱዋ ዋጋባ
(ማር. 7:1-13)

1 ሄዋፕ ጉይያን፡ ሀግያ ታማርሰያ እት እት አሳይነ ፓርሳዋቱ የሩሳላመፕ የሱሳኮ ዪደ፡

2 “ኔና ካልያዋንቱ አያዉ ኑ አዎቱዋ ዋጋ ባይዚኖ? አያዉ ጎፕ፡ ኡንቱንቱ ቁማ ማናፕ ካሰቲደ፡ ባረንቱ ኩሽያ ሜጨትክኖ” ያጌድኖ።

3 የሱስ ዛሪደ፡ ኡንቱንታ ሀዋዳን ያጌዳ፤ “ሀንተንቱ ሀንተ ዋጋ ድራዉ፡ ጸሳ አዛዙዋ ፖልያዋ አያዉ እጹቱ?”

4 አያዉ ጎፕ ጸሳይ፡ ኅ አባነ ነ ዳዮ ቦንቻ፣ ቃይ፡ ባረ አባ ዋይ ባረ ዳዮ ቦርያዌ ሀይቆ ያጌዳ።

5-6 ሸን ሀንተንቱ፡ ኣት አሳይ ባረ አባ ዋይ ባረ ዳዮ ማድያባይ ባረዉ ደኢና፡ ሄዌ ጸሳዋ ጎፕ፡ ባረ አባ ዋይ ባረ ዳዮ ቦንቻናዉ በሰና፣ ያጊታ፤ ያቲደ ሀንተንቱ ሀንተንቱ ዋጋ ፖላናዉ ጸሳ ቃላዉ አዛዘትክታ።

15:4 ከሳ 20:12፤ 21:17፤ ዛረ. 5:16፤ ዋጋ 20:9

7 ሀ ሎኦ ማላትያ ኢታ አሳቶ፣ እስያስ ባለናን ህንተንቱባወ ትምቢትያ ኦዲደ።

8 “ ጸሳይ ሀዋዳን ያጌዳ፤

“ሀዌ አሳይ ታና።

ባረ ቦላ ዶናን ቦንቹ፤

ሽን ኡንቱንቱ ዎዛናይ።

ታፕ ሃኩዋን ደኤ።

9 አሳይ ታዉ መላ ጎይኔ፤

እያዉ ጎፕ፣ አሳይ ኦፊዳ አዛዙዋ።

ጸሳ ህግያ ማላትሲደ።

ታማርሴድኖ” ጌዳ ”

ያጌዳ።

አሳ ቱንሰያዋንታ

(ማር. 7:14-23)

10 የሱስ ዳር አሳ ባረኮ ጾሲደ፣ “ሰሰተነ አኬክተ፤

11 አሳ ቱንሰያዌ ዶና ግዶ ገልያዎ ግደና፤ ሽን አሳ ቱንሰያዌ ዶናፕ ከሰያዎ” ያጌዳ።

12 ሄዋፕ ጉይያን፣ አ ካልያዋንቱ አኮ ዪደ፣ “ፓርሳዋቱ ኔን ሃሳዬዳዎ ሰሲደ፣ ህንቀቱዳዎ አኬካይ?” ያጌድኖ።

13 ሽን የሱስ ዛሪደ፣ “ሳሉዋን ደእያ ታ አቡ ቶክቤና ምላ ኡባይ ሾደታናዎ።

14 ኡንቱንቶ ህርጎፕተ፤ ኡንቱንቱ ቆቃ ካለልያ ቆቃቱዋ፤ ቆቃይ ቆቃ ካለሉ፣ ላኡካ ኦላን ኩንዳ” ያጌዳ።

15 ጳጵሮስ ዛሪደ፣ “ሀ ሌምሱዋ ብለላ ኦዉ ኦዳርኪ” ያጌዳ።

16 የሱስ ኡንቱንታ ሀዋዳን ያጌዳ፤ “ህንተንቶ ቃይ ሀእ ጋካናዉካ ገልቤኔ?

17 ዶናና ገልያ ኡባይ ኡሉዋ ግዶ ቢደ፣ ቃይ ኡሉዋፕ ካረ ከሰያዎ ኤርክቴ?

18 ሽን ዶናፕ ከሰያዌ ዎዛናፕ ከሴ፤ አሳ ቱንሰያዌ ሄዋ ማላ።

19 እያዉ ጎፕ፣ ዎዛና ግዶፕ ኢታ ቆፋይ፣ ዎድያዌ፣ ዎሹምያዌ፣ ቃይ ዎሹማናዉ ካጄልያዌ ኡባይ፣ ዉእያዌ፣ ዎርዲዋን ማርካትያዌ፣ ቦሪ ከሴ።

20 ሄዋ ማላትያዌ አሳ ቱንሰያዋፕ አትን፣ ሜጭቤና ኩሽያን ምያዌ አሳ ቱንሰና” ያጌዳ።

ካናን አሳ ግዴዳ እት ማጫወን አማኑዋ
(ማር. 7:24-30)

21 ሄዋጥ ጉይያን፣ የሱስ ሄዋጥ አጊደ፣ ጊሮሳነ ሲደና ጌተትያ ካታማቱ ደእያ ጋድያ ቤዳ።

22 ካናን ጌተትያ ጋድያ ማጫወና እትና ሄዋጥ የሱሳኮ ያደ፣ ባረ ኮሻ ጶቁ ኦላደ፣ “ታ ጎዳወ፣ ዳዊታ ናአወ፣ ታወ ቃረታርኪ፤ ታ ናቶ ኢታ አያናይ ሎኤና ኦይላ ኦይቄዳ” ያገዱ።

23 ሸን የሱስ እዝወ አይ ቃላነ ቃትቤና፤ አ ካልያዋንቱ አኮ ዪደ፣ “ሀ ሞሽራታ ኑ ጌዱዋ ካላ ካላደ፣ ባረ ኮሻ ጶቁ ኦላደ ኦዳወ፤ ሄዋ ድራወ፣ ኔን እዘ የዳርኪ” ያጊደ ዋሴድኖ።

24 የሱስ ዛሪደ፣ “ታን ባዬዳ ደርሳወ፣ እሰራኤልያ አሳ ጸላላወ ከተታድ” ያጌዱ።

25 ሸን እዛ ያደ፣ “ታ ጎዳወ፣ ታና ማዳርኪ!” ያጋደ እወ ጎይናዱ።

26 ቃይ እ ዛሪደ፣ “ናና ቁማ አኪደ፣ ካና ማራወ ኦልያዌ ሎአ ግደና” ያጌዱ።

27 ሞሽራታ፣ “ኤ ታ ጎዳወ፣ ሄዌ ቱማ፤ ሸን ሀራይ አቶ ካና ማራቱ ባረንቱ ጎዳቱ ሚና፣ ሳምፓፕ ላለቱዳ ሱፓ ሚኖተኔ” ያገዱ።

28 የሱስ ዛሪደ እዘ፣ “ሀ ሞሽራቱ፣ ነ አማኑ ዋልቃማ፤ ኔን ኮዬዳዋዳን ነዉ ሀኖ” ያጌዱ። እዝ ናታ ኤለካ ፓጻ አጋዱ።

የሱስ ጮራ ሀርጋንቻቱዋ ፓሌዳ

29 የሱስ ሄዋጥ ደንዲደ፣ ጋለላ አባ ማታ ቤዳ፤ ቃይ እት ደርያ ቦላ ከሲደ፣ ሄዋን ኡቱዳ።

30 ዳሮ አሳይ ዋባቱዋ፣ ቆቃቱዋ፣ ቁናቱዋን ዲደቱዋ፣ ቃይ ሀራ ጮራቱዋ አኮ አሂደ፣ አ ማታን ዋሌዳ። የሱስ ኡንቱንታ ፓሌዳ።

31 ሄዋ ድራወ፣ አሳይ ዲዳቱ ሃሳይሸን፣ ቁናቱ ሱርሸን ዋባቱ ሀመትሸን፣ ቆቃቱ ጾልሸን በእ ማላለቲደ፣ እሰራኤልያ ጸሳ ጋለቱድኖ።

የሱስ ኦይዱ ሻአ አሳ ሞዜዳ
(ማር. 8:1-10)

32 የሱስ ባረና ካልያዋንታ ባረኮ ጾሲደ፣ “ሀ ጮራ አሳይ ታናና ሄዘ ጋለሳይ ጋካናዉ ጋምኤዳ ድራወ፣ ታን ሀ አሳዉ ቃረታይ፤ ኡንቱንቶ ሀእ ሞያዌ ባዋ። ቃይ ኡንቱንቱ ኡግያን ዳቡሪደ ከንደና ማላ፣ ቁማ ሞዘናን ኡንቱንታ መላ የዳናዉካ ኮይከ” ያጌዱ።

33 እ ካልያዋንቱ ዛሪደ የሱሳ፣ “ኑን ሀ ባዙዋን ሀዋ ኬና አሳ ካልሰያ ቁማ ሀቃፕ ደማኔ?” ያጌድኖ።

34 ቃይ የሱሰ ኡንቱንታ፣ “ሀንተንቶ አፑን ኡክላይ ደኢ?” ያጌደ ኦቹዳ።

ኡንቱንቱ፣ “ላፑ ኡክላይነ ሞለቱዋፕ አማራዳዋንቱ ደኢኖ” ያጌድኖ።

35 የሱሰ አሳ፣ “ሳአን ኡትተ” ያጌዳ።

36 ሄ ላፑ ኡክላነ ሞልያ ኦይቂደ፣ ጸሳ ጋላቲዳ፤ መንግሥታዊ ባረና ካልያዋንቶ አማዳ፤ ቃይ ኡንቱንቱ ጮራ አሳዉ አማድኖ።

37 አሳይ ኡባይ ሚደ ካሌዳ፤ ሚና አቲዳ ላፑ ዛሞቤልያ ኩማዳ ሱፓ እ ካልያዋንቱ ደንጩኖ።

38 ሜዳ አሳይ ማጫ አሳነ ናና ፓይደና፣ ኦይዱ ሻእ አቲማ አሳ።

39 የሱሰ አሳ የዶዋፕ ጉይያን፣ ዋንግርያን ገሊደ፣ መገደነ ጌተትያ ጋድያ ቤዳ።

16

ማላታ በእናዉ ኦቹዳ ኦሻ
(ማር. 8:11-13፤ ሉቃሳ 12:54-56)

1 እት እት ፓርሳዋቱነ ሳዱቃዋናቱ የሱሳኮ ዪደ፣ እ ፓጫናዉ ኮዬድኖ፤ ያቲደ ባረንታ ሳሉዋፕ ማላታ በሳና ማላ ዋሴድኖ።

2 ሸን የሱሰ ዛሪደ፣ ኡንቱንታ ሀዋዳን ያጌዳ፤ “ሳአይ ቃምያ ዋደ ሀንተንቱ፣ ሳሉ ዘኤዳ ድራዉ፣ ሳአይ ሻማናዋ” ያጌታ፤

3 ዋንቱማላን ቃይ፣ ሳሉ ዘኢደ ጉባኔዳ ድራዉ፣ ሀቹ እራይ ቡካናዋ” ያጌታ፤ ሳሉዋ ጸሊደ፣ ሳአይ ሀናናዋ ኤራናዉ ዳንዳይታ፤ ሸን ታ ዩሳ ዋድያ ማላታ ሻክ ኤራናዉ ዳንዳይክቲ?*

4 ሀ ዋድያ አሳይ ኢታይነ ዋሹምያዌ፣ ጸሳዉ አማነተናዌ፣ ማላታ ኮዬ፤ ናብያ ዮናሳ ማላታፕ አትን፣ ሀራ ማላታይ እዉ እመተና” ያጌዳ። ሄዋፕ ሰሚደ፣ ኡንቱንታ አጌደ ቤዳ።

ፓርሳዋቱዋነ ሳዱቃዋናቱዋ እርሹዋ
(ማር. 8:14-21)

5 እ ካልያዋንቱ አባ ፕኔዳ ዋደ፣ ቁማ አፋናዋ ዶጌድኖ።

6 የሱሰ ኡንቱንታ፣ “ፓርሳዋቱዋ እርሹዋፕነ ሳዱቃዋናቱዋ እርሹዋፕ ሀንተንታ ኤሪደ ናገትተ” ያጌዳ።

* 16:3 እት እት ጌሻ ማጻፋ በን ብለላቱዋን የሱሳ ቃላቱ ሀ ፓይዳቱዋን ባዋ።

7 ኡንቱንቱ ባረንቱ ግድን፡ “እ ሀዋ ያግያዌ ኑን ቁማ አህቤና ድራሳ” ያጊደ ሃሳያ ደሜድኖ።

8 ሸን ኡንቱንቱ ግያዋ የሱስ ኤሪደ፡ “ሀ አማኑ ፓጩዳዋንቶ፡ ቁማይ ባይና ድራዉ፡ አያዉ ህንተንቱ ግድን ሃሳዪቱ?

9 ሀእካ ህንተንቶ ገልቤኔ? ታን እቼሹ ኡክላ እቼሹ ሻአ አሳ ምዛደ ካልሴዳዋ፡ ቃይ ህንተንቱ አፑን ዛምቤልያ ኩንሊደ አቴዳ ሱፓ ደንጤድተንቶ ዋዛና አላክቱ?

10 ዋይ ታን ላፑ ኡክላ ኦይዱ ሻአ አሳ ምዛ ካልሴዳዋ፡ ቃይ ህንተንቱ አፑን ዛምቤልያ ኩንሊደ አቴዳ ሱፓ ደንጤድተንቶ ዋዛና አላክቱ?

11 ታን ህንተንታ ፓርሳዋቱዋ እርሹዋፕነ ሳዱቃዋናቱዋ እርሹዋፕ ናገትተ ግያዋፕ አትን፡ ኡክላባ ህንተንቶ ሃሳያቤናዋ ህንተንቱ ዋኒደ አኬክክቱ?” ያጌዳ።

12 አ ካልያዋንቱ የሱስ ባረንቶ ኦዴዳዋ፡ ፓርሳዋቱዋ ትምርትያፕነ ሳዱቃዋናቱዋ ትምርትያፕ ኡንቱንቱ ናገታና ማላ ኦደቶዋፕ አትን፡ ሙናቃን ትግያ እርሹዋፕ ናገታና ማላ ግደናዋ ½ ዋደ አኬኬድኖ።

ጳጵሮሳ አማኑዋን ማርካተላ
(ማር. 8:27-30፤ ሉቃሳ 9:18-21)

13 የሱስ ቁሳርያ ፕሊጶሳ ጌተትያ ጋድያ ጋኬዳ ዋደ፡ ባረና ካልያዋንታ፡ “አሳይ ታና፡ አሳ ናአ ኦና ጊ?” ያጊደ ኦቼዳ።

14 አ ካልያዋንቱ ዛሪደ፡ “ኔና እት እት አሳይ፡ ጸማቅያ ዮሃንሳ ያጌ፤ ሀራንቱ ቃይ ኤላሳ ያጊኖ፤ ቃይ ሀራንቱ ኤርማሳ ዋይ ናባቱዋፕ እቱዋ ያጊኖ” ያጌድኖ።

15 የሱስ ኡንቱንታ፡ “ያትና ህንተንቱ ታና ኦና ጊቱ?” ያጌዳ።

16 ሰሞን ጳጵሮስ ዛሪደ፡ “ኔን ደኡዋ ጶሳ ናአ ክርስቶሳ” ያጌዳ።

17 የሱስ ዛሪደ፡ ሀዋዳን ያጌዳ፤ “ዮና ናአ ሰሞና፡ ሀዋ ነዉ ሳሉዋን ደእያ ታ አቡ ኤርሴዳዋፕ አትን፡ አሳይ ኦንነ ኔና ኤርሰቤና ድራዉ፡ ኔን አንጀቱዳዋ።

18 ጳጵሮሳ፡ ታን ነዉ ኦዳይ፤ ኔን ሹቻ፤ ታን ሀ ዛላ ቦላ ታ ዋሳ ጎልያ ኬጻና፤ ታ ዋሳ ጎልያ ሀራይ አቶ፡ ሰኦልያ ዋልቃይካ ጸናናዉ ዳንዳየና።

19 ታን ነዉ ሳሉዋ ካዉተላ ቁልፕያ እማና፤ ኔን ሳኣን ሀኖ ጎዌ ኡባይ ሳሉዋን ጶሳ ሰንላን ሀናና፤ ሸን ኔን ሳኣን ሀኖፕ ጌዳዌ ሳሉዋንካ ሀነና” ያጌዳ።

20 ሄዋጥ ጉይያን፣ እ ክርስቶሳ ግዴዳዋ አ ካልያዋንቱ ኦሰነ ኦደና ማላ፣ ኡንቱንታ አዛዜዳ።

የሱስ ባረና ጋካና መቼዋባነ ሀይቁዋባ ኮይሮ ኦዲዋ ኦዴዳ (ማር. 8:31-33፤ ሉቃሳ 9:22-27)

21 ሄ ዎድያፕ ደሚደ የሱስ፣ “ታን የሩሳላመ ቢና፣ ታና ጭማቱ፣ ቁሳቱዋ ካፓቱነ ህግያ ታማርሰያዋንቱ ዳሪ ዋይሳናዉ በሴ፤ ኡንቱንቱ ታና ዎቆናዉነ ታን ሄዘንፉ ጋላሰ ሀይቁዋፕ ደንዳናዉ በሴ” ያጊደ፣ ባረና ካልያዋንቶ ጌሺደ ኦዲዋ ደሚዳ።

22 ጳጵሮስ አ እት ባጋ ዛሪደ፣ “ታ ጎዳዉ፣ ጳሳይ ኔና ሄዋጥ አሸ፤ ሀዌ ነ ቦላ ኡባካ ዬና” ያጊደ አ ዘራናዉ ደሚዳ።

23 ሽን የሱስ ጉየ ሰሚደ ጳጵሮሳ፣ “ሀ ሴጻናዉ፣ ኔን ታ ማታፕ ክቻ፤ ኔን አሳይ ደሰያዋ ቆፕያዋፕ አትን፣ ጳሳይ ደሰያዋ ቆፕና ድራዉ፣ ታዉ ቆቦ ግዳዳ” ያጊዳ።

የሱሳ ካላናዉ ኮሽያ ኦግያ (ማር. 8:34—9:1፤ ሉቃሳ 9:23-27)

24 ሄዋጥ ጉይያን፣ የሱስ ባረና ካልያዋንታ ሀዋዳን ያጊዳ፤ “ታና ካላናዉ ኮይያ ኡራይ ደኡፕ፣ ባረና ካደ፤ ያቲደ ባረ ማሰቃልያ ቶኪደ፣ ታና ካሎ።

25 አያዉ ጎፕ፣ ባረ ሸምቸዋ አሻናዉ ኮይያ ኡራይ ባይዛናዋ፤ ሸን ባረ ሸምቸዋ ታ ድራዉ ባይዘያ ኡራይ አሻናዋ።

26 እት ኡራይ ሳኣን ደአያ ኡባባ ባረዉ ሺሺደ፣ ባረ ሸምቸዋ ባይዘፕ፣ አ አያ ማዳኔ? ዎይ እት ኡራይ ባረ ሸምቸዋ ዎዛናዉ አያ እማና ዳንዳዪ?

27 አያዉ ጎፕ፣ ታን፣ አሳ ናአይ፣ ታ አቡ ቦንቹዋን ታ ኪታንቻቱዋና ያና ሀናይ፤ አሳ ኡባዉ ሄ ዎደ አ ኦሱዋ ጋትያ እማና።

28 ታን ሀንተንቶ ቱሙዋ ጋይ፤ አማሬዳ አሳቱ፣ ታን፣ አሳ ናአይ፣ ካትያ ግዳደ ይያዋ በአና ጋካናዉ፣ ሀይቀናዋንቱ ሀዋን ደኢኖ” ያጊዳ።

17

የሱሳ ማላይ ላመቲዳ (ማር. 9:2-13፤ ሉቃሳ 9:28-36)

1 የሱስ ኡሱፑን ጋላሳፕ ጉይያን፣ ባረናና ጳጳሮሳ፣ ያቆባ፣ ያቆባ እሻ የሃንሳ አኪደ፣ ኡንቱንቱ ጳላላ ዋጋ ደርያ ሁጲያ ከሴዳ።

2 ቃይ ኡንቱንቱ ጳልሸን፣ ኡንቱንቱ ሰንፋን ላመቲዳ፤ አ ዳሙ አዋይፍያዳን ፖኤዳ፤ አ ማዩካ ፖኤዋዳን ጳሌዳ።

3 ሙሴነ ኤላስ የሱሳና ሃሳይሸን፣ ሀ ሄዙ አ ካልያዋንቱ በኤድኖ።

4 ጳጳሮስ የሱሳ፣ “ታ ጎዳዉ፣ ኑን ሀዋን ደእያዌ ኑዉ ሎእ፤ ኑን ደሶፕ፣ ኑን ሀዋን ሄዙ ዳሰያ እቱዋ ነዉ፣ እቱዋ ሙሴዉ፣ እቱዋ ኤላሳዉ ኬጳና” ያጌዳ።

5 እ ሃሳይሸን፣ ፖእያ ሻሪ ዪነ ኡንቱንታ ካም አጌዳ፤ ሻርያ ግደፕ፣ “ሀዌ ታን ሲቅያ ታና ናሸቶያ ታ ናኣ፤ እ ግያዋ ሰስተ” ግያ ቃላይ ዬዳ።

6 እ ካልያዋንቱ ሄ ቃላ ሰሴዳ ዋደ፣ ዳሮ ያዪደ፣ ጉፋን አጌድኖ።

7 የሱስ ኡንቱንቱኮ ዪደ፣ ኡንቱንታ ቦቺደ፣ “ደንድተ፤ ያዮፕተ” ያጌዳ።

8 ኡንቱንቱ ቶቁ ጊደ ጳልያ ዋደ፣ የሱሳ ጳላላፕ አትን፣ ሀራ አሳ ኦናነ በእበይክኖ።

9 ኡንቱንቱ ደርያፕ ዋድሸን፣ የሱስ ኡንቱንታ፣ “ታን አሳ ናአይ፣ ሀይቁዋፕ ደንዳና ጋካናዉ፣ ሀ ሀንተንቱ በኤዳዋ ኦስነ ኦድፕተ” ያጊደ አዛዜዳ።

10 አ ካልያዋንቱ የሱሳ፣ “ያትና፣ ሀግያ ታማርሰያዋንቱ አያዉ፣ ኤላስ ካስቲደ ያናዉ በሴ’ ጊኖ?” ያጊደ ኦቼድኖ።

11 እ ዛሪደ ያጌዳ፤ “ኤላስ ካስት ዪደ፣ ኡባባ ጊግሳናዋ።

12 ሸን ታን ሀንተንቶ ኦዳይ፤ ኤላስ ሀዋፕ ካስ ይ ድጌዳ። ሄ ዋደ አሳይ እ፣ ባረንቶ ኮዬዳዋዳን ኡባ ኦፊዳዋፕ አትን አ ኤርበይክኖ፤ ሄዋዳንካ፣ ቃይ ታና፣ አሳ ናኣ፣ አሳይ ዋይሳናዋ” ያጌዳ።

13 እ ካልያዋንቱ ሄ ዋደ ባረንቶ የሱስ ጳማቅያ የሃንሳባ ኦድያዋ አኬኬድኖ።

የሱስ ኢታ አያናይ ኦይቄዳ ናኣ ፓጴዳ
(ማር. 9:14-29፤ ሉቃሳ 9:37-43)

17:1 2 ጳጳ. 1:17-18 17:5 ደመላ 22:2፤ ዛሪ. 18:15፤ ማዘ. 2:7፤ እሳ. 42:1፤ ማቶላ 3:17፤ 12:18፤ ማር. 1:11፤ ሉቃሳ 3:22 17:10 ሚልክ. 4:5

14 ኡንቱንቱ ዳር አሳኮ ዬዳ ዋደ፤ እት ብታኒ የሱሳኮ ዪደ፤ አ ሰንሳን ጉልባቲደ፤

15 “ታ ጎዳዉ፡ ታ ናኣ ዋዛና ባይዝያ ሀርጊ ኦይቁና፡ እ ዳር ዋደ ታማን፡ ቃይ ዳር ዋደ ሃላን ኩንድያ ድራዉ፡ እ ዳሪ ሳከቲ፤ አ ፓሳርኪ።

16 ኔና ካልያዋንቱኮካ አ አሃድ፤ ሸን ፓላናዉ ዳንዳይበይክኖ” ያጌዳ።

17 የሱስ ዛሪደ ኡንቱንታ፡ “አማነና ሀ ዋድያ ጌላ አሳዉ! ታን ሀንተናና አዉደ ጋካናዉ ደኣኔ? ቃይ ሀንተንቱባ አዉደ ጋካናዉ ዳንዳያኔ? ናኣ ታኮ ሃ አኪደ ዪተ” ያጌዳ።

18 የሱስ ኢታ አያና፡ “አፕ ከሳ” ጊደ አዛዝና፡ ኢታ አያናይ ናኣፕ ከሰ እጌዳ፤ ኤለካ ናኣይ ፓጽ አጌዳ።

19 ሄዋፕ ጉይያን፡ እ ካልያዋንቱ ባረንቱ ጸላላ የሱሳኮ ዪደ፤ “ኑን ኢታ አያና ከሳናዉ አያዉ ዳንዳይበይኮ?” ያጌድኖ።

20 የሱስ ኡንቱንታ ያጌዳ፤ “ሄዌ ሀንተንቱ አማኑ ጉጹዳ ድራሳ፤ ታን ሀንተንቶ ቱሙዋ ኦዳይ፤ ሀንተንቶ ሳናፍጭያ ጌተትያ ጉላ ሞላት አይፍያ ኬና አማኑ ደእንቶ፡ ሀንተንቱ ሀ ደርያ፡ ሀዋፕ ያ ሺቃ” ያግንቶ እ ሺቃና፤ ሀንተንቱ አያን ኦላናዉካ ዳንዳያንታ።

21 ሸን ሀዋ ማላ ዋሳፕን ጸማፕ ሀራባይ ከሳናዉ ዳንዳየና” ያጌዳ።

የሱስ ባረ ሀይቁዋባ ላኤንሉዋ ኦዳዳ (ማር. 9:30-32፤ ሉቃሳ 9:43-45)

22 አ ካልያዋንቱ ጋሊላን፡ እትፕ ሺቅ ኡት ደእሸን፡ የሱስ ኡንቱንታ፡ “ታና፡ አሳ ናኣ፡ አሳይ አሳዉ አሊደ እማና።

23 አሳይ ታና ዋቆናዋ፤ ሄዋፕ ጉይያን ታን ሄዘንሉያ ጋላስ ሀይቁዋፕ ደንዳና” ያጌዳ። አ ካልያዋንቱ ዳር ቃረቴድኖ።

ጌሻ ጎልያ ጊራ ጊርያዋ

24 የሱስን አ ካልያዋንቱ ቅፍርናሆማ ካታማ ዬዳ ዋደ፡ ጌሻ ጎልያስ ቃራጸ አክያዋንቱ ጳጵሮሳኮ ዪደ፡ “ሀንተንታ ታማርሰያዌ ጌሻ ጎልያ ጊራ ጊረኔ?” ያጌድኖ።

25 እ ዛሪደ፡ “ጊራ” ያጌዳ። ጳጵሮስ ሶይ ገሌዳ ዋደ፡ የሱስ ካሰቲደ አ፡ “ሰሞና፡ ነ ቆፋይ አይ? ሀ ሳኣ ካታቱ ቃራጸ ዋይ ጊራ ኦፕ አኪኖ? ባረንቱ ጋድያ አሳፕ አኪኖ ዋይ ሀራ ጋድያ አሳፕ አኪኖ?” ያጌዳ።

26 ጳጵሮስ፡ “ሀራ ጋድያ አሳፕ አኪኖ” ያጌዳ።

የሱስ ጳጵሮሳ፡ “ያቶ፡ ጋድያ አሳይ ገራናው በሰና።
 27 ሽን ኑን ሀ አሳቱዋ ሀንቀላናው ኮዮኮ፤ ኔን አባ ባደ እን ደባ የጋ፤ ያታደ ኮይሮ ከሰያ ሞልያ ኮይቃደ፡ አ ዶና ፖቅያ ዋደ፡ ገራው ግድያ ሚሻ ኔን ደማና። ሄዋ አካደ፡ ታ ገራነ ነ ገራ ኡንቱንቶ እማ” ያጌዳ።

18

ኡባፕ አድያዌ ኦኔ?

(ማር. 9:33-37፤ ሉቃሳ 9:46-48)

1 አ ካልያዋንቱ የሱሳኮ ሄ ዋደ ዪደ፡ “ሳሉዋ ካውተላን ኡባፕ አድያዌ ኦኔ?” ያጌድና።

2 የሱስ እት ጉላ ናኦ ጼሰ ኡንቱንቱ ግድን ኤሲደ፡ ሀዋዳን ያጌዳ፤

3 “ታን ሀንተንቶ ቱሙዋ ኦዳይ፤ ጸሳኮ ሀንተንቱ ሰሚደ፡ ጉላ ናናዳን ሀናና ቆዮ፡ ሳሉዋ ካውተላ ኡባካ ገላናው ዳንዳይክታ።

4 ሰሞ ሀ ጉላ ናኦዳን፡ ባረና ካውሸያ ኦንነ ሳሉዋ ካውተላን ኡባፕ አድያዋ።

5 ቃይ ሀዋ ማላ ናኦ ታ ሱንላን ሞክያ ኦንነ ታና ሞኬ።

6 ሽን ታና አማንያ ሀ ጉላ ናናፕ እቱዋ ባለልያ ኦንነ፡ ጋጭያ ዋጋ ዋጸ ባረ ቆድያን ቃቺደ፡ አባ ጨሙዋን ሞተትያዌ አው ሎኦ።

ዱቦ ጋሶ ግድያዋ

(ማር. 9:42-48፤ ሉቃሳ 17:1-2)

7 “አላሚ አሳ ዱቢያ ድራው፡ ሳአው አየሮ፤ አያው ሳፕ፡ ዱቢያባይ ዩሳ አገና፤ ሽን ዱቡ አ ጋሶታን ይያ ኡራው አየሮ።

8 “ኔና ኩሺ ዋይ ነ ገዲ ኔና ባለሉፕ፡ ኔፕ ቃንጸ ኦላ፤ ኔን ላኡ ኩሽያናነ ላኡ ገድያና መድና ታማን ኦለትያዋፕ ዋባ ዋይ ዱጸ ኩሽያና መድና ደኡዋ ገልያዌ ነው ሎኦ።

9 ቃይ ነ አይፊ ኔና ባለሉፕ፡ ኔፕ ዋጫ ከሳ ኦላ፤ ኔን ላኡ አይፍያና ጋናሞያ ታማን ኦለትያዋፕ እት አይፍያና መድና ደኡዋ ገልያዌ ነው ሎኦ።

10 “ሀንተንቱ ሀ ጉላቱዋፕ እቱዋነ ካ□ና ማላ፡ ሀንተንታ ናግተ፤ አያው ሳፕ፡ ታን ሀንተንቶ ኦዳይ፤ ሳሉዋን ኡንቱንቱ ኪታንቻቱ ኡባ ዋደ፡ ሳሉዋን ደእያ ታ አቡ ሰንላን ደኦና።

11 አያው ሳፕ፡ ታን፡ አሳ ናኦይ፡ ባዬዳዋ አሻናው ያድ።

ባዬዳ ደርሳ ሌምሱዋ
(ሉቃሳ 15:3-7)

12 “እት አሳዉ ዴቱ ደርሳቱ ደእያዋንቱ፣ እቱ ባዮ፣ ኡዲፍ ታማነ ኡዲፍቱዋ ደርያን አጊደ፣ ሄ ባዬዳዋ ኮያናዉ ቤኔ? ህንተንቱ ዋጊቱ?

13 ታን ህንተንቶ ቱሙዋ ጋይ፤ እ ደሞ፣ ባይቤና ኡዲፍ ታማነ ኡዲፍ ደርሳቱዋ፣ አሊደ፣ ሄ እት ደርሳን ናሸቱ።

14 ሄዋዳንካ፣ ሳሉዋን ደእያ ህንተንቱ አቡ ሀ ጉላቱዋ፣ እቱ ባያናዋካ ኮዮና።

ባይዜዳ አሳዉ ኦላናዉ በሰያባ

15 “ሳ እሻይ ኔና ናቆ፣ ኔረካ አኮ ባደ፣ አ ናቁዋ አዉ ኦዳ፤ እ ነዋ ሰሶ፣ ነ እሻ ባላ፣ ዛራዳ።

16 ሸን እ ነዋ ሰሰናን እጾ፣ ላኡ ዋይ ሄዙ ማርካይ ማርካቶዋን የዉ ኡባይ ቱማትያ ድራዉ፣ ሀራ እት ዋይ ላኡ አሳ ኔናና እት፣ አ።

17 እ ኡንቱንቱባ ሰሰናን እጾ፣ ኡባባ አማንያ አሳዉ ኦዳ፤ ቃይ አማንያ አሳይ ግያዋካ እ ሰሰናን እጾ፣ አማነና አሳዳንነ ቃራጸ ሺሽያ አሳዳን አ ፓይዳ።

18 “ታን ህንተንቶ ቱሙዋ ጋይ፤ ኔን ሳኣን ሀኖ ጎዌ ኡባይ ሳሉዋን ጸሳ ሰንላን ሀናና፤ ሸን ኔን ሳኣን ሀኖ፣ ጌዳዌ ሳሉዋንካ ሀናና።

19 “ቃይካ ታን ህንተንቶ ኦዳይ፤ ህንተ፣ ላኡ ኡራይ ሳኣን ጸሳ ዋሰያዋን አይ የዉዋንነ እት ዋዛና ግደ፣ ሳሉዋን ደእያ ታ አቡ ሄዋ ህንተንቶ እማና።

20 እያዉ ጎ፣ ላኡ ኡራይ ዋይ ሄዙ ኡራይ ታ ሱንላን ሸቅያሳን፣ ታን ሄዋን ኡንቱንቱ ግዲዋን ደአይ” ያጌዳ።

አቶ ግያዋ

21 ጳጵሮስ፤ ሄ ዋደ የሱሳኮ ዪደ፣ “ጎዳዉ፣ ታ እሻይ ታና አፍ ካላ ናቆ፣ ታን አዉ አቶ ጋናዉ በሲ? ላፍኑዋ ጋካናዉ ናቂኔዬ?” ያጊደ እ ኦቼዳ።

22 የሱሰ ዛሪይ አ፣ “ግደና፣ ታን ኔና ላፍን ታሙ ካላ ላፍኑዋ ጋይ፣ እትን፣ ላፍኑዋ ጸላላ ጊከ።

23 “እያዉ ጎ፣ ሳሉዋ ካዉተላይ ባረ ቆማቱዋና ሚሻ ሄተታናዉ ቆፔዳ ካትያ በሴ።

24 ሄ ካቲ ሚሻ ሄተታናው ደሜዳ ዋደ፣ ዳር ሚሎን ብራ ከጩ ደእያ እት ብታንያ ከኮ ከሄድኖ።

25 ሸን ሄ ቆማው አጩዋ ጭግያዌ ጳይና፣ አ ጎዳይ ሄ አጩዋ ጭጋናው፣ አ ማቻታን እነ አ ናናይ፣ ቃይ አው ደእያ ኡባባይ ዛልኤታና ማላ፣ አ አዛዜዳ።

26 ሄዋ ድራው፣ ቆማይ ባረ ጎዳ ሰንፋን ጉልባቲደ፣ ታ ጎዳው፣ ሀያ ጎዳ ጉፋ ዋድያ ናጋርኪ፤ ታን ነው ኡባባካ ጭጋና ያጊደ አ ዋሴዳ።

27 አ ጎዳይ አው ቃረቲደ፣ አ የድ አጌዳ፤ አ አጩዋካ አው ማር አጌዳ።

28 “ሸን ሄ ቆማይ ከሲደ፣ ባረ ላገፋ ቆማቱዋጥ እቱ ባረጥ ጹቱ ብራ ሳንትምያ ታልኤዳዋና ጋከቲደ፣ ና ቦላ ደእያ ታ ሚሻ ጭጋ’ ያግ ኦይቂደ፣ አ ጩሌዳ።

29 “ያትና ሄ አ ላገፋ ቆማይ አ ሰንፋን ጉልባቲደ፣ ሀእ ታይሻይ ጉፋ ዋድያ ናጋርኪ፤ ታን ነው ኡባባካ ጭጋና’ ያጊደ አ ዋሴዳ።

30 “ሸን እጽ አክ ቢደ፣ አ ላገፋይ ሄ አጩዋ ቃንጸና ጋካናው፣ ቃሾ ጎለ ገልሴዳ።

31 ሄዋ ድራው፣ አ ላገፋ ቆማቱ ሄዋ በኢደ፣ ዳር ይሎቴድኖ፤ ባረንቱ ጎዳኮ ቢደ፣ እ ኦሌዳ ኡባባ አው ኦዴድኖ።

32 “ሄዋጥ ጉይያን፣ ጎዳይ ሄ ቆማ ጸሲደ፣ ሀ ኢታ ቆማው፣ ኔን ታና ዋሴዳ ድራው፣ ታን ሄ አጩዋ ኡባ ነው ማራ አጋድ።

33 ታን ነው ሄ አጩዋ ማሬዳዋዳን፣ ኔንካ ነ ላገፋ ቆማው ማራናው በሰኔ?’ ያጌዳ።

34 ሄዋጥ ሰሚደ አው ዳር ሀንቀቲደ፣ ባረ አጩዋ ኡባ እ ጭግ ወርሳና ጋካናው፣ ፓጸ ካኤታና ማላ፣ ቃሾ ጎለ ገልሴዳ።

35 “ሀንተንቱ ሁጲያን ሁጲያን ሀንተንቱ እሻው ዋዛናጥ አቶ ጋና ጳዮፕ፣ ሄ ጎዳይ ባረ ቆማ ኦሌዳዋዳን፣ ሳሉዋን ደእያ ታ አቡካ ሀንተንታ ሄዋዳን አፋና” ያጌዳ።

19

የሱስ ገሉዋባን አካባ ታማርሴዳ (ማር. 10:1-12)

1 የሱስ ሄ ሃሳያ ወርሶዋጥ ጉይያን፣ ጋሊላፕ ደንዲደ፣ ዮርዳኖሳ ሻፋፕ ሄፍንፋን ደእያ ይሁዳ ጋድያ ቤዳ።

2 ዳር አሳይ አ ካሊደ ቤዳዋ ሄዋን ፓሌዳ።

3 እት እት ፓርሳዋቱ ፓጫናው የሱሳኮ ዪደ፣ “እት አሳይ አይ ጋሱዋንነ፣ ባረ ማቻቶ የዳናው ኑ ህጊ አዛዚ?” ያጊደ አ ኦቼድኖ።

4 የሱሳ ካሪደ፣ ሀዋዳን ያጌዳ፤ “ጸሳይ ኮይሮ ኡንቱንታ መጲደ፣ አቱማዋነ ማጫወኖ ኦሴዳ።

5 ሄዋ ድራው፣ ሳት አሳይ ባረ አባነ ባረ ዳዮ አጊደ፣ ባረ ማቻትና እትፕ ደኤ፤ ኡንቱንቱ ላኡ እት አሳ ግዲኖ፣ ያግያ ቃላ ናባብበይክቱ?

6 ሄዋ ድራው፣ ኡንቱንቱ እት አሳ ግድያዋፕ አትን፣ ላኡ አሳ ግድክኖ፤ ሄዋ ድራው፣ ጸሳይ እትፕ ደአናዳን ጋላዋ አሳይ ሻኮፕ” ያጌዳ።

7 ፓርሳዋቱ የሱሳ፣ “ያትና፣ ሙሴ አያወ እት ኡራይ ባረ ማቻቶ ፕርማ ፔጲደ የዳና ማላ አዛዜዴ?” ያጌድኖ።

8 የሱሳ ካሪደ፣ “ህንተንቱ ህንተንቱ ማቻቱዋ የዳና ማላ፣ ሙሴ ህንተንታ አዛዜዳዌ፣ ህንተንቱ ኦድና ሰሰና ጉዙማ ግድ ድራፕ አትን፣ ኮይሮ ሄዋ ማላ ግደና።

9 ታን ህንተንቶ ኦዳይ፤ ባረ ማቻቶ ዋሹመናን ደእሸን የዲደ፣ ሀራር አክያ ኦንነ ዋሹማ፤ ሀራይ የዴዳወኖ አክያዌካ ዋሹማ” ያጌዳ።

10 የሱሳ ካልያዋንቱ አ፣ “አሰና ግዲዋንነ ማቻት ግዲዋን ደእያ ዋጋይ ሄዋ ማላ ግደ፣ አከናንነ ገለናን ደእያዌ ሎአ” ያጌድኖ።

11 ሸን የሱሳ ኡንቱንታ ያጌዳ፤ “ሄዋ ማላ ትምርቲ ጸሳይ እምዋንቱሳፕ አትን፣ አሳ ኡባሳ ግደና፤

12 አያወ ጎፕ፣ ባረንቱ ዳይ ኡሉዋፕ የለትያ ዋደካ፣ ሹፋ ግዴዳዋንቱ ደኢኖ፤ ቃይ አሳይ ቃራትና ሙሬሳ ግዴዳዋንቱ ደኢኖ፤ ቃይ ሳሉዋ ካወተሳ ድራው፣ ባረንታ ሹፋ ኦሴዳዋንቱ ደኢኖ፤ ሀ ትምርትያ አካናወ ዳንዳይያዌ ኦንነ አኮ” ያጌዳ።

የሱሳ ቁር ናና ቦላ ባረ ኩሸያ ዋሴዳ
(ማር. 10:13-16፤ ሉቃሳ 18:15-17)

13 የሱሳ ሄ ዋደ ባረ ኩሸያ ጉላ ናና ቦላ ዋሴደ፣ ጸሳ ዋሳና ማላ፣ እት እት አሳይ ናና እኮ አሄዳ፤ ሸን የሱሳ ካልያዋንቱ ሄ አሳ አሄና ማላ ሀንቀቱድኖ።

14 ሸን የሱሳ፣ “ቁር ናናይ ታኮ ይያዋ ድጎፕተ፤ አያወ ጎፕ፣ ሳሉዋ ካወተሳይ ሄዋንቱ ማላሳ” ያጌዳ።

15 ሄዋጥ ሰሚደ ባረ ኩሽያ ኡንቱንቱ ቦላ ዋሌዳዋጥ ጉይያን፣ ሄዋጥ ባሽ ቤዳ።

ያላጋ፣ ዱረ ብታንያ ኦሻ
(ማር. 10:17-31፤ ሉቃሳ 18:18-30)

16 እት ብታኒ የሱሳኮ ዪደ፣ “ታማርሰያዎ፣ ታን መድና ደኡዋ ደማናዉ ሎኦባ ክያ ኦሶ?” ያጌዳ።

17 የሱሰ ኦ፣ “ሎኦባይ እየንቶ ታና ክያዉ ኦቻይ? እቱዋ ጸላላይ ሎኦ፤ ሽን ኔን መድናዉ ደክናዉ ኮዮ፣ ኦዛዛቱዋ ናጋ” ያጌዳ።

18 ብታኒ፣ “ሀቃዋንታ?” ያጌደ ኦቹዳ።
የሱሰ ዛሪደ፣ “ዋጶጋ፤ ዋሹዋጋ፤ ዉኦጋ፤ ዋርዱዋ ማርካቶጋ፤

19 ነ ኦባነ ነ ዳዮ ቦንቻ፤ ነ ሸሩዋካ ነ ሁጲያዳን ሲቃ” ያጌዳ።

20 ሄ ያላጋ ብታኒ የሱሳ፣ “ታን ሄዋ ኡባካ ጉላተላጥ ደማደ ናጋድ፤ ያትና፣ ታዉ ፓጭያዌ ኦዬ?” ያጌዳ።

21 የሱሰ ብታንያ፣ “ኔን ፖሎ ኦሳ ግዳናዉ ኮዮ፣ ባደ ነዉ ደእያዋ ዛልኦደ፣ ሄ ሚሻ ሀዬሳዉ እማ፤ ኔን ሳሉዋን ዱረታና፤ ያታደ ያደ ታና ካላ” ያጌዳ።

22 ሽን ሄ ያላጋ ብታኒ ሄዋ ሰሴዳ ዋደ፣ እ ዳር ዱረ ግድያ ድራዉ፣ ቃረቲደ ባሽ ቤዳ።

23 የሱሰ ባረና ካልያዋንቶ፣ “ታን ሀንተንቶ ቱሙዋ ጋይ፤ ዱረ ኦሳይ ሳሉዋ ካዉተላ ገላናዌ ዳር መቶ ግዳናዋ።

24 ታን ጉጃደካ ሀንተንቶ ኦዳይ፤ ዱረ ኦሳይ ጸሳ ካዉተላ ገላና፣ ጋሉ ማርፕያ ሉኩዋና ኦቶናዌ ማታቱ” ያጌዳ።

25 ኦ ካልያዋንቱ ሄዋ ሰሰ ማላላቲደ፣ “ያትና፣ ኦን ኦታናዉ ዳንዳዪ?” ያጌድኖ።

26 የሱሰ ኡንቱንታ ጫድ ጸሊደ፣ “ሀዌ ኦሳዉ ዳንዳየተና፤ ሽን ጸሳዉ ኡባባይ ዳንዳየቱ” ያጌዳ።

27 ጳጵሮስ ሄ ዋደ ዛሪደ የሱሳ፣ “ባኦ፣ ኦን ኦዉ ደእያ ኡባባ ባሻደ፣ ኔና ካሌደ፤ ያቲደ ኦን ኦያ ደማኔሻ?” ያጌዳ።

28 የሱሰ ኡንቱንታ ሀዋዳን ያጌዳ፤ “ታን ሀንተንቶ ቱሙዋ ጋይ፤ ታን፣ ኦሳ ናኦይ፣ ኦራላ ጋድያን ታ ካዉተላ ኦይድያን ኡትያ ዋደ፣ ታና ካሌዳ ሀንተንቱካ ታማነ ላኡ እሰራኤልያ ዛራቱዋ ቦላ ፕርዳናዉ፣ ታማነ ላኡ ካዉተላ ኦይድያን ኡታንታ።

19:18 ከሳ 20:13-16፤ ዛረ. 5:17-20 19:19 ከሳ 20:12፤ ዛረ. 5:16፤
ዋጋ 19:18

29 ታ ሱንላ ድራው፣ ጎልያ ዋይ እሻቱዋ ዋይ ምቻቱዋ፣ ዋይ አወዋ ዋይ አቶ ዋይ ማቻቶ፣ ዋይ ናና ዋይ ጋድያ አጌዳ ኦንነ፣ ዴቱ ዳኩዋፕ ዳሩዋ አካና፤ ቃይ መድና ደኡዋካ ላታና።

30 ሸን ጮራቱ ሀእ ሰንላቴዳዋንቱ ጉየታናዋንታ፤ ቃይ ጮራቱ ሀእ ጉየን ደእያዋንቱ ሰንላታናዋንታ።

20

ዋይንያ ቱራ ግደን አልያ ኦሳንቻቱዋ ሌሞሱዋ

1 “ሳሉዋ ካወተላይ ዋይንያ ጌተትያ ቱራ ግደዋ አልያዋንታ ኤንያ ኦሰሳናው፣ ዋንታ ጉራን ከሴዳ ዋይንያ ቱራ ጎዳ በሴ።

2 እ ሄ ኦሳንቻቶ ሀቼ ሀቼ አሌዳዋ ዋልቃ ጋትያ ጭጋናዉ ኤንቱንቱና ገጊደ፣ ባረ ዋይንያ ቱራ ግደዋ ኦሰሳናዉ ኤንቱንታ የዴዳ።

3 “ቃይ ሄዙ ሳትያ ግደደ ከሲደ፣ ኦሱ ባይናን ቆጫን ኤቄዳ ሀራ አሳቱዋ በኢደ፣

4 ኤንቱንታ፣ ‘ሀንተንቱካ ቃይ ታ ዋይንያ ቱራ ግደዋ አላናዉ ቢተ፤ ታን ሀንተንቶ በሰያ ጋትያ ጭጋና’ ያጌዳ፤ ሄዋፕ ጉይያን ኤንቱንቱ ቤድና።

5 ላኤንሉዋካ ኡሱፑን ሳትያንነ ኡዱፑ ሳትያን ከሲደ፣ ሄዋዳን አሌዳ።

6 ታማነ እት ሳትያ ሄራን እ ከሰያ ዋደ፣ ሀራንቱ ሄዋን ኤቄዳዋንታ ደሚደ፣ ‘ኦሱዋ ኦፍናን ኩመንላ ጋላሳ ሀዋን አያዉ ኤቄ ፔሼድቴ?’ ያጌዳ።

7 “ኤንቱንቱ፣ ‘ኡና ኦሰሰያ አሳይ ቆዬዳ ድራዉ ኤቄ ፔሼድ’ ያጌድና።

“እ፣ ‘ኤንቱንታካ ቃይ ታ ዋይንያ ቱራ ግደዋ አላናዉ ቢተ’ ያጌዳ።

8 “ሳአይ ኦማርሰያ ዋደ፣ ዋይንያ ቱራ ጎዳይ አልያዋንቱ ካፑዋ፣ ‘ኦሳንቻቱዋ ዴሳደ፣ ዉርሰላን ኦሱዋን ገሌዳዋንቱፕ ደሚደ ኮይሮ ገሌዳዋንታ ጋካናዉ፣ ኤንቱንቱ ኦሱዋ ድርጉዋ ጭጋ’ ያጌዳ።

9 “ታማነ እት ሳትያ ሄራን ኦሱዋ ደሚዳዋንቱ ዪደ፣ ሁጲያን ሁጲያን አሊደ ፔሼዳ ዋልቃ ጋትያ አኬድና።

10 ኮይሮ ኦሱዋ ደሜዳ አሳይ ዬዳ ዋደ፣ ዳሩዋ አካናዉ ቆፔድኖ፤ ሽን ኡንቱንቱካ ሁጺያን ሁጺያን ባረንቱ ኦሱዋ ዋልቃ ጋትያ አኬድኖ።

11-12 ሄዋፕ ጉይያን፣ ላህ ጉየፕ ዬዳዋንቱ እት ሳትያ ጸላላ ኦሱድኖ፤ ኩመንሳ ጋላሳ ዳቡሪደ ጫዎቲዳ ኑዋና ኡንቱንቱ ኦሱዋ ድርጉዋ ቃራ ኦሳዳ፣ ያጊደ ባረንታ ኦሱዋን ገልሴዳዋ ቦላ ዙዙሜድኖ።

13 “ሽን እ ኡንቱንቱፕ እቱዋ ሀዋዳን ያጌዳ፤ ታ ላገዉ፣ ታን ኔና ናቃበይክ፤ ኦሳደ ፔሼዳ ዋልቃ ጋትያ ታናና ጊጋበይክዬ?

14 ነዋ እካደ ባ፤ ታን ሀእ ዉርሰላን ኦሱዋን ገሌዳዎካ ነዋ ከና እማናዉ ከያይ።

15 ታን ታ ሚሻን ታ ኮዬዳዋዳን ኦሳናዉ ታዉ ማታይ ባዌ? ዋይ ታን ሎእ ግዴዳ ድራዉ፣ ኔን ቃናታይ?” ያጌዳ።

16 “ሄዋዳንካ፣ ቃይ ጉየቲዳዋንቱ ሰንላታናዋንታ፤ ሰንላቲዳዋንቱ ቃይ ጉየታናዋንታ፤ እያዉ ሳፕ፣ ጸሰቲዳዋንቱ ጮራ፤ ሽን ደረቲዳዋንቱ ጉላ” ያጌዳ።

የሱስ ባረ ሀይቁዋባ ሄዘንሉዋ ኦዴዳ
(ማር. 10:32-34፤ ሉቃሳ 18:31-34)

17 የሱስ የሩሳላመ ቢደ፣ ኦግያን ባረናና ብያ ታማነ ላኡ ባረና ካልያዋንታ ጋጾ ከሲደ፣ ዲማ ኡንቱንቶ ያጌዳ።

18 “በእተ፣ ኑን የሩሳላመ ሀእ ከሴቶ። ያን ታና፣ አሳ ናኦ ቄሳቱዋ ካፓቶን ህግያ ታማርሰያዋንቶ አሊደ እማናዋንታ፤ ኡንቱንቱ ታ ቦላ ሀይቁዋ ፕርዳ ፕርዳናዋንታ።

19 ቃይ አይሁዳ ግደና አሳዉካ ታና አሊደ እማናዋንታ፤ ሄ አይሁዳ ግደና አሳይ ታ ቦላ ቅሊጫናዋንታን ታና ልሱዋን ሾጫናዋንታ፤ ያቲደ ማስቃልያ ቦላ ሞስማርያን ጅሺደ፣ ታና ካቃናዋንታ፤ ታን ሄዘንሉያ ጋላሰ ሀይቁዋፕ ደንዳና” ያጌዳ።

ዛብድዮሳ ናና ዳይ ዋሳ
(ማር. 10:35-45)

20 ሄ ዋደ ዛብድዮሳ ናና ዳያ ባረ ናናና የሱሳኩ ያዱ፤ አ ሰንላን ጉልባታደ እትባ አ ዋሳዱ።

21 የሱስ እዞ፣ “እያ ኮያይ?” ያጊደ ኦቼዳ።

እዛ ዛራደ፣ “ሀ ታ ላኡ ናናይ ነ ካዉተላን እቱ ኔፕ ኡሽቻ ባጋና፣ ቃይ እቱ ኔፕ ሀድርሳ ባጋና ኡትኖ ያጋርኪ” ያጋደ ዋሳዱ።

22 ሸን የሱስ ዛሪደ ናና፡ “ህንተንቱ እያ ዋሳናው በስንቶ ኤርክታ። ታና ጋክያ ዋልቃማ መቼዋ መቶታንቱ? ታን ጸማቀታና ጽንቃታ ጸማቀታናው ዳንዳዪቱ?” ያጌዳ።

ኡንቱንቱ፡ “ኤ ዳንዳያና” ያጌድኖ።

23 የሱስ፡ “ታና ጋክያ ዋልቃማ መቼዋ ቱማካ ህንተንቱ መቶታንታ፤ ሸን ታፕ ኡሸቻ ባጋና ሀድርሳ ባጋና ኡታናዋንታ ደራናው ታው ማታይ ባዋ፤ ሸን ሄ ሳእይ ታ አቡ እማናው ጊገስ ዋሌዳዋንቱሳ” ያጌዳ።

24 የኮ ታሙ የሱሳ ካልያዋንቱ ሄዋ ሰሴዳ ዋደ፡ ሄ ላኡ እሻቶ ህንቀቲድኖ።

25 ሸን የሱስ ኡንቱንቱ ኡባቱዋካ ባረኮ ጸሲደ፡ ሀዋዳን ያጌዳ፤ “አሀዛበ አሳቱዋ ካፓቱን ሀዋንታ ካለልያ አሳቱ ባረንቱ አሳ አይሰያዋ ኤሪታ።

26 ህንተንቱ ግዴዋን ሄዋ ማላ ግደና፤ ሸን ህንተንቱ ግዴዋን ቆቃተላ ኮይያ ኦንነ ህንተንቶ ቆማ ግደናው በሴ።

27 ቃይ ህንተንቱ ግዴዋን ኡባፕ ቦላ ግደናው ኮይያዌ ኦንነ ህንተንቶ አይለ ግደናው በሴ።

28 ሄዋዳን ታን፡ አሳ ናእይ፡ አሳው ኦላናውን ዳሮ አሳ ዋዛናው ታ ሸምፕዋ እማናው ዬዳዋፕ አትን፡ አሳይ ታው ኦላና ማላ ያበይከ” ያጌዳ።

የሱስ ላኡ ቆቃቱዋ ፓሌዳ
(ማር. 10:46-52፤ ሉቃሳ 18:35-43)

29 የሱስነ አ ካልያዋንቱ እያርኮፕ ከሰሸን፡ ዳሮ አሳይ ኡንቱንታ ካሌዳ።

30 ላኡ ቆቃ አሳቱ ኦግያ ደናን ኡቴዳዋንቱ የሱስ ሄዋና አድያዋ ሰሲደ፡ ባረንቱ ኮሻ ቆቁ ኦሊደ፡ “ኅዳው፡ ዳዊታ ናአው፡ ኑው ቃረታርኪ” ያጌድኖ።

31 ዳሮ አሳይ ኡንቱንታ፡ “ሀይዘተ” ጊደ ህንቀቲዳ፤ ሸን ኡንቱንቱ ባረንቱ ኮሻ ዳሪ ቆቁ ኦሊደ፡ “ኅዳው፡ ዳዊታ ናአው፡ ኑና ማራርኪ!” ያጌድኖ።

32 የሱስ ኦግያን ኤቂደ፡ ኡንቱንታ ጸሲደ፡ “ታን ህንተንቶ እያ ኦላና ማላ ኮዩቱ?” ያጌዳ።

33 ቆቃቱ፡ “ኅዳው፡ ኑ አይፍያ ፓላርኪ” ያጌድኖ።

34 የሱስ ኡንቱንቶ ቃረቲደ፡ ኡንቱንቱ አይፍያ ቦቼዳ፤ ኤለካ ኡንቱንቱ አይፊ ጸል አግና፡ አ ካል አጌድኖ።

21

የሱስ ዋልቃማ ቦንቸዋን የሩሳላመ ገሌዳ
(ማር. 11:1-11፤ ሉቃስ 19:28-40፤ ዮሃ. 12:12-19)

1 ኡንቱንቱ የሩሳላመ ማቲደ፡ ደብረ ዛይተ ጌተትያ ደርያ ለንቂያን ደእያ ቤተፋገ ጌተትያ ቁር ካታማ ጋኬድኖ፤ የሱስ ባረና ካልያዋንቱፕ ላኡዋ ሰንፋዉ ኪቲደ፡

2 ኡንቱንታ ሀዋዳን ያጌዳ፤ “ህንተንቱፕ ሰንፋን ደእያ ቁር ካታማ ቢተ፤ ሄዋን እት ሀራታ ቃሹዋን ደኤዉኖ እዝ ማራና ህንተንቱ ብ ሰዋ ሳንካ ደማንታ፤ ኡንቱንታ ብሊደ፡ ታዉ እክ ዪተ።

3 ኦንነ ህንተንታ ኦቾፕ፡ ሳዳይ ሀዋንታ ኮዬ፣ ያግተ፤ ኤለካ እ ኡንቱንታ የድ አጋናዋ።”*

4-5 ትምቢትያ ኦድያ ናቢ፡

“ጽዮነ ካታማ አሳዉ፡

ጠእ፡ ነ ካቲ አሽከ ግዲደ፡

ሀርያ ቦላ፡ ሀረ ማራ ቦላ ኡቲደ፡

ኔኮ ዬ፣ ያግተ”

ያገደ ሃሳዬዳዌ ፖለታና ማላ፡ ሀዌ ሃኔዳ።

6 አ ካልያዋንቱ ቢደ፡ የሱስ ባረንታ አዛዞዋዳን ኦፊድኖ።

7 ሀራቶነ ሀረ ማራ አሂደ፡ ባረንቱ ማዩዋ ኡንቱንቱ ዘክያን ዋፊድኖ፤ ሄዋፕ ሰምና የሱስ ቶጌዳ።

8 ሄ ጮራ አሳፕ ዳርያ ባጋይ ባረ ማዩዋ ኦግያን ሂጾዳ፤ ቃይ ሀራንቱ ምሳ ሀይሳ ካር ካሪደ፡ ኦግያን የጌድኖ።

9 የሱሳፕ ሰንፋና ሀመትያ ጮራ አሳይነ ቃይ አ ጌዱዋ ካልያ ጮራ አሳይ፡ ባረንቱ ኮሻ ጶቁ ኦፊደ፡

“ዳዊታ ናእይ ጋላተቶ!

ጎዳ ሱንፋን ይያዌ አንጀቴዳዋ!

ጸሳይ ጋላተቶ!”

ያጌዳ።

10 የሱስ የሩሳላመ ካታማ ገሌዳ ዋደ፡ ካታማን ደእያ አሳይ ኡባይ፡ “ሀዌ ኦኔ?” ያገደ ሻቢረቴድኖ።

11 አሳይ፡ “ሀዌ ጋሊላን ደእያ ናዝሬተ ጌተትያ ካታማፕ ዬዳ ናብያ የሱሳ” ያጌዳ።

* 21:3 ጎዳይ፡ ሀራቱዋ ጎዳ ጉሳ። 21:4-5 ዛካ. 9:9 21:9 ማዝ. 118:25፣ 26

የሱስ ጌሻ ጎልያ ገሌዳ
(ማር. 11:15-19፤ ሉቃስ 19:45-48፤ ዮሀ. 2:13-22)

12 የሱስ ጌሻ ጎልያ ገሊደ፣ ሄዋን ዛልእያዋንታነ ሻምያዋንታ ኡባ ካረ የደርሴዳ፤ ቃይ ሚሻ ለምያዋንቱ ጸራጴዛነ ደጎሙዋ ዛልእያዋንቱ እይድያ ጉጵ የጊደ፤

13 ኡንቱንታ፡ “ጸሳ ማጻፋን፣ ጎሊ ጸሳ ዋስያ ጎልያ ጌተታና፣ ያገቲደ ጸፈት ኡቴዳ፤ ሽን ህንተንቱ እ ቦንቂያዋንቱ ቆስትያ ጎንጎሉዋ ከሴድታ” ያጌዳ።

14 ቆቃቲነ ገዲ ሰሌዳዋንቱ የሱሳኮ ጌሻ ጎልያ ዪና፣ እ ኡንቱንታ ፓሌዳ።

15 ሽን ቂሳቱዋ ካፓቲነ ህግያ ታማርሰያዋንቱ የሱስ ኦልያ ኦራላባ በኤዳ ዋደነ፣ ጉላ ናናይ ጌሻ ጎልያን ባረንቱ ኮሻ ቶቁ ኦሊደ፣ “ዳዊታ ናኦይ ጋላተቶ” ያግያዋ በኤዳ ዋደ ህንቀቱድና።

16 ያቲደ የሱሳ፡ “ሀዋንቱ ግያዋ ሰሳይ?” ያጌድና።
የሱስ፡ “ኤ ሰሳይ፤ ጸሳ ማጻፋይ፣ ጉላ ናናይን ጳምያ ናናይ ኔና ጋላታና ማላ፣ ኡንቱንታ ኤርሳዳ፣ ያግያዋ ኡባካ ናባብ በይክቱ?” ያጌዳ።

17 የሱስ ኡንቱንታ አጊደ፣ ሄ ካታማፕ ቢታንያ ጌተትያ ካታማ ቢደ፣ ያን አቁዳ።

አይፊ ጳዬዳ ባላሰያ ምላቶ
(ማር. 11:12-14፣ 20-24)

18 የሱስ ዋንታ ጉራና ካታማ ቤዳ ድራው ኮሻቲዳ።

19 ኦግያ ደናን እት ባላሰያ ጌተትያ ምላቶ በኢደ፣ ኢኮ ቤዳ፤ ብ ጋክያ ዋደ ሄ ምላቶን ሀይላ ጸላላፕ እትን፣ አይፍያ አይነ ደምቤና፤ እዞ፣ “ለኡንሉዋ መጵናወካ አይፎፓ” ያግና፣ ሄ ባላሳታ ኤለካ መላ አጋዲ።

20 እ ካልያዋንቱ ሄዋ በኢደ ማላለቲደ፣ “ሀ ባላሳታ ዋናደ እት ኩላን መላ አጋዴ?” ያጌድና።

21 የሱስ ዛሪደ፣ “ታን ህንተንቶ ቱሙዋ ጋይ፤ ህንተንቱ አማኑ ደእያዋንታነ ሰፊናዋንታ ግደፕ፣ ሀ ባላሳቶ ታን ኦሌዳዋ ማላ ጸላላ ኦላክታ፤ ሽን ሀራይ አቶ ህንተንቱ ሀ ደርያ፣ ደንዳደ አባን ኩንዳ፣ ግንቶካ ሀናና፤

22 ህንተንቱ አማኒደ ጸሳ ዋስያዋ አያ ግድንቶካ አካና” ያጌዳ።

21:13 እሳ. 56:7፤ ኤር. 7:11 21:16 ማዝ. 8:2

የሱሳ ማታይ ዬዳሳ
(ማር. 11:27-33፤ ሉቃሳ 20:1-8)

23 የሱሳ ጌሻ ጎልያ ዪደ ታማርሰሽን፣ ቄሳቱዋ ካፓቱነ አይሁዳ ጭማቱ አኮ ዪደ፣ “ኔን ሀዋ ኦላናው ነው አይ ማታይ ደኢ? ነው ሀ ማታ ኦኔ እሜዳዌ?” ያጌድኖ።

24 የሱሳ ዛሪደ ኡንቱንታ፣ “ታንካ ሀንተንታ እትባ ኦቻና፤ ሀንተንቱ ታው ሄዋ ኦደፕ፣ ታን ሀዋ አይ ማታን ኦላይታንቶ፣ ሀንተንቶ ኦዳና፤

25 ዮሃንስ ጸማቅያ ማታይ ሀቃፕ ዬዳ? ጸሳፕ ዬደየ አሳፕ ዬዳ?” ያጌዳ።

ኡንቱንቱ ባረንቱ ግዲዋን ፓሉማ ደሚደ፣ “ኑን፣ ‘ጸሳፕ ዬዳ’ ያጎፕ እ ኑና፣ ‘ያቶፕ፣ ዮሃንስ ኦዳዳዋ አያው አማንበይክቱ?’ ያጋናዋ።

26 ሸን ኑን፣ ‘አሳፕ ዬዳ’ ያጎፕ፣ አሳይ ኡባይ ዮሃንስ ናብያ ግዳዳዋ ኤርያ ድራው፣ አሳው ያዬቶ” ያጌድኖ።

27 ኡንቱንቱ የሱሳው፣ “ኑን ኤርኮ” ያጌደ ዛሪድኖ።

የሱሳ፣ “ታንካ ሀዋ አይ ማታን ኦላይታንቶ፣ ሀንተንቶ ኦድከ” ያጌዳ።

ላኡ ናና ሌምሱዋ

28 “ሸን ሀንተንቱ አያ ቆፒቱ? ላኡ ናናይ ደአያ እት ብታኒ ደኤ፤ ሄ ብታኒ ባይራ ናኦኮ ቢደ፣ ታ ናአው፣ ሀቼ ባደ ታ ዎይንያ ቱራ ኦላ’ ያጌዳ።

29 ናአይ ዛሪደ፣ ‘ቢከ’ ጌዳ፤ ሸን ጉየፕ ባረ ዎዛናን ቆፕ አኪደ፣ ዎይንያ ቱራ ኦላናው ቤዳ።

30 አው የኮ ናኦኮ ቢደ፣ ባይራው ጌዳዋዳንካ እው ጌዳ፤ ቱፋ ናአይ ዛሪደ፣ ‘ሎእ ታ ጎዳው’ ያጌዳ፤ ሸን ብቤና።

31 ሀ ላኡ ናናፕ ባረ እው ኮዬዳዋ ኦሌዳዌ ሀቃዌ?” ያጌዳ። ኡንቱንቱ፣ “ባይራ” ያጌድኖ።

የሱሳ ኡንቱንታ ሀዋዳን ያጌዳ፤ “ታን ሀንተንቶ ቱሙዋ ጋይ፤ ቃራጸ አክያዋንቱን ዎሹምያዋንቱ ሀንተፕ ሰንሳቲደ፣ ጸሳ ካውተላ ገላና።

32 አያው ጎፕ፣ ጸማቅያ ዮሃንስ ጽሎተላ ኦግያ ታማርሲደ፣ ሀንተኮ ዪና፣ እ ግያዋ አማንበይክታ። ሸን ቃራጸ አክያዋንቱን ዎሹምያዋንቱ እ ግያዋ አማኔድኖ፤ ሀንተንቱ ሀራይ አቶ ሄዋ በኢደካ፣ ሀንተንቱ ናጋራፕ ሰሚደ፣ እ ግይያዋ አማንበይክታ” ያጌዳ።

ዎይንያ ቱራ ግድን ኦሳያ ጎሻንቻቱዋ ሌምሱዋ
(ማር. 12:1-12፤ ሉቃሳ 20:9-19)

33 ቃይካ የሱስ ሀዋዳን ያጌዳ፤ “ሀራ ሌምሱዋካ ሰስተ፤ ዎይንያ ጌተትያ ቱራ ቶኬዳ እት ብታኒ ደኤ፤ ዎይንያ ቱራ ዩሽ አሊደ ድሬዳ፤ ቃይ ሄ ዎይንያ ጉምእያ ኦላካ ቦኬዳ፤ ሄዋ ናግያ አሳዉ አዲሳ ሹቻ ግምቤዳ። ሄዋጥ ጉይያን፣ ኮላ ኦሳያ አሳዉ እሚደ፣ ሀራ ጋደ ቤዳ።

34 ዎይንያ አይፍያ ማጽያ ዎዲ ጋክና፣ ባረና ጋክያዋ አኪደ ያና ማላ፣ ባረ ቆማቱዋ ባረ ኮላዋቱዋኮ ኪቲዳ።

35 ኮላዋቱ አ ቆማቱዋ ኦይቂደ፣ እቱዋ ዎዴድና፤ ቃይ የኩዋ ሹቻን ጳልቄድና።

36 ቃይካ ሄ ብታኒ ካሰዋንቱፕ ዳርያ ሀራ ቆማቱዋ ኪቲዳ፤ ኮላዋቱ ሄ ቆማቱዋካ ካሰዋንቱዋዳን ኦሌድና።

37 “ሽን ዉርሰላን እ፣ ‘ታ ናኣ ኡንቱንቱ ቦንቻናዋንታ’ ያጊደ ባረ ናኣ ኡንቱንቱኮ ኪቲዳ።

38 “ሽን ኮላዋቱ ናኣ በኢደ፣ ባረንቱ ግዲዋን፣ ‘ጋድያ ላታናዌ ሀዋ፤ ቢደ አ ዎዲደ፣ ጋድያ ኑን ላታና’ ያጌድና።

39 ናኣ ኦይቂደ፣ ዎይንያ ቱራ ግደፕ ጋጸ ከሲደ ዎዴድና።

40 “ሰም ዎይንያ ቱራ ጎዳይ ርያ ዎደ፣ ሄ ኮላዋቱዋ ዎታኔ?” ያጊደ ኦቹዳ።

41 ኡንቱንቱ፣ “እ ሄ ኢታ አሳቱዋ ዎድ ዉርሲደ፣ ዎይንያ ቱራይ አይፍያ ዎደ ባረና ጋክያዋ ዎድያን ሹቅያ ሀራ ኮላዋቶ እማና” ያጌድና።

42 የሱስ ኡንቱንታ ሀዋዳን ያጌዳ፤

“ ግምቢያዋንቱ ካዲደ እጼዳ ሹቻይ፣

ጎዳ ጳጳዋ ምንሰያ፣ ኡባፕ አቋያ ሹቻ ግዴዳ።

ሀዌ ጎዳይ ኦሌዳዋ፤

ቃይ ኑ ጸላዉካ ማላልሰያዋ

ያግያዋ ጸሳ ማጸፋፕ ኡባካ ናባብ በይክቲ፣

43 “ሄዋ ድራዉ፣ ታን ሀንተንቶ ኦዳይ፤ ጸሳ ካዉተላይ ሀንተፕ አከቲደ፣ ሎኦ አይፍያ እምያ አሳዉ እመታናዋ።

44 ሄ ሹቻ ቦላ ኩንድያ ኡባይ መኤረታና፤ ቃይ ሄ ሹቻይ አሳ ቦላ ኩንድፕ፣ ሄ ኩንዴዳ ኡራ ሊቅሳና” ያጌዳ።

45 ቄሳቱዋ ካፓቱን ፓርሳዋቱ የሱስ ኦዴዳ ሌምሱዋ ሰሴዳ ዎደ፣ ባረንቱዋ ሃሳይያዋ ኤሬድና።

46 ኡንቲንቲ የሱሳ ኦይቃናው ኮይድኖ፤ ሽን የሱሳ ዳር አሳይ ናብያ ጊደ ቆፕ ኡቲዳ ድራው፥ ሄ አሳው ያይድኖ።

22

አካነ ገሉዋ ኦዲዋ ሌምሱዋ
(ሉቃሳ 14:15-24)

1 የሱስ አሳው ላኤንሱዋ ሌምሱዋን ሀዋዲን ያጊደ ሃሳይዳ፤
2 “ሳሉዋ ካውተሳይ ባረ ናአው ማኙያ እማናው ኡባባ ማኬዳ ካትያ ማላ።

3 ሄ ካቲ ቡላቻው ኦድ ዋሌዳ አሳቱዋ ዴሳናው ባረ ቆማቱዋ ኪቲዳ፤ ሽን አሳቱ ያናው ኮይበይክኖ።

4 “ቃይ ሀራ ቆማቱዋ፥ ‘ዴስቲዳዋንታ፥ “ታን ቁማ ጊግሳድ፤ ታ ሳንጋቲነ ታ ዋቋ ምያቱ ሹከቲድኖ፤ ኡባባይካ ማከቲዳ። ቡላቻ ሃ ዪተ” ያግተ” ያጊደ ኪቲዳ።

5 ሽን ዴስቲዳዋንቲ ኮየናን እጺደ፥ ባረንቲ ኦሶ ቤድኖ፤ እቲ ባረ ገሻው በና፥ የኩ ባረ ዛልኤው ቤዳ።

6 አቲዳዋንቲ ቃይ ካትያ ቆማቱዋ ኦይቁ ዋቋደ ዋቋድኖ።

7 “ካቲ ዳር ሀንቀቲዳ፤ ቃይ ባረ ዋታዳራቱዋ የዲደ፥ ሄ ሸምፑዋ ዋቋዳዋንታ ዋቋሲደ፥ ኡንቲንቲ ካታማ ጉድሴዳ።

8 ሄዋፕ ጉይያን፥ ባረ ቆማቱዋ፥ ‘ቡላቻይ ማከቲዳ፤ ሽን ዴስቲዳዋንቲ ቡላቻው በሰያ አሳ ግድክኖ።

9 ሄዋ ድራው፥ ዋጋ ቃቋ ቢደ፥ ሀንተንቲ ደሜዳ አሳ ኡባ ቡላቻው ዴስተ” ያጌዳ።

10 ሄ ቆማቲ ቃቋ ቢደ፥ ባረንቲ ደሜዳ አሳ ኡባ ሎኡዋ ኢታ ሺሺደ፥ ቡላቻ ዳሰያ ኩንሌድኖ።

11 “ሽን ካቲ ቁማ ማናው ኡቲዳ አሳ በአናው ገሌዳ ዋደ፥ ቡላቻ ማዩዋ ማይቤና እት ብታንያ ሄዋን በኢደ፥

12 “ታ ላገው፥ ቡላቻ ማዩዋ ማየናን ዋናደ ሀዋ ገላዲ?” ያግና ብታኒ ጮኤ ጌዳ።

13 “ሄዋፕ ጉይያን፥ ካቲ ባረ ቆማቱዋ፥ ‘ሀ ብታንያ ኩሸያነ ገድያ ቃቸደ፥ ካረ ቋማ ከሰ ኦልተ፤ እ ሄዋን ዬካናነ አቻ ቋቃና” ያጌዳ።

14 “አያው ሳፕ፥ ዴስቲዳዋንቲ ዳራ፤ ሽን ደረቲዳዋንቲ ጉላ” ያጌዳ።

ጊራ ዋት ጊራነንቶ ኦቼዳ ኦሻ
(ማር. 12:13-17፤ ሉቃሳ 20:20-26)

15 ሄዋጥ ጉይያን፣ ፓርሳዋቱ ቢደ፣ አ ሃሳያጥ ባላ ደሚደ፣ አ ኦይቃና ማላ ማቀቱድኖ።

16 ቃይ ባረንታ ካልያዋንቱጥነ ሄርድሳ ባጋቱዋጥ አማራዳዋንታ አኮ ኪቱድኖ። ኡንቱንቱ፣ “ታማርሰያዎ፣ ኔን ቱሙዋ ሃሳይያዋን ጸሳ ኦግያ ቱማተላን ታማርሰያዎ ኩን ኤሬቶ፤ አያው ጎጥ፣ ኔን አሳጥ አሳ ሻካካነ ዲማያካ።

17 ነ ቆፋይ አየንቶ ኩዉ ኦዳ፤ ኩን ሮመ ጋድያ ካትያ ቁሳረዉ ጊራ ጊርያዎ ዋጌየ ዋጋ ግደኔ?” ያጌድኖ።

18 ሸን የሱስ ኡንቱንቱ ኢታ ቆፋ ኤሪደ፣ “ሀ ሎአ ማላትያ ኢታ አሳቶ፣ አያው ታና ፓጩቱ?”

19 ጊራ ጊርያ ሚሻ ታና በሰተ” ያጌዳ። ሄዋጥ ጉየ ኡንቱንቱ ብራ ሳንትምያ አዉ አሄድኖ።

20 እ፣ “ሀ ማላይነ ሱንሳይ ኦዌ?” ያጌዳ።

21 ሄዋጥ ሰሚደ ኡንቱንታ ኦቶና፣ ኡንቱንቱ፣ “ሮመ ጋድያ ካትያ ቁሳረዋ” ያጌድኖ።

ሄዋጥ ጉይያን፣ የሱስ ኡንቱንታ፣ “ያቶጥ፣ ቁሳረዋ ቁሳረዉ፣ ጸሳዋ ጸሳዉ እምተ” ያጌዳ።

22 ኡንቱንቱ ሄዋ ሰሴዳ ዎደ፣ ማላለቲደ አ አጊደ ቤድኖ።

ሀይቁዳዋንቱ ደንዲዋባ
(ማር. 12:18-27፤ ሉቃሳ 20:27-40)

23 ሀይቁዳ አሳይ ደንደና ግያ ሳዲቃዋናቱዋጥ እት እት አሳቱ ሄ ጋላስ የሱሳኮ ዪደ፣ ሀዋዳን ያጊደ፣ አ ኦቶድኖ፤

24 “ታማርሰያዎ፣ ሙሴ፣ ‘እት አሳይ ናአ የለናን ሀይቆጥ፣ ሄ ሀይቁዳዋ እሻይ አ ማቻቶ ላቲደ፣ ባረ እሻዉ ናአ የለናዉ በሴ’ ያጌዳ።

25 ኩናና ላፑ እሻቱ ደኢኖ፤ ባይራይ ማቻቶ አኪደ፣ ናአ የለናን ሀይቁዳ፤ ሄዋጥ ጉይያን አ ማቻቶ አ እሻይ አኬዳ።

26 ቃይ ላኢንሳያዌካ ሀይቁዳ፤ ሄዘላያዌካ፣ ላፑንላ ጋካናዉካ ሄዋዳን ሀኔድኖ።

27 ኡባጥ ጉይያን፣ ሄ ምሽራታ ሀይቃዲ።

28 ያቶና፣ ሀይቁዳ አሳይ ሀይቁዋጥ ደንድያ ጋላስ ሄ ምሽራታ ላፑናቱዋጥ ሀቃዎ ማቼ ግዳኔ? አያው ጎጥ፣ ላፑናቱ ኡባይካ እዘ አኬድኖ” ያጌድኖ።

29 የሱስ ዛሪደ፣ ሀዋዳን ያጌዳ፤ “ጸሳ ማጸፋቱዋ ዎይ አ ዎልቃ ህንተንቱ ኤረና ድራዉ ባሊታ።

30 አያው ጎተ፡ ሀይቄዳ አሳይ ሀይቄዋጥ ደንድያ ጋላስ፡ ሳሉዋን ደእያ ኪታንቻቱዋ ማላ ግዳናጥ አትን፡ አቱማ አሳይነ አከና፤ ማጫ አሳይነ ገለና።

31-32 ሸን ሀይቄዳዋንቱ ደንዲዋባ ግደጥ፡ ጸሳይ፡ ‘ታን አብራሃመ ጸሳ፡ ይሳቃ ጸሳ፡ ያቆባ ጸሳ’ ያጊደ ህንተው ኦዴዳዋ ኡባካ ናባብ በይክቱ? ጸሳይ ፓጻ ደእያዋንቱ ጸሳ ግድያዋጥ አትን፡ ሀይቄዳዋንቱ ጸሳ ግደና” ያጌዳ።

33 ዳሮ አሳይ ሄዋ ሰሲደ፡ አ ትምርትያን ማላለቲድና።

ኡባጥ አድያ አዛዙዋ
(ማር. 12:28-34፤ ሉቃሳ 10:25-28)

34 ሸን የሱስ ሳዲቃዋናቱዋ ጮኤ ኦፊዳዋ ፓርሳዋቱ ሰሴዳ ዋደ፡ እትሳ ሸቄድና።

35 ኡንቱንቱ ግደጥ ህግያ ታማርሰያ እቱ፡ የሱሳ ፓጫናው እትባ ኦቼዳ።

36 “ታማርሰያዎ፡ ህግያ ግዲዋን ኡባጥ አድያ አዛዙ ሀቃዌ?” ያጊደ አ ኦቼዳ።

37 የሱስ ዛሪደ፡ ሀዋዳን ያጌዳ፤ “ ኔን ጎዳ ነ ጸሳ ነ ኩመንላ ዋዛናጥ፡ ነ ኩመንላ ሸምቹዋጥ፡ ነ ኩመንላ ቆፋጥ ሲቃ” ያጌዳ።

38 ሄዌ ኡባጥ ዳርያ አዛዙዋን ቃይ ኡባጥ አድያ አዛዙዋ።

39 ቃይ ላኤንልያ አዛዙካ አ ማላ፤ ሄዌ፡ ኔን ነ ሸሩዋ ነ ሁጲያዳን ሲቃ” ግያዋ።

40 ሙሴ ህግያ ኡባይነ ናባቱዋ ትምርቲ ሀ ላኤ አዛዙቱዋን ቃሸቱ” ያጌዳ።

ክርስቶሳባ ኦቼዳ ኦሻ
(ማር. 12:35-37፤ ሉቃሳ 20:41-44)

41-42 ፓርሳዋቱ እትሳ ሸቄዳሳን የሱስ ኡንቱንታ፡ “ክርስቶሳባ ዋጊደ ቆጥቱ? እ ኦ ናኤ?” ያጊደ ኦቼዳ።

ኡንቱንቱ፡ “ክርስቶስ ዳዊታ ናኦ” ያጌድና።

43 የሱስ ኡንቱንታ፡ “ያትና፡ ዳዊተ ባረና ጌሻ አያናይ ሃሳይሰና ክርስቶሳባ ዋጊደ፡ ‘ጎዳ’ ጊደ ጸሲ?”

44 ቃይካ ዳዊተ፡

“ጎዳይ ታ ጎዳ፡ ታን፡ ና ሞርከቱዋ፡

ኔን የጳ ኤቂያዋ ኦሳና ጋካናው፡

ሀዋን ታፕ ኡሽቻ ባጋና ኡታደ ታናና እትፕ ዳናታ ጌዳ፣
 ያጌዳ።
 45 ዳዊተ ክርስቶሳ፣ ‘ጎዳ፣ ጊደ ጸሶፕ፣ ያትና፣ ክርስቶስ ዋኒደ ዳዊታ ናኣ ግዲ?’” ያጌዳ።
 46 የሱሳዉ እት ቃላ ዛራናዉ ዳንዳዬዳ እት አሳይነ ባዋ፤ ቃይ ሄ ጋላሳፕ ደምና፣ ሀራ ኦሻ ኦ ኦቻናዉ ጸሌዳዌ ኦንነ ባዋ።

23

ሙሴ ህግያ ታማርሰያዋንቱነ ፓርሳዋቱዋ ኢታተላ
 (ማር. 12:38-39፤ ሉቃሳ 11:43-46፤ 20:45-46)

1 ሄዋፕ ጉይያን፣ የሱሰ ሺቄዳ አሳዉነ ባረና ካልያዋንቶ ሀዋዳን ያጊደ ሃሳዬዳ፤

2 “ህግያ ታማርሰያዋንቱነ ፓርሳዋቱ ሙሴ ህግያ ታማርሰያ ማታና ደኢና።

3 ሄዋ ድራዉ፣ ህንተንቱ ኦላና ማላ፣ ኡንቱንቱ ህንተንታ አዛዝያ ኡባባ ኦሐተነ ቃይ ናግተ፤ ሸን ኡንቱንቱ ኦሐያዋዳን ኦሐፕተ፤ ኢያዉ ጎፕ፣ ኡንቱንቱ ባረንቱ ኦድያዋ ኦሐክና።

4 ቶካናዉ ዴጽያ ቶኩዋ ኡንቱንቱ ቃቺደ፣ አሳ ቶሲና፤ ሸን ባረንቱ ሁጲያን ሀራይ አቶ፣ ሄ ቶኩዋ ብራድያን ቦቻናዉካ ኮይክና።

5 “ሸን ኡንቱንቱ ባረንቱ ኦሱዋ ኡባ አሳይ በኦናዳን ኦሐና፤ ኢያዉ ጎፕ፣ ባረንቱ ሶምኢያንነ ባረንቱ ኩሽያ ቀሰያን ቃቻያ ጽቅሰያና ደኢያ ክታፋ አሲና ባረንቱ ማዩዋ ማጫራካ ኡዲሲና።

6 አሳይ ባረንታ ሾቢደ አፎሳን ቦንቾ ኡቱዋ ደሲና፤ ቃይ አይሁዳ ዋሳ ጎለቱዋንካ ዳሮ ሎኢያ ኦይድያ ደሲና።

7 አሳይ ገዋን ባረንታ ቦንቺደ ሳርታና ማላነ ‘ታማርሰያዋ’ ጊደ ባረንታ ጸሳናዳን ኮዩና።

8 “ሸን ህንተንታ ታማርሰያዌ እቱዋ ጸላላ ግዴዳ ድራዉነ ህንተንቱ ኡባይ እሻቱዋ ግዴዳ ድራዉ፣ እቱ እቱዋ፣ ‘ታማርሰያዋ’ ጊደ ጸሶፕተ።

9 ሀ ሳኣን ኦናነ ‘አዉዋ’ ጊደ ጸሶፕተ፤ ኢያዉ ጎፕ፣ ህንተንቶ ሳሉዋን ደኢያ እት አዉ ደኤ።

10 እቱ እቱዋ፣ ‘ታማርሰያዋ’ ጊደካ ጸሶፕተ፤ ኢያዉ ጎፕ፣ ህንተንቶ እት ጎዳይ፣ ክርስቶሳ ጸላላይ ደኤ።

11 ህንተንቱ ግደን ኡባፕ ዳርያዌ ህንተንቶ ቆማ ግዳናዉ በሴ።

12 ባረና ዳርሰያዌ ኦንነ ቶሽታና፤ ቃይ ባረና ቶችያዌ ኦንነ ቶቁ ጋና።

ህግያ ታማርሰያዋንቱነ ፓርሳዋቱ ቦረቴድኖ
(ማር. 12:40፤ ሉቃሳ 11:39-42፤ 44፤ 52፤ 20:47)

13 “ሎእ ማላትያ ኢታቶ፡ ህግያ ታማርሰያዋንቶነ ፓርሳዋቶ፡ አሳዉ ሳሉዋ ካዉተላ ህንተንቱ ጎርድያ ድራዉ፡ ህንተንቶ እየሮ፤ እያዉ ጎፕ፡ ህንተንቱ ሁጳዉነ ገልክታ፤ ቃይ ገላናዉ ኮይያዋንታካ ገልሰክታ።

14 “ሎእ ማላትያ ኢታቶ፡ ህግያ ታማርሰያዋንቶነ ፓርሳዋቶ አምኤቱዋ ጎልያ ህንተንቱ ቦንቂደ፡ ህንተንቶ ሎእ ማላታናዉ ጸሳ ዋሳ አዲሲታ፤ ሄዋ ድራዉ፡ ህንተንቶ እየሮ፤ ኡባፕ አድያ ፕርዳ ህንተንቱ አካና።

15 “ሎእ ማላትያ ኢታቶ፡ ህግያ ታማርሰያዋንቶነ ፓርሳዋቶ ህንተንቱ እት ኡራ አማንላናዉ አባንነ ሳኣን ዩይያ ድራዉነ ቃይ ህንተንቱ አ አማንላያ ዋደ፡ ሄ ኡራ ህንተንቱዋፕ ላኡ ኩሽያ አቴዳ ጋናመዉ ናእ ኦላያ ድራዉ፡ ህንተንቶ እየሮ።

16 “ ሓንነ ጌሻ ጎልያን ጫቆፕ፡ አይነ ባዋ፤ ሽን ጌሻ ጎልያን ደእያ ዋርቃን ጫቆፕ፡ ሄ ጫቁ አ ጋኬ’ ግያ ህንተንቶ ቆቅ ኡቲደ አሳ ካለላያዋንቶ፡ ህንተንቶ እየሮ።

17 ሀ ኤያቱ፡ ሀ ቆቃቱ፡ ዋርቃይ አዲዬ? ዋርቃ ጌሻ ኦላያ ጌሻ ጎሊ አዲ?

18 ቃይ ህንተንቱ፡ ሓንነ ያርሹዋ ያርሽያባን ጫቆፕ፡ አይኔካ ባዋ፤ ሽን ኦንነ አ ቦላ ደእያ ያርሹዋን ጫቆፕ፡ ሄ ጫቁ አ ጋኬ’ ያገደ ታማርሲታ።

19 ሀ ኤያቱ፡ ሀ ቆቃቱ፡ ያርሹ አዲዬ? ዋይ ያርሹዋ ጌሻ ኦላያ አ ያርሽያባይ አዲ?

20 ሄዋ ድራዉ፡ ያርሹዋ ያርሽያባን ጫቂያ ኡራይ ሄ ያርሽያዋንካ ጫቂ፤ ቃይ አ ቦላ ደእያ ኡባባንካ ጫቂ።

21 ጌሻ ጎልያን ጫቂያ ኡራይ፡ ሄ ጌሻ ጎልያንነ አ ግደን ደእያ ጸሳን ጫቂ።

22 ሳሉዋን ጫቂያ ኡራይ፡ ጸሳ ካዉተላ ኦይድያንነ ሄ ኦይድያን ኡትያዋን ጫቂ።

23:22 እሳ. 66:1፤ ማቶላ 5:34

23 “ሎአ ማላትያ ኢታቶ፡ ህግያ ታማርሰያዋንቶነ ፓርሳዋቶ፡ ህንተንቶ አየር። አያው ጎጥ፡ ካረላ አኑጋጥ፡ ሸላርያጥነ ኦካሽያጥ አሰራታ ህንተንቱ እሚታ፤ ሸን ህግያን ደእያ ዳሪ ኮሽያዋንታ አጊታ፤ ሄዋንቱ ፕርዳ፡ ማሮተላነ ጽሎተላ። ሀራንታካ አገናን፡ ህንተንቱ አላናው በሰያ የዋቱ ሀዋንታ።

24 ህንተንቶ ቆቅ ኡቲደ፡ አሳ ካለልያዋንቶ፡ ህንተንቱ ኡሻጥ ኡዲንጽያ ጋጨደ፡ ጋሉዋ ሞቲታ።

25 “ሎአ ማላትያ ኢታቶ፡ ህግያ ታማርሰያዋንቶነ ፓርሳዋቶ፡ ህንተንቶ አየር። አያው ጎጥ፡ ህንተንቱ ሻታነ ከርያ ቦላ ባጋ ጌሺታ፤ ሸን እ ግዲዋን ቦንቂያንነ ኡዘተላን ኩንፊድታ።

26 ሀ ቆቃ ፓርሳዊው፡ ሻታነ ከርያ ጋርሳ ካሰታደ ጌሻ ድጋ፤ ሄዋጥ ጉይያን፡ ቦላ ባጋይካ ጌሻ ግዳናዋ።

27 “ሎአ ማላትያ ኢታቶ፡ ህግያ ታማርሰያዋንቶነ ፓርሳዋቶ፡ ህንተንቶ አየር። አያው ጎጥ፡ ካረ ባጋና ቦሽንቻን ኦከቲደ፡ ሎኦ ኡቲደ፡ ቃይ ጋርሳ ባጋና ሀይቄዳ አሳ ሙቀላይነ ዎቄዳባይ ኡባባይ ኩሚዳ ዲፎቱዋ ማላቲታ።

28 ሄዋዳንካ፡ ቃይ ቦላ ባጋና አሳ ኡባው ጽሎዋ ማላቲታ፤ ሸን ህንተንቶ ጋርሳ ባጋና ሎአ ማላትያ ኢታተላይነ ማካላይ ኩም ኡቴዳ።

29 “ሎአ ማላትያ ኢታቶ፡ ህግያ ታማርሰያዋንቶነ ፓርሳዋቶ፡ ህንተንቶ አየር። አያው ጎጥ፡ ናባቱዋ ዲፋዋ ቦላ ጎልያ ኬጺታ፤ ቃይ ጽላቱዋ ዲፋዋካ ሎይሊታ።

30 ቃይ ህንተንቱ፡ ናኑን በን ኑ አዎቱዋ ዎደ ደኤዳዋንታ ግድንቶ፡ ኡንቱንቱና እትጥ ናባቱዋ ዎጶኮ ሸን፣ ያጊታ።

31 ሄዋ ግደጥ፡ ናባቱዋ ዎጶዳዋንቱ ናና ህንተንቱ ግዴዳዋ ህንተንቱ ሁጺያን ማርካቲታ።

32 ሰም ህንተንቱ አዎቱ ደሜዳዋ ፖልክቴ!

33 “ሀ ሸሻቶ፡ ሸሻ ናናው፡ ጋናምያ ፕርዳጥ ዋኒደ አታንቱ?

34 ሄዋ ድራው፡ በይተ፡ ታን ናባቱዋ አጶ ኤራንቻቱዋን ህግያ ታማርሰያዋንታ ህንተኮ ኪታና። ኡንቱንቱጥ እቱዋ እቱዋ ህንተንቱ ዎጶናን ማሰቃልያ ቦላ ሞሰማርያን ድሺደ ካቃንታ፤ ቃይ እቱዋ እቱዋ ህንተንቱ ዎሳ ጎለቱን ልሱዋን ሸጫንታነ ካታማጥ ካታማ የደርሳንታ።

35 ሄዋ ድራው፡ ጽሎዋ አቤላ ዎጶደጥ ደሚደ፡ ጌሻ ጎልያጥነ ያርሽያ ሳጥ ግዲዋን ህንተንቱ ዎጶዳ ባራክያ ናኦ ዛካራሳ

ዎድያ ጋካናው፡ ሀይቄዳ ጽላቱዋ ኡባቱዋ ሱላ ድራው፡ ሀንተንቱ ሙረታንታ።

36 ታን ሀንተንቶ ቱሙዋ ኦዳይ፤ ሀ ኡባባይ ሀ ዎድያ አሳ ቦላ ጋካናዋ።

የሩሳላመዉ አደቲዳ ሞኖ ኦዲዋ
(ሉቃሳ 13:34-35)

37 “የሩሳላመ ካታማ አሳው፡ የሩሳላመ ካታማ አሳው፡ ናባቱዋ ሀንተንቱ ዎዲታ፤ ጸሳይ ሀንተንቱኮ ኪቲዳዋንታካ ሹቻን ጫዲታ፤ ኩታታ ባረ ማራቱዋ ባረ ቀፍያን ሀጸያዋዳን፡ ታን ሀንተንቱ አሳ እትሳ ሺሻናዉ አፑ ካላ ኮያድታ! ሸን ታና ድጌድታ።

38 በእተ፡ ሀንተንቱ ጎሊ ኡባካ ኦና ግዳናዋ።

39 እያዉ ጎፐ፡ ታን ሀንተንቶ ኦዳይ፤ ሀንተንቱ፡ ‘ጎዳ ሱንላን ይያዌ አንጀቲዳዋ ጋና ጋካናው፡ ላኤንሉዋ ታና በእክታ’ ጋይ” ያጌዳ።

24

የሱስ ጌሻ ጎሊ ኮለታናዋ ካስቲደ ኦዴዳ
(ማር. 13:1-2፤ ሉቃሳ 21:5-6)

1 የሱስ ጌሻ ጎልያፕ ከሲደ ብያ ዎድ፡ ጌሻ ጎልያ ድርሳ ግደን ደእያ ጎልያ በሳናዉ ኦ ካልያዋንቱ አኮ ዬድኖ።

2 የሱስ ዛሪደ ኡንቱንታ፡ “ሄዋ ኡባ በኢቲ? ታን ሀንተንቶ ቱሙዋ ኦዳይ፤ ሀ ጎለቱዋን ደእያ እት ሹቻይነ አተናን ኡባይ ኮለታና” ያጌዳ።

ዎድያ ወርሰላባ
(ማር. 13:3-13፤ ሉቃሳ 21:7-19)

3 የሱስ ደብረ ዛይተ ጌተትያ ደርያ ቦላን ኡት ደእሸን፡ ኦ ካልያዋንቱ ባረንቱ ጸላላ አኮ ዬደ እ፡ “ሄዌ አዉደ ሀናንንቶ፡ ኑዉ ኦዳርኪ፤ ቃይ ነ ዩሳዉነ ዎድያ ወርሰላዉ ማላይ አያ ግዳኔ?” ያጌድኖ።

4 የሱስ ዛሪደ፡ ኡንቱንታ ሀዋዳን ያጌዳ፤ “ሀንተንታ ኦንነ ባለፍ ማላ ናገትተ።

5 እያዉ ጎፐ፡ ዳር አሳይ ታ ሱንላን፡ ‘ታን ክርሰቶሳ’ ያጌደ ያና፤ ያቲደ ዳር አሳ ባለላና።

23:35 ደመላ 4:8፤ 2 ኦዲዋ 24:20-21 23:38 ኤር. 22:5 23:39 ማዝ. 118:26

6 ማጎን ደእያ ኦላ ዋሱዋን ሃኩዋን ደእያ ኦላ ኦዲዋ ሰሳናዉ ህንተንቱ ደኢታ፤ ሄዋ ማላባይ ሀናናዉ በሰያ ድራዉ፣ ናገትተ፤ ሀርጎፕተ፤ ሽን ዉርሰላይ ብራ።

7 እያዉ ጎፕ፣ እት ጋድያ አሳይ ሀራ ጋድያ አሳና ኦላታና፤ ቃይ እት ካዉተላይ ሀራ ካዉተላና ኦላታና፤ ኮሻይን ቢታ ቃላይ ኡባ ሳን ደእናዋ።

8 ሄዌ ኡባይካ ኮይሮ ኦይላ ማላ።

9 “አሳይ ሄ ዋደ ህንተንታ ዋይሳናን ዋዳናዋ፤ ታ ሱንላ ድራዉ፣ ጋደ ኡባይ ህንተንታ እጻናዋ።

10 ሄ ዋደ ጮራ አሳይ እማኑዋ አጋናዋንታ፤ ባረንቱ ግደን እቱ እቱዋ አሲደ እማናን እቱ እቱዋ እጻናዋ።

11 ቃይ ዋርዶ ናባቱ ጮራቱ ደንዲደ፣ ዳር አሳ ጭማናዋንታ።

12 ማካላይ ዳርያ ድራዉ፣ ጮራ አሳ ሲቁ እርጻናዋ።

13 ሽን ዉርሰላይ ጋካናዉ ገንጭያ ኡራይ አታናዋ።

14 አሳዉ ኡባዉ ማርካ ግዳና ማላ፣ ካዉተላ ዋንጋላ ሞሽራቹ ሳኦ ኡባን ኦደታናዋ፤ ሄዋፕ ጉይያን፣ ዉርሰላይ ጋካናዋ።”

ባሻ ቱናተላ

(ማር. 13:14-23፤ ሉቃሳ 21:20-24)

15 “ሄዋ ድራዉ፣ ናብያ ዳኔል ኦይዳ ባሻ ቱናተላይ ጌሻ ሳን እቆዳዋ ህንተንቱ በእና፤ ሄዌ ዋግያዌንቶ፣ ናባብያዌ እኩኮ።

16 “ይሁዳ ጋድያን ሄ ዋደ ደእያዋንቱ ደርያኮ ከሰና።

17 ጎልያ ሁጲያን ደእያ ኡራይካ ባረ ሶይን ደእያዋ አካናዉ ዋጵፖ።

18 ጋደን ደእያዌ ባረ ማዩዋ አካናዉ ጉዩ ሰዋፖ።

19 ሄ ዋደ ሻሃራ ማጫዋንቶን ዳንላያ ማጫዋንቶ አየሮ።

20 ባልጉዋን ዋይ ሳምባታን ህንተንቱ በተና ማላ፣ ጸሳ ዋስተ፤

21 እያዉ ጎፕ፣ አላሚ መቆደፕ ሀቼ ጋካናዉ ደእቤናባይን ቃይ ሀዋፕ ሰንሳዉካ ኡባ ደኤና ኢታ ዋዪ ሄ ዋደ ደእናዋ።

22 ጸሳይ ሄ ጋላሳቱዋ ፓይዲዋ ጉሐያዌ ባዌንቶ፣ አሳ ግዴዳ ኦንን አተና፤ ሽን እ ባረ ዶራዳ አሳቱዋ ድራዉ፣ ሄ ጋላሳቱዋ ፓይዲዋ ጉላናዋ።

23 “ሄ ዋደ ኦንን ህንተንታ፣ ‘በእተ። ክርሰቶሰ ሀዋን ደኤ’ ዋይ፣ ‘ሄዋን ደኤ’ ያጎፕ አዋ እማኖፕተ።

24:9 ማቶሳ 10:22 24:15 ዳኔላ 9:27፤ 11:31፤ 12:11 24:21 ዳኔላ 12:11፤ ሳፃ 7:14

24 እያው ጎጥ፡ ዋርዶ ክርስቶስቲኑ ዋርዶ ናባቱ ደንዳና፤ ያቲደ ባረንቶ ዳንዳየቶ፡ ሀራይ አቶ ጸሳይ ደሬዳዋንታካ ባለላናው ዋልቃማ ማላታን ማላልሰያባ በሳናዋ።

25 በአተ፡ ታን ህንተው ሄዋ ካሰታደ ኦዳድ።

26 “ሄዋ ድራው፡ አሳይ ህንተንታ፡ ‘በአተ፡ ክርስቶስ ባዙዋን ደኤ’ ጎጥ፡ ያ ቦፕተ፤ ዋይ ህንተንታ፡ ‘በአተ፡ ቆልኦን ደኤ’ ግንቶካ፡ ኡንቱንቱባ አማኖፕተ።

27 እያው ጎጥ፡ ዋልቃንሳይ አዋይፊ ዶልያ ባጋፕ ዋልቃሚደ፡ አዋይፊ ዉልያ ባጋ ጋካናው ጸልቁ ግያዋዳን፡ ታ ዩሳይ፡ አሳ ናኣ ዩሳይ፡ ሄዋዳን ሀናናዋ።

28 “ባኩታይ ደኢያሳ ሾርቲ ሺቃና።”

አሳ ናኣይ፡ ክርስቶስ ላኤንፉዋ ያና
(ማር. 13:24-27፤ ሉቃሳ 21:25-28)

29 “ሄ ዋደ ዋይያፕ ጉይያን፡

ኤለካ አዋይ ቋማና፤

አገናይ ፖእያዋ አጋናዋ፤

ጸልንታቱ ሳሉዋፕ ኩንዳናዋንታ፤

ቃይ ሳሉዋን ደእያ ዋልቃቱካ ቃጸታናዋንታ።

30 ሄ ዋደ ታ ማላይ፡ አሳ ናኣ ማላይ፡ ሳሉዋን ቤታናዋ፤ ሳኣን ሄ ዋደ ደእያ አሳ ዛሪ ኡባይ ዩካናዋንታ። ቃይ ታን፡ አሳ ናኣይ፡ ዋልቃናን ዋልቃማ ቦንቹዋና ሳሉዋፕ ሻርያ ግደና ዩሸን፡ ኡንቱንቱ በአና።

31 እ ባረ ኪታንቻቱዋ ዋልቃማ ማላካታና ኪታና፤ ኪታንቻቱ አላመዉ ሀ ጋጸፕ ያ ጋጸ ጋካናው፡ ቃይ ሳኣን ኦይዱ ባጋፕ እዉ ደረቱዳ አሳ ሺሻናዋ።

ጎዳይ ያና ጋላሳ ማላታ
(ማር. 13:28-31፤ ሉቃሳ 21:29-33)

32 “ሌምሱዋ ባላሳቶ ጌተትያ ምላትፕ አኬክተ፤ ባላሳታ አጭያ ዋደን እዝ ሀይላይ ቆለትያ ዋደ፡ ቦኒ ማቴዳዋ ህንተንቱ ኤራንታ።

33 ሄዋዳንካ፡ ህንተንቱ ሄ ኡባባ በእያ ዋደ፡ እ ማቲደ ፐንግያ ሺቄዳዋ ኤርተ።

34 ታን ህንተንቶ ቱሙዋ ኦዳይ፤ ሀ ኡባባይ ሀናና ጋካናው፡ ሀ ዋድያ አሳይ ሀይቂድገና።

24:29 አሳ. 13:10፤ 34:4፤ ህዝ. 32:7፤ እዩ. 2:10፤ 31፤ 3:15፤ ሳዓ 6:12-13
24:30 ዳኤላ 7:13፤ ዛካ. 12:10-14፤ ሳዓ 1:7

35 ሳሉነ ሳኪይ ኦጳና፤ ሽን ታ ቃላይ ኡባካ ከ□ና።

ጎዳይ ያና ጋላሳ ኦንነ ኤረና
(ማር. 13:32-37፤ ሉቃሳ 17:26-30፤ 34-36)

36 “ሽን ሄ ጋላሳነ ሄ ሳትያ አዉዋ ጸላላፕ አትን። ሀራይ አቶ ሳሉዋን ደእያ ከታንቻቱዋ ግድና። ዋይ ታና ናኦ ግድናካ ኦንነ ኤርያዌ ባዋ።

37 ታ ዩሳይ፣ አሳ ናኦ ዩሳይ፣ ኖሄ ዋደ ሀኖዋ ማላ ግዳናዋ።

38 እያዉ ሳፕ፣ ባሻ ሃላ ዩሳፕ ካሰ ዋደ፣ ኖሄ ማርካብያን ገሌዳ ጋላሳይ ጋካናዉ። አሳይ ሜነ ኡሼነ፤ ቃይ አቱማ አሳይ አኬነ ማጫ አሳይ አሰና ገሌ።

39 ባሻ ሃላይ ዩደ፣ ኡንቱንታ ኡባ አፋና ጋካናዉ፣ ኡንቱንቱ አኬክበይክኖ፤ ታን፣ አሳ ናኦይ፣ ይያ ዋዲ፣ ሄዋ ማላ ግዳናዋ።

40 “ሄ ዋደ ላኡ አሳቱ ጋደን አላያዋንቱፕ እቱዋ አፋና፤ እቱ አታናዋ።

41 ላኡ ማጫዋንቱ ዋጸን ጋጭያዋንቱፕ እትኖ አፋና፤ እትና አታና።

42 “ሰም ሀንተ ጎዳይ አይ ጋላሰ ያናዌንቶ ሀንተንቱ ኤረና ድራዉ፣ ናግ ኡትተ።

43 ሽን ካይሱ ቃማፕ ዋይሳ ዋድያን ያነንቶ ጎልያ ጎዳይ ኤሬደንቶ፣ ባረ ጎሊ ቦከተና ማላ፣ ቤጎቲደ ናግ ኡታናዋ ኤርተ።

44 ሄዋ ድራዉ፣ ሀንተንቱካ ጊግ ኡትተ፤ እያዉ ሳፕ፣ ታን፣ አሳ ናኦይ፣ ሀንተንቱ ቆፕና ሳትያን ያና።

ኢታነ ሎኦ ቆማ ሊምሱዋ
(ሉቃሳ 12:41-48)

45 “ያትና፣ ባረ ሶይ አሳዉ ቁማ ኮሽያ ዋድያን እማና ማላ፣ አ ጎዳይ ሱንጮዳ አማነቱዳ ዋዛናማ ቆማይ ኦኔ?

46 እ ሄዋዳን አላሽን፣ አ ጎዳይ ዩደ ደምያ ቆማይ አንጀቱዳዋ።

47 ታን ሀንተንቶ ቱሙዋ ኡዳይ፤ ጎዳይ ሄ ቆማ ባረዋ ኡባ ቦላ ሱንላና።

48 ሽን ቆማይ ኢታ ግደፕ፣ ‘ታ ጎዳይ ጋምኢደ ያናዋ’ ያጊደ ባረ ዋዛናን ቆፕደ።

49 ባረ ላገላ ቆማቱዋ ዋቆ ደሞፕ፣ ማላትያዋንቱና ሞፕነ ኡሾፕ።

50 ሄ ቆማ ጎዳይ እ ቆፕቤና ጋላሳን እ ኤርቤና ሳትያን ያና።

51 ሄዋጥ ጉይያን እ ቃንጸሬሌደ፡* ሎኦ ማላትያ ኢታ አሳቱ ደእያ ሳን ዎሐና፤ ሄዋን እ ዬካናን አቻ ጳቃና።

25

ታሙ ዎደራቱዋ ሌምሱዋ

1 “ሄ ዎደ ሳሉዋ ካወተላይ ባረንቱ ኩራዝያ ኦይቂደ፡ ማቻቶ አክያዋ ሞካናዉ ካረ ከሴዳ ታሙ ዎደራቱዋ ማላታና።

2 ኡንቱንቱፕ እቼሻቱ ቦዛቱዋ፤ ቃይ እቼሻቱ ጭንጫ።

3 ቦዛቱ ባረንቱ ኩራዝያ ኦይቂድኖ፤ ሸን ላምባ ኦይቂበይክና።

4 ሸን ጭንጫቱ ባረንቱ ኩራዝያን ጸራሙሰያን ላምባ ኦይቂድኖ።

5 ማቻቶ አክያዌ ዬናን ጋምእና፡ ሄ ዎደራቱ ባረንታ ገምእሸሰና ግሰ እጌድኖ።

6 “ብላሄ ግዴዳ ዎደ፡ ብእተ፡ ማቻቶ አክያዌ ጋኬዳ፤ አ ሞካናዉ ካረ ከሰተ፣ ያግያ ዎልቃማ ጫቡ ደንዴዳ።

7 “ሄ ዎደ ሄ ዎደራቱ ኡባቱ ቤጎቲደ፡ ባረንቱ ኩራዝያ ጊግሴድኖ።

8 ቦዛቱ ጭንጫቱዋ፡ ኡ ኩራዝ ቶእና ሀንያ ድራዉ፡ ሀንተንቱ ላምባፕ ኡዉ እሚርክቱ፣ ያጌድኖ።

9 “ሸን ጭንጫቱ ዛሪደ ኡንቱንታ፡ ኣግተ፡ ኡዉን ሀንተንቶ ግደና፤ ሄዋ ድራ ሀንተዉ ዛልእያዋንቱኮ ቢደ ሻም አክተ፣ ያጌድኖ።

10 ሄዋጥ ጉዩ ቦዛ ዎደራቱ ላምባ ሻማናዉ ብድግና፡ ማቻቶ አክያዌ ፑቱ ጊና፡ ጊግ ኡቴዳ እቼሹ ዎደራቱ አናና እትፕ ቡላቻ ጎልያ ገሌድኖ፤ እፍላይካ ጎርደት አጌዳ።

11 “ጉዩፕ ቃይ የኮ ዎደራቱ ዪደ፡ ኣጎዳዉ፡ ጎዳዉ፡ ኡዉ ደያርኪ፣ ያጌድኖ።

12 “ሸን ማቻቶ አክያዌ ዛሪደ፡ ኣታን ሀንተንቶ ቱሙዋ ኦዳይ፤ ታን ሀንተንታ ኤርከ፣ ያጌዳ።

13 “ሰም ታን፡ አሳ ናአይ፡ ያና ጋላሳ ዎይ ሳትያ ሀንተንቱ ኤረና ድራዉ፡ ናግ ኡትተ።

ሄዙ ቆማቱዋ ሌምሱዋ (ሉቃሳ 19:11-27)

* 24:51 እ ቃንጸሬሌደ፡- ጉሳይ ከሰ ካረ ኦላናዋ ግያዋ።

14 “እያው ጎጥ፣ ሳሉዋ ካውተላይ ባረ ቆማቱዋ ጸሲደ፣ ባረው ደእያዋ ኡንቱንቶ ሹጲደ፣ ኦግያ ባና ሀንያ ብታንያ በሴ።

15 ኡንቱንቱ ሁጲያን ሁጲያን ኡንቱንቱ ዋልቃ ኬና እቶ እቼሹ ሻእ ብራ፣ እቶ ላኡ ሻእ ብራ፣ ቃይ እቶ እት ሻእ ብራ እሚደ፣ ባረ ኦግያ ቤዳ።

16 እቼሹ ሻእ ብራ አኬዳ ቆማይ ኤለካ ቢደ ዛልኢደ፣ ሀራ እቼሹ ሻእ ብራ ዋድሴዳ።

17 ሄዋዳንካ፣ ቃይ ላኡ ሻእ ብራ አኬዳ ቆማይ ሀራ ላኡ ሻእ ብራ ዋድሴዳ።

18 ሸን እት ሻእ ብራ አኬዳዌ ቢደ፣ ኦላ ቦኪደ፣ ባረ ጎዳ ሚሻ ሞግ እኬዳ።

19 “ዳር ዋድያፕ ጉይያን፣ ሄ ቆማቱዋ ጎዳይ ዪደ፣ ባረ ሚሻ ኡንቱንቱና ሄተቱዳ።

20 እቼሹ ሻእ ብራ አኬዳ ቆማይ ዪደ፣ ሀራ እቼሹ ሻእ ብራ ሹጲደ፣ ታ ጎዳዉ፣ ኔን ታዉ እቼሹ ሻእ ብራ እማዳ፤ በአ፣ ሀራ እቼሹ ሻእ ብራ ዋድሳድ፣ ያጌዳ።

21 አ ጎዳይ አ፣ ‘ሀያናሾ! ኔን ሎአነ አማነትያ ቆማ፤ ኔን ጉላባን አማነታዳ። ታን ኔና ዳርባዉ ካፖ ኦላና፤ ሃ ገላደ ነ ጎዳና ናሽታ፣ ያጌዳ።

22 “ቃይ ላኡ ሻእ ብራ አኬዳዌካ ዪደ፣ ታ ጎዳዉ፣ ኔን ታዉ ላኡ ሻእ ብራ እማዳ፤ በአ፣ ታን ሀራ ላኡ ሻእ ብራ ዋድሳድ፣ ያጌዳ።

23 አ ጎዳይ አ፣ ‘ሀያናሾ! ኔን ሎአነ አማነትያ ቆማ፤ ኔን ጉላባን አማነታዳ። ታን ኔና ዳርባዉ ካፖ ኦላና፤ ሃ ገላደ ነ ጎዳና ናሽታ፣ ያጌዳ።

24 “እት ሻእ ብራ አኬዳዌ ቃይ ዪደ፣ ታ ጎዳዉ፣ ኔን ዘራቤናሳፕ ቆይጭያ አሳ ግድያዋነ ካላ ላላቤናሳፕ ማጽያ መቀሰ ባይና አሳ ግድያዋ ታን ኤራይ።

25 ታን ያያድ፤ ያታደ ባደ ነ ብራ ቢታን ሞጋድ፤ በአ፣ ነ ብራይ ሀዌኩ፣ ያጌዳ።

26 “አ ጎዳይ ዛሪደ፣ አ ሀዋዳን ያጌዳ፤ ‘ሀ ኢታ አዛላ ቆማዉ፣ ታን ዘራቤናሳፕ ቆይጭያ አሳ ግድያዋነ ካላ ላላቤናሳፕ ማጽያ አሳ ግድያዋ ኤራዲ?

27 ያትና፣ ኔን ታ ሚሻ ዋድሰያዋንቱ ማታን ዋጼዳዋ ግድንቶ፣ ታን ሰሞያ ዋደ ታ ሚሻ ዋድያና አካናዋሽን አቱዳ።

28 ሄዋ ድራዉ፣ ሄ ሚሻ አፕ ዋሰ አኪደ፣ ታሙ ሻእ ብራይ ደእያዋ እሞተ።

29 አያው ጎጥ፡ ደእያ ኡባው ሀራይ ጉጀታና፤ እ ባረው ግድያዋጥ ደርሲደ እካና፤ ሸን ባይናዋ ሀራይ አቶ፡ ሄ አው ደእያ ጉላይካ አጥ አከታናዋ።

30 ጎኤና ቆማ ካረ ቆማ ከሰ ኦልተ፤ ሄዋን እ ዩካናን ባረ አቻ ቆቃና፣ ያጌዳ።

ዎድያ ወርሰላን ሀናና ፕርዳ

31 “ታን፡ አሳ ናአይ፡ ኪታንቻቱዋ ኡባቱዋና ቦንቹዋን ይያ ዎደ፡ ታ ቦንቹ ካውተላ ኦይድያን ኡታና።

32 ሳኣን ደእያ አሳይ ኡባይ ታ ሰንላ ሺቃናዋንታ፤ ሄምያዌ ደርሳቱዋ ዴቫቱዋጥ ሻክያዋዳን፡ ታን ሄ አሳ ላኡ ከሳደ ሻካና።

33 ቃይ ደርሳቱዋ ታጥ ኡሸቻ ባጋና ኤሳደ፡ ዴቫቱዋ ታጥ ሀድርሳ ባጋና ኤሳና።

34 “ሄዋጥ ጉይያን፡ ታን ካቲ ታጥ ኡሸቻ ባጋና ደእያዋንታ ሀዋዳን ያጋና፤ ሓ አቡ አንጄዳዋንቶ፡ ሃ ዪደ ሳአይ መቶደጥ ሀቼ ጋካናው፡ ሀንተንቶ ጊጌዳ ካውተላ ላትተ።

35 አያው ጎጥ፡ ታን ኮሻትና ምዜድታ፤ ሳመትና ኡሼድታ፤ እማላ ግዳደ ቢናካ ሞኬድታ።

36 ታን ካሎትና ማይዜድታ፤ ሀርግና በኤድታ፤ ቃሸትና ታኮ ጋኪደ ኦቼድታ፣ ያጋና።

37 “ሄዋጥ ጉይያን፡ ጽላቱ ዛሪደ፡ እ ሀዋዳን ያጋና፤ ሓዳው፡ ኔን ኮሻትና፡ አዉደ በኢደ ምዜደ? ዎይ ኔን ሳመትና፡ አዉደ በኢደ ኡሼደ?

38 ኔን እማላ ግዳደ ዪና አዉደ በኢደ ሞኬደ? ዎይ ኔን ካሎትና አዉደ ማይዜደ?

39 ቃይ ኔን ሀርግና፡ ዎይ ቃሸትና ኔኮ ቢደ አዉደ ኔና በኤደ? ያጋናዋንታ።

40 ታን ካቲ ዛሪደ፡ ሓን ሀንተንቶ ቱሙዋ ኦዳይ፤ ሀንተንቱ ሀ ታ እሻቱዋ ኡባጥ ሀራይ አቶ፡ ላፍያ እቶ ኦሌዳዋ ግድንቶካ፡ ሄዋ ታው ኦሌድታ፣ ያጋና።

41 “ሄ ዎደ፡ ታጥ ሀድርሳ ባጋና ደእያዋንታ ታን ያጋና፤ ሓ ሸቀቱዳዋንቶ፡ ታ ማታጥ ክችተ፤ ቢደ ጸላህያ ካፖን እ ኪታንቻቶ ጊጌዳ መድና ታማን ገልተ።

42 አያው ጎጥ፡ ታን ኮሻትና፡ ታና ምዝበይክታ፤ ሳመትና ኡሸበይክታ።

43 ታን እማላ ግዳደ ቢና፡ ታና ሞክበይክታ፤ ካሎትና ማይዘበይክታ፤ ቃይ ሀርግና፡ ቃሽትናካ ታና በእበይክታ፡ ያጋና።

44 “ሄ ዋደ ኡንቱንቱ ቃይ ሀዋዳን ያጊደ ዛራናዋንታ፤ ሳዳወ፡ ኔን ኮሻትና ዋይ ሳመትና፡ ዋይ እማላ ግዳደ ቢና ዋይ ካሎትና፡ ዋይ ሀርግና ዋይ ቃሽትና፡ አዉደ በኢደ፡ ኔና ማደናን እጾዶ?” ያጋናዋንታ።

45 “ሄ ዋደ ታን ካቲ ዛራደ ኡንቱንታ፡ ሳን ህንተንቶ ቱሙዋ ኦዳይ፤ ህንተንቱ ሀ ኡባፕ ላፍያ እቱዋ ማደናን እጾዳዌ፡ ታና ማደናን እጾዳዋ” ያጋና።

46 ሄዋንቱ መፅና ሙራዉ ባና፤ ሽን ጽላቱ መፅና ደኦ ባና” ያጌዳ።

26

የሱሳ ቦላ ማቀቴድኖ

(ማር. 14:1-2፤ ሉቃሳ 22:1-2፤ ዮሃ. 11:45-53)

1 የሱሰ ሀ ትምርትያ ኡባ ዉርሴዳ ዋደ፡ ባረና ካልያዋንታ፡

2 “ላኡ ጋላሳፕ ጉይያን፡ ፓሰጋ ባላ ቦንቶያ ጋላሳ ግድያዋ ኤሪታ። ሄ ጋላሰ ታና፡ አሳ ናኣ፡ አሳይ ማሰቃልያ ቦላ ሞሰማርያን ጅሺደ ካቃናዉ አሊደ እማና” ያጌዳ።

3 ሄ ዋደ ቄሳቱዋ ካፓቱነ ጋድያ ጭማቱ ቃያፋ ጌተትያ ቄሳቱዋ ኡባቱዋ ካፑዋ ዋጋ ጎልያን ሽቂደ፡

4 አሳይ ኤረናን የሱሳ ኦይቂደ፡ ዋጃናዉ ማቀቴድኖ።

5 ሽን ኡንቱንቱ፡ “አሳይ ዋላሳ ከሰና ማላ፡ ፓሰጋ ቦንቶያ ጋላሰ ሄዋ ኦሎኮ” ያጌድኖ።

እት ማጫ ሞሽራታ የሱሳ ሽቱዋ ጫጫፋዱ

(ማር. 14:3-9፤ ዮሃ. 12:1-8)

6 የሱሰ ቢታንያ ካታማን ኦሉዋ ሀርግያ ሰሞና ሶይን ደእሽን፡

7 እት ሞሽራታ አልባሰጽሮሳ ጌተትያ ሹቻፕ ኦሰቲዳ አልባሰጽሮሳ ባሪታ ኩሜዳ ዳሪ አልኦ ሽቱዋ አካደ ዬዳዉና ቁማ እ ሚና፡ ሄ ሽቱዋ የሱሳ ሁጲያን ጫጫፋዱ።

8 ሽን የሱሳ ካልያዋንቱ ሄዋ በኢደ፡ “ሀ ሽቱዋ ጮ ባይዙሳይ አያሴ?”

9 አያዉ ጎፕ፡ ሀ ሽቱዋ አልኦ ጋትያን ዛልኢደ፡ ሚሻ ህዬሳዉ እማናዉ ዳንዳየቱ” ያጌድኖ።

10 የሱስ ኡንቱንቱ ግያዋ ኤሪደ፣ ኡንቱንታ ሀዋዲን ያጌዳ፤ “ሀ ምሽራቶ አያዉ ዋይሲቴ? እዛ ታዉ ሎኦባ አላዱ።”

11 ህይዳቱ ኡባ ዋደ ህንተናና ደኢኖ፤ ሸን ታን ህንተናና ኡባ ዋደ ደእከ፤

12 እዛ ሀ ሸቱዋ ታ ቦላ ትግያዌ ታና ሞጋናዉ ገግሳናሳ።

13 ታን ህንተንቶ ቱሙዋ ኦዳይ፤ ሳእ ኡባን ሀ ዋንጋላ ምሽራቸዋ ኦድያሳን ሀቃንነ፣ አሳይ እዞ ዋዛና አፋና ማላ፣ እዛ ኡሴዳዌ ኦደታናዋ” ያጌዳ።

ይሁዳይ የሱሳ አሊደ እማናዉ የዉዋን ጊጌዳ
(ማር. 14:10-11፤ ሉቃሳ 22:3-6)

14 ሄ ዋደ ታማነ ላኡ የሱሳ ካልያዋንቱፕ እቱ ይሁዳ አስቆሮቱ ያገትያዌ ቄሳቱዋ ካፓቱዋኮ

15 ቢደ፣ “ታን ህንተንቶ የሱሳ ኦይፕ፣ ታዉ አያ እማንቱ?” ያግና ኡንቱንቱ አዉ ሀታሙ ብራ ቆፒደ እሜድኖ።

16 ሄዋፕ ጉይያን፣ ይሁዳይ የሱሳ አላ እማናዉ እንጀትያ ዋድያ ዋቹ።

የሱስ አይሁዳቱ ፓስጋ ካዉዋ ባረና ካልያዋንቱና ሜዳ
(ማር. 14:12-21፤ ሉቃሳ 22:7-14፣ 21-23፤ ዮሃ. 13:21-30)

17 ባላ ደቡዋ ምያ ጋላሳ ቦንቶያ ኮይሮ ጋላስ፣ የሱሳ ካልያዋንቱ እኮ ዪደ፣ “ፓስጋ ቦንቶያ ጋላስ ኔን ማና ቁማ ሀቃን ገግሳኔ?” ያጌድኖ።

18 ሄዋፕ ጉየ የሱስ ኡንቱንታ፣ “ካታማ ቢደ፣ እት ብታንያ፣ ታማሮሰያዌ ኔና፣ “ታዉ ዋዲ ጋኬዳ፤ ታን ታና ካልያዋንቱና ፓስጋ ቦንቶያ ጋላሳ ነ ሶይን አፋና” ጌዳ፣ ገተ” ያጌዳ።

19 አ ካልያዋንቱ የሱስ ባረንታ አዛዞዋዲን ኡሊደ፣ ፓስጋ ቦንቶያ ጋላስ ማና ቁማ ገግሴድኖ።

20 ሳእይ ኦማሮሴዳ ዋደ፣ የሱስ ታማነ ላኡ አ ካልያዋንቱና ቁማ ማናዉ ኡቴዳ።

21 ኡንቱንቱ ሚሸን፣ የሱስ ኡንቱንታ፣ “ታን ህንተንቶ ቱሙዋ ኦዳይ፤ ህንተፕ እት ኡራይ ታና አሊደ እማናዋ” ያጌዳ።

22 ኡንቱንቱ ዳሪ ዳጋሚደ፣ ሁሲያን ሁሲያን፣ “ሳዳዉ፣ ቱሙ ታኔሻ?” ጉሳ ደሜድኖ።

23 የሱስ ዛሪድ፡ “ባረ ኩሽያ ታናና እትጥ ዋጪትያፕ የዲደ ቱሽያዌ ታና እሐ እማና።

24 ታን፡ እሳ ናእይ፡ ጸሳ ማጸፋይ ሀይቃና ጌዳዋዳን ሀይቃና፤ ሸን ታና፡ እሳ ናእ፡ እሐ እምያ ኡራው አየር፤ ሄ ኡራይ የለተናን አቴደንቶ አው ሎእ ሸን” ያጌዳ።

25 አ እሐ እምያ ይሁዳይ ዛሪድ፡ “ታማርሰያዎ፡ ኔን ግያዌ ታኔ?” ያጌዳ።

የሱስ ዛሪድ አ፡ “ኔን ነ ሁጲያን ጋዳ” ያጌዳ።

ጎዳ ካወዋ አክያ ዎጋ

(ማር. 14:22-26፤ ሉቃሳ 22:15-20፤ 1 ቆር. 11:23-25)

26 ኡንቱንቱ ሚሸን፡ የሱስ ዳቡዋ እኪድ፡ ጸሳ ጋላቲዳ፤ ሄ ዳቡዋ መንግሥታዊ፡ ባረና ካልያዋንቶ እሚድ፡ “ሄይተ፤ ሚተ፤ ሀዌ ታ አሹዋ” ያጌዳ።

27 ጹኣ እኪድ፡ ጸሳ ጋላቲዳ። ኡንቱንቶ እሚድ፡ “ኡባይ ሀዋፕ ኡሸተ፤

28 እያው ጎፕ፡ ሀዌ ዳር እሳ ናጋራይ አቶ ጌተታና ድራው ጉክያ ታ ሱላ፤ ታ ሱላይ ኦራላ ጫቁዋ።

29 ሸን ታን ሀንተንቶ ኦዳይ፤ ታን ታ አቡ ካወተላን ኦራላ ዎይንያ ኤሳ ሀንተንቱና ኡሻና ጋላሳይ ጋካናው፡ ላኤንሉዋ ሀ ዎይንያ ኤሳ ኡባካ ኡሸከ” ያጌዳ።

30 ማዝሙርያ የጸዋፕ ጉይያን፡ ደብረ ዛይተ ጌተትያ ደርያ ቤድና።

የሱስ ጳጵርሰ ካዳናዋ ካሰቲደ ኦዴዳ

(ማር. 14:27-31፤ ሉቃሳ 22:31-34፤ ዮሃ. 13:36-38)

31 የሱስ ሄ ዎደ ኡንቱንታ፡ “ሀቼ ቃማ ሀንተንቱ ኡባይ ታና አጊደ ክቻና፤ እያው ጎፕ፡ ጸሳ ማጸፋይ፡

“ ጸሳይ ደርሳ ሄምያዋ ዎቆናዋ፤

ሄዋፕ ጉይያን ደርሳ ዉዲ ላለታናዎ”

ያጌ።

32 ሸን ታን ሀይቁዋፕ ደንዶዋፕ ጉይያን፡ ሀንተፕ ካሰታደ ጋለላ ባና” ያጌዳ።

33 ጳጵርሰ ዛሪድ፡ “ኡንቱንቱ ኡባቱ ኔና አጊደ ክቻናዋንታ፤ ታን ኔና ኡባካ የጋደ ክቻከ” ያጌዳ።

34 የሱስ ጳጳሮሳ፡ “ታን ነጩ ቱሙዋ ኦዳይ፤ ሆቼ ቃማ ኩቱ ዋሳናፕ ካሰ፡ ኔን ታና ሄዙ ካላ ካዳናሳ” ያጌዳ።

35 ጳጳሮስ ዛሪደ፡ “ታን ሀራይ አቶ፡ ኔናና እትፕ ሀይቂንቶካ፡ ኔና ኡባካ ካድከ” ያጌዳ። ቃይ የሱሳ ካልያዋንቱ ኡባቱካ ሄዋዳን ጌድኖ።

የሱስ ጌተሰማንያን ዋሴዳ
(ማር. 14:32-42፤ ሉቃሳ 22:39-46)

36 የሱስ ሄ ዋደ ባረና ካልያዋንቱና ጌተሰማንያ ጌተትያሳ ቢደ ኡንቱንታ፡ “ታን ህን ባደ ጸሳ ዋሰሽን፡ ህንተንቱ ሀዋን ኡትሸተ” ያጌዳ።

37 ሄዋፕ ጉየ ጳጳሮሳን ዛብድኖሳ ናና ላኡዋ ባረናና አፊደ፡ ዳሮ ካዩዋን ኡጋ ደሜዳ።

38 ቃይ ኡንቱንታ፡ “ታን ሀይቃና ጋካናዉካ ካዮታይ፤ ሀዋን ቤጎቲደ፡ ታናና ናግተ” ያጌዳ።

39 ላፋ ሰንሳኮ ሸቂደ፡ ሳእን ጉፋኒደ፡ “ታ አቦ፡ ዳንዳየትያዋ ግዶፕ፡ ሀ ጸኢ ታፕ ድጋ፤ ሽን ኔን ኮይያዋዳን ሀናፕ አትን፡ ታን ኮይያዋዳን ሀናፕ” ያጌደ ጸሳ ዋሴዳ።

40 የሱስ ባረና ካልያዋንቱኮ ሰሚደ ዬዳ፤ ገምእሸዋንታ ደሚደ ጳጳሮሳ፡ “ህንተንቱ እት ሳተንቶነካ ገምእሸናን ታናና ናጋናዉ ዳንዳይቢይክቴ?”

41 ፓጭያን ህንተንቱ ገለና ማላ፡ ምንተነ ጸሳ ዋሰተ፤ አያናይ ጊግ ኡቱዳ፤ ሽን አሳተላ ኤሻይ ዳቡራንቻ” ያጌዳ።

42 የሱስ ቃይ ላኤንሉዋ ቢደ፡ “ታ አቦ፡ ታን ሀ ዋልቃማ ሙቱዋ እከናን ደእሽን ጸኡ ደንላናዉ ዳንዳየተናዋ ግዶፕ፡ ኔን ግያዌ ሀኖ” ያጌደ ጸሳ ዋሴዳ።

43 ቃይካ ሰም ዪደ፡ አ ካልያዋንቱ አይፍያ ገምእሹ ጎዘ ዋሌዳ ድራዉ፡ ገምእሸዋንታ ደሜዳ።

44 ቃይካ ኡንቱንታ የግ ቢደ፡ ሄዘንሉዋ ካሰ ቃላ ዛሪደ፡ ጸሳ ዋሴዳ።

45 ሄዋፕ ጉይያን፡ ባረና ካልያዋንቶ ዪደ፡ “ሀእ ጋካናዉካ ገምእሹቲነ ሸምፕቲ? በአተ፡ ታና፡ አሳ ናኡ፡ ናጋራንቻ አሳቶ አሊደ እምያ ዋዲ ጋኬዳ።

46 ደንድና ቦይተ፤ በአተ፡ ታና አል እምያዌ ሀዌኩ ጋኬዳ” ያጌዳ።

የሱስ ባረ ሞርከቱዋን ኦይቀቴዳ
(ማር. 14:43-50፤ ሉቃሳ 22:47-53፤ ዮሃ. 18:3-12)

47 የሱስ ሄዋ ብር ሃሳይሽን፣ ታማነ ላኡ አ ካልያዋንቱ፣ ገብ፣ ይሁዳይ፣ ጋክ ዋዴዳ፣ ቃይ ቁሳቱዋ ካፓቱነ ጋድያ ጭማቱ ኪትና፣ ማሻነ ጸምአ ኦይቄዳ ጮራ አሳይ አናና እትፕ ዬዳ።

48 የሱሳ አሐ እምያዌ ሄ ጮራ አሳ፣ “ታን የርያዌ አ፤ አ ኦይቄተ” ያጊደ ማላ ኦድ ዋሌዳ።

49 ኤለካ የሱሳኮ ሸቂደ፣ “ታማርሰያዎ፣ ሳር ደአይ” ያጊደ አ የር አኬዳ።

50 የሱስ ይሁዳ፣ “ታ ላገዉ፣ ኔን ኦላናባ ኦላ አጋ” ያጊዳ።

ሄዋፕ ጉይያን፣ ሄ ጮራ አሳይ ሸቂደ፣ የሱሳ ሎይሐ ኦይቄዳ።

51 የሱሳና ደእያዋንቱ፣ ገብ ሳር ማሻ ከሲደ ቁሳቱዋ ኡባቱዋ ካፕዋ ቆማ ሀይሳ ቃንጽ ኦሌዳ።

52 የሱስ ሄ ዋደ አ ሀዋዳን ያጊዳ፣ “ሃ ማሻ አኬዳሳን ዛራደ ዋላ፣ አያዉ ሳፕ፣ ማሻ ደንሐያ ኡባይ ማሻን ሀይቃና።

53 ታ አቡ ዳር ሻአ ኪታንቻቱዋ እት ኩላን የዲደ፣ ታና ማዳና ማላ፣ ታን አ ዋሳናዉ ዳንዳይያዋ ኤርኪ?

54 ያትና፣ ጸሳ ቃላይ ሀዋዳን ሀናናዉ በሴ ያጌዳዌ ዋኒደ ፖለታናዉ ዳንዳዪ?” ያጊዳ።

55 ሄዋፕ ጉይያን፣ የሱስ ሄዋን ሸቂዳ ጮራ አሳ ሀዋዳን ያጊዳ፣ “ታና ካይሶ ከሲደ፣ ካይሱዋ ኦይቄያዋዳን ኦይቃናዉ ማሻነ ጸምአ ኦይቄደ ዬድቱ? ታን ጌሻ ጎልያን ታማርሳደ፣ ጋላሳን ጋላሳን ህንተንቱና ኦሐያ ዋደ ታና ኦይቄበይክታ፤

56 ሸን ሀዌ ኡባይ ሀኔዳዌ ናባቱ ጸሳ ቃላን ጸፌዳዌ ፖለታናሳ” ያጊዳ።

የሱሳ ካልያዋንቱ ሄ ዋደ ኡባቱ አ የግ ቤድኖ።

የሱስ ፕርዳ ሻንጎ አዴዳ

(ማር. 14:53-65፣ ሉቃሳ 22:54-55፣ 63-71፣ ዮሃ. 18:13-14፣ 19-24)

57 የሱሳ ኦይቄዳዋንቱ ቁሳቱዋ ኡባቱዋ ካፕዋ ቃያፋኮ፣ ሀግያ ታማርሰያዋንቱነ ጭማቱ ሸቂዳሳ አኪደ ቤድኖ።

58 ሸን ጸጽርሰ ቁሳቱዋ ኡባቱዋ ካፕዋ ድርሳ ግደ ጋካናዉ፣ ሃኩዋን አ ካሌዳ፣ የዉዋ ዉርሰላ በአናዉ ድርሳ ግደ ገሊደ፣ ናግያዋንቱና ኡት አጌዳ።

59 ቁሳቱዋ ካፓቱነ ሸቂዳ አሳይ ኡባይ የሱሳ ዋዳናዉ አ ቦላ ዋርዱዋ ማርካ ደማናዉ ኮዬድኖ።

60 ሸን ሀራይ አቶ ጮራ አሳይ ዪደ፣ አ ቦላ ዋርዱዋን ማርካትናካ አፕ አይነ ደምበይክኖ። ጉየፕ ላአቱ ዪደ፣

61 “ሀ ብታኒ፡ ጋን ጸሳ ጌሻ ጎልያ ኮላደ፡ ሄዙ ጋላሳን ዛራደ ኬጸናው ዳንዳያይ” ጌዳ” ያጌድኖ።

62 ቄሳቱዋ ኡባቱዋ ካፑ ደንድ ኤቂደ የሱሳ፡ “ሀዋንቱ ኔና ሞትያ ሞቶ ነው ዛርያባይ ባዌ?” ያጌዳ።

63 ሸን የሱሰ ጮኤ ጌዳ፤ ቃይካ ቄሳቱዋ ኡባቱዋ ካፑ እ፡ “ታን ኔና ደኡዋ ጸሳ ሱንላን ጫላይ፤ ኔን ጸሳ ናኦ ክርሰቶሳ ግደፕ ኑው ኦዳ” ያጌዳ።

64 የሱሰ ዛሪደ፡ “ኔን ነ ሀ-ጸውካ ጋዳ፤ ሸን ታን ሀንተንቶ ኦዳይ፤ ሀዋፕ ሰንላን፡ ሀንተንቱ ታና፡ አሳ ናኦ፡ ዋልቃማ ጸሳፕ ኡሸቻ ባጋና ኡቴዳዋን ሳሉዋ ሻርያና ዪሸን በአና” ያጌዳ።

65 ሄዋፕ ጉይያን፡ ቄሳቱዋ ኡባቱዋ ካፑ ባረ ማዩዋ ፔቋ ኦሊደ፡ “ሀዌ ቦሬዳ፤ ኑና ሀዋፕ ሰንላን አያው ሀራ ማርካ ኮሺ? እ ሀእ ቦርያዋ ሀንተንቱ ሰሴድታ።

66 ሀንተንቱ ቆፋይ እዬ?” ያጌዳ።

ኡንቱንቱ፡ “አው ሀይቁ በሴ” ያጌደ ዛሬድኖ።

67 ሄዋፕ ጉይያን፡ ኡንቱንቱ አ ዴሙዋን ጨቺደ፡ አ ደቺድኖ፤ ሀራንቱ ቃይ እ ባቂደ፡

68 “ክርሰቶሳ! ኔን ኔና ናበ ጋሳሸን፡ ኔና ሾጮዳዌ ኦንንቶ እነ ኑው ኦዳ!” ያጌድኖ።

ጳጵሮስ የሱሳ ካዴዳ

(ማር. 14:66-72፤ ሉቃሳ 22:56-62፤ ዮሃ. 18:15-18፤ 25-27)

69 ጳጵሮስ ጎልያፕ ካረና ድርሳ ግደን ኡት ደእሸን፡ እት ቆማታ አኮ ያደ፡ “ኔንካ ጋሊላ የሱሳና እትፕ ደኦ” ያጋዱ።

70 ሸን እ ኡንቱንቱ ኡባ ሰንላን ሄ ቆማቶ፡ “ኔን ግያዌ አየንቶ ታን ኤርከ” ያጌደ ካዴዳ።

71 ቃይ ቢደ ድርሳ ፕንግያኮ ከሰሸን፡ ሀራ ቆማታ አ በኦደ፡ ሄዋን ደእያ አሳቶ፡ “ሀ ብታኒ ናዘሬትያ የሱሳና ደኤ” ያጋዱ።

72 ጳጵሮስ ላኤንሉዋ ጫቂደ፡ “ታን ሄዋ ብታንያ ኤርከ” ያጌዳ።

73 ላፋ ጋምእሸን፡ ሄዋን ኤቁዳ አሳይ ጳጵሮሳኮ ዪደ፡ “ኔንካ ቱማ ኡንቱንቱና እትፕ ደኦ፤ አያው ጎፕ፡ ኔን ሃሳይያ ሃሳያይካ ኔና ኤርሴ” ያጌድኖ።

74 ሄዋፕ ጉይያን ጳጵሮስ፡ “ታን ሄዋ ብታንያ ኤርከ!” ያጌደ፡ ባረና ሸቃነ ጫቁዋ ደማዳ።

ሄ ዎደ ኤለካ ኩቱ ዋሰ አጌዳ።
75 ጳጵሮስ ባረና የሱስ፡ “ኔን ኩቱ ዋሳናፕ ካሰ ሄዙ ካላ ታና ካዳናሳ” ጌዳዋ ሀሳዪደ፡ ካረ ከሲደ፡ ሴለት ዩኬዳ።

27

የሱስ ጵላጸሳ ሰንፋ ፕርዳዉ ሺቄዳ
(ማር. 15:1፤ ሉቃሳ 23:1-3፤ ዮሃ. 18:28-32)

1 ዎንታ ጉራን ቄሳቱዋ ካፓቱ ኡባቱን ጋድያ ጭማቱ የሱሳ ዎቆናዉ ማቀቲድና፤

2 ኡንቱንቱ የሱሳ ቃች አፊደ፡ ጋድያ አይሰያ ጵላጸሳዉ አሐ እሚድና።

3 የሱሳ ሄ ዎደ ኦይጫዳ ይሁዳይ ጵላጸሰ የሱሳ ቦላ ፕርዳዳዋ በኢደ፡ “አዩሮ! ኦይ፳ናን አጋርክታ!” ያጊደ፡ ሄ ማንእያን ሀታሙ ብራ ቄሳቱዋ ካፓቱን ጋድያ ጭማቶ ጉየ ዛሪደ፡

4 “ታን ጌሻ አሳ ኦይላደ ናጋራ ኦላድ” ያጌዳ።

ሽን ኡንቱንቱ አ፡ “ሄዌ ኑዉ እያ ሙቲ? ሄዌ ነ ሸን” ያጌድና።

5 ይሁዳይ ብራ ጌሻ ጎልያን ኦል አጌዳ፤ ኡንቱንቱ ማታፕ ቢደ፡ ሱለት ሀይቄዳ።

6 ቄሳቱዋ ካፓቱ ብራ አኪደ፡ “ሀ ብራይ ሱላ ሚሻ ግድሸን፡ ኡን ጌሻ ጎልያ ሚሻና ጋሐያዌ ዎጋ ግደና” ያጌድና።

7 ሄዋፕ ጉየ እትፕ ዘረቲደ፡ እማላ አሳዉ ዋሳ ጋድያ ኦላናዉ ኡርቃፕ ሚሻ ሙቅያዋንቱ ጋድያ ሻሚድና።

8 ሄዋ ድራዉ፡ ሄ ጋዲ ሀቼ ጋካናዉካ፡ ሱላ ጋድያ ጌተቲደ ጴሰቲ።

9 ናብያ ኤርማስ፡ “ኡንቱንቱ አዉ እማናዉ ቆፔዳ ሀታሙ ሹቻ ብራ አኪደ፡

10 ጎዳይ ታና አዛዘዋዳን፡ ኡርቃፕ ሚሻ ሙቅያዋንቱ ጋድያ ሻማናዉ እሚድና” ጌተቶዌ ሄ ዎደ ፖለቲዳ ጌዳ።

ጵላጸሰ የሱሳ ኡባባ ኦቼዳ
(ማር. 15:2-5፤ ሉቃሳ 23:3-5፤ ዮሃ. 18:33-38)

11 የሱስ ጋድያ አይሰያዋ ሰንፋ ሸቅና፡ ጋድያ አይሰያዌ አ፡ “ኔን አይሁዳቱዋ ካቲ?” ያጊደ ኦቼዳ።

የሱስ አ፡ “ኔንካ ጋደእ” ያጌዳ።

12 ቄሳቱዋ ካፓቱን ጋድያ ጭማቱ አ ዋትና፡ ኡንቱንቶ አይነ ዛሩዋ እምቤና።

13 ሄ ዎደ፡ ጵላጸስ የሱሳ፡ “ሀዋንቱ ኔና ሞትያባ ኡባ ሰሰኪ?” ያጌዳ።

14 የሱስ ሀሪይ አቶ፡ እት ቃላካ ዛረናን እጵና፡ ጋድያ አይሰያዋንቱ ዳሪ ማላለቲዳ።

የሱስ ሀይቆ ፕርደቲዳ
(ማር. 15:6-15፤ ሉቃሳ 23:13-25፤ ዮሀ. 18:39-40፤ 19:1-16)

15 ጋድያ አይሰያዋ ፓሰጋ ቦንቾያ ጋላሳን፡ አሳይ ኮይያ እት ኡራ ቃሹዋፕ ብልያ ዎጋይ ደኤ።

16 ሄ ዎደ እት ባርባና ጌተትያ የሱስ ዳሮ ኤሪቴዳ ኢታ ብታኒ ቃሾ ጎለን ደኤ።

17 ሄዋ ድራዉ፡ ጮራ አሳይ እትሳ ሸቄዳሳን ጵላጸስ፡ “ታን ህንተንቶ ባርባና ግያ የሱሳ ብሎ፡ ዎይ ክርስቶሳ ጌተትያ የሱሳ ብሎ?” ያጌደ አሳ ኦቼዳ።

18 አያዉ ጎፕ፡ ኡንቱንቱ ቃናቲደ የሱሳ ኦፊዳዋ እ ኤሬ።

19 ጵላጸስ ፕርዳ ጎለን ኡት ደአሸን፡ አ ማቻታ አዉ፡ “ሄ ጵሎ ብታንያ አይነ ኦሎፓ፤ አያዉ ጎፕ፡ ታን ሀቼ ቃማ አኩሙዋን አባን ዳሮ ሙቶታድ” ያጋደ ኪታዳ።

20 ሸን ቄሳቱዋ ካፓቱን ጋድያ ጭማቱ ጵላጸስ ባርባና ብሊደ፡ የሱሳ ዎቶዳዳን፡ ሸቄዳ አሳይ አ ዎሳና ማላ፡ አሳ ጭሜድኖ።

21 ጵላጸስ ዛሪደ ኡንቱንታ፡ “ታን ኡንቱንቱ ላእቱዋፕ ህንተዉ ኦና ብላናዳን ኮዪቲ?” ያግና ኡንቱንቱ፡ “ባርባና ብላናዳን ኮዪቶ” ያጌድኖ።

22 ጵላጸስ፡ “ያትና፡ ክርስቶሳ ጌተትያ የሱሳ ዎቶ?” ያጌደ ኡንቱንታ ኦቶና ኡባይ፡ “ማሰቃልያ ቦላ ሞሰማርያን ትሸቲደ ካቀቶ” ያጌድኖ።

23 ጵላጸስ አሳ፡ “አያዉ? አይ ኢታባ ኦፊዳ?” ያጌዳ።

ሸን አሳይ ካሰዋፕካ ባረንቱ ኮሻ ቶቄ ኦፊደ፡ “ማሰቃልያ ቦላ ሞሰማርያን ትሸቲደ እ ካቀቶ” ያጌድኖ።

24 ዋላሳይ ደንዳናዋፕ አትን፡ አይነ ሀነናዋ ጵላጸስ በኢደ፡ ሃላ አኪደ፡ “ሀ ብታኒ ሀይቄያዋን ታን ገልከ፤ ሄዋ ህንተንቱ ኤርተ” ያጌደ ሸቄዳ አሳ ሰንላን ባረ ኩሸያ ማጨቲዳ።

25 ሸቄዳ አሳይ ኡባይ ዛሪደ፡ “አ ሱላ ጎሚ ኦናን ኦናና ጋኮ” ያጌዳ።

26 ሄዋጥ ጉይያን፣ ጽላጸስ ባርባና ኡንቱንቶ ብሌዳ፤ ልሱዋን የሱሳ ሾጪደ፣ ማስቃልያ ቦላ ሞስማርያን ጅሺደ ካቃናዉ ኡንቱንቶ አሊደ እሜዳ።

ዋታዳራቱ የሱሳ ቦላ ቅሊጩድኖ
(ማር. 15:16-20፤ ዮሃ. 19:2-3)

27 ሄዋጥ ጉይያን፣ ጽላጸሳ ዋታዳራቱ የሱሳ ጋድያ አይሰያዋ ቤሩዋ አፍና፣ ዋታዳራቱ ኡባይ አ ሞይያን ዩይ አዲደ ኤቄድኖ።

28 አ ማዩዋ ቃር አኪደ፣ ዘኦ ማዩዋ አ ማይዜድኖ።

29 ቃይ አጉንሳ ካላቻ ገግሲደ፣ አ ሁጲያን ዋጮድኖ፤ አ ኡሽቻ ኩሽያን ማቃ ጸምኦ ኦይሊደ፣ አ ሰንሳን ጉልባቲደ፣ “አይሁዳቱዋ ካተዉ፣ ሳሮ ደአይ!” ያጊደ፣ አ ቦላ ቅሊጩድኖ።

30 አ ቦላ ጩቹድኖ፤ ሄ ማቃ ጸምኦ አኪደ፣ አ ሁጲያ ሾጩድኖ።

31 ኡንቱንቱ አ ቦላ ቅሊጩዳዋጥ ጉይያን፣ ዘኦ ማዩዋ አጥ ቃር አኪደ፣ አ ማዩዋ አ ማይዜድኖ፤ ቃይ ማስቃልያ ቦላ ሞስማርያን ጅሺደ አ ካቃናዉ አፌድኖ።

የሱስ ካቀቲዳ
(ማር. 15:21-32፤ ሉቃሳ 23:25-43፤ ዮሃ. 19:17-27)

32 ኡንቱንቱ ካረ ከሲደ፣ እት ሰሞና ጌተትያ ቀሬና ጋደ አሳ ደሚደ፣ የሱሳ ማስቃልያ ዋልቃን ቶሴድኖ።

33 ጎልጎታ ጌተትያሳ ጋኬድኖ። “ጎልጎታ” ያገትያዌ “ሁጲያሳ” ግያዋ።

34 ሄዋን ኡንቱንቱ ጫሜዳ ዋይንያ ኤሳ የሱሳዉ ኡሻናዉ እሜድኖ፤ እ ሄዋ ጋንጽ ጸሊደ፣ ኡሽናን እጾዳ።

35 ኡንቱንቱ ማስቃልያ ቦላ ሞስማርያን ጅሺደ አ ካቆዋጥ ጉይያን፣ አ ማዩዋ ሻኪደ፣ ሳማ የጊደ አኬድኖ።

36 ሄዋጥ ጉይያን፣ አ ናጋናዉ ሄዋን ኡት አኬድኖ።

37 ቃይ፣ “ሀዌ አይሁዳቱ ካትያ የሱሳ” ያጊደ ሞቱ ጸፈቶዋ አ ሁጲ ባጋና ዋጮድኖ።

38 የሱሳና ሄ ዋደ ላኡ ካይሳቱዋ እቱዋ አጥ ኡሽቻ ባጋና፣ ቃይ እቱዋ አጥ ሀድርሳ ባጋና፣ ማስቃልያ ቦላ ሞስማርያን ጅሺደ ካቄድኖ።

39 ኦግያና አድያ አሳይ የሱሳ ካዲደ፣ ባረንቱ ሁጲያ ቃሊደ ቦሬድኖ።

40 “ጌሻ ጎልያ ኮላደ ሄዙ ጋላሳ ግደን ኬጽያዎ፣ ነ ሁጲያ አሻ፤ ኔን ጸሳ ናኣ ግደፕ፣ አነ ማስቃልያ ቦላፕ ዎጳ” ያጌድኖ።

41 ሄዋዳንካ፣ ቄሳቱዋ ካፓቱ ህግያ ታማርሰያዋንቱናነ ጭማቱዋና እትፕ የሱሳ ቦላ ቅሊጪደ፣ ሀዋዳን ያጌድኖ፤

42 “ሀራንታ አሼዳ፤ ሽን ባረና አሻናዉ ዳንዳየና። እ እሰራኤልያ ካትያ፤ አነ ማስቃልያ ቦላፕ ሀእ ዎጳ፤ ኩንካ ቃይ አን አማናና።

43 ጸሳን እ አማነቱ፤ ጸሳይ እ አሻናዉ ኮዮፕ አነ አሸ፤ አያዉ ጎፕ፣ እ ባረና፣ ‘ታን ጸሳ ናኣ’ ጌ” ያጌድኖ።

44 ቃይ ሀራይ አቶ፣ አናና ማስቃልያ ቦላ ሞስማርያን ጵሽቲደ ካቀቱዳ ካይሳቱካ ሄዋዳን ጊደ፣ አ ቦላ ቅሊጪኖድኖ።

የሱስ ሀይቄዳ
(ማር. 15:33-41፤ ሉቃሳ 23:44-49፤ ዮሃ. 19:28-30)

45 ኡሱፑን ሳትያፕ ደሚደ፣ ኡዱፑ ሳትያ ጋካናዉ፣ ቢታይ ኡባይ ጳሚዳ።

46 ኡዱፑ ሳተ ግድያ ሄራን የሱስ ባረ ቃላ ጶቁ ኦሊደ፣ “ኤሎሄ፣ ኤሎሄ፣ ሳማ ሳባቅታኒ?” ያጌዳ። ሄዋ ጉሳይ፣ “ታ ጸሳዉ፣ ታ ጸሳዉ፣ ታና አያዉ ጮኡ ጋድ?” ጉሳ።

47 ሄዋን ኤቄዳ አሳፕ እቱ ሄዋ ሰሲደ፣ “ሀ ብታኒ ኤላሳ ጸሴ” ያጌዳ።

48 ሄ ማንእያን ኡንቱንቱፕ እቱ ዎጲደ፣ እሰፖንጅያ አኪደ፣ ጫላ ዎይንያ ኤሳ ግደ የጊደ፣ ሄዋ ማቃ ጸሞኣ ጸራን ዎሊደ፣ ኡሻናዉ አ ደናኮ ሺሼዳ።

49 ሽን የኮንቱ፣ “አነ ደአሻ፣ ኤላስ አ አሻናዉ ያናዌንቶ በአና” ያጌድኖ።

50 የሱስ ላኤንሱዋ ባረ ቃላ ጶቁ ኦሊ ዋሲደ፣ ሀይቄ አጌዳ።

51 አኬክተ፤ ጌሻ ጎልያን ካቀቱዳ ጋርዱ ቆሞፕ ዲገ ጋካናዉ፣ ላኡ ከሲደ፣ ፖሽት ዎጳዳ፤ ሳአይ ቃጾዳ። ቃይ ዛላይካ ጸልቀቱዳ፤

52 ጮራ ዱፉ ደየቱዳ። ጸሳ አሳፕ ጮራቱ ሀይቄዳዋንቱ፣ ሀይቄዋፕ ደንዴድኖ።

53 ኡንቱንቱ ዱፉዋፕ ከሲደ፣ የሱስ ሀይቄዋፕ ደንደዋፕ ጉይያን፣ ጌሻ ካታማ ቤድኖ፤ ሄዋን ኡንቱንታ ጮራ አሳይ በኤዳ።

27:40 ማቶላ 26:61፤ ዮሃ. 2:19 27:43 ዛረ. 22:8 27:46 ማዝ. 22:1 27:48 ማዝ. 69:21 27:51 ከሳ 26:31-33

54 ጾቱዋ ካገኘ አናና የሱሳ ናግያ ዋታዳራቱ ሳአይ ቃጽያዋን ሄዋን ሀኔዳዋ ኡባ በኤዳ ዋደ ዳሮ ያዬድኖ፤ ያሻ ጋሱዋን፤ “ቱሙ ሀዌ ጸሳ ናኦ” ያጌድኖ።

55 ሄዋን ጮራ ማጫዋንቱ፤ ጋሊላፕ ደሚድ፤ የሱሳ ማዲደ ካልያዋንቱ፤ ሃኩዋን ኤቄደ ጴሊኖ።

56 ኡንቱንቱ ግድን ማግዳላ ጌተትያ ካታማፕ ዬዳ ማይራማ፤ ያቆባነ ዮሴፎ ዳያ ማይራማነ ዛብድዮሳ ናና ዳያ ደኢኖ።

የሱሳ ሞገቱዳ

(ማር. 15:42-47፤ ሉቃሳ 23:50-56፤ ዮሃ. 19:38-42)

57 ሳአይ ኦማርሰያ ዋደ፤ ዮሴፎ ጌተትያ እት ዱረ ብታኒ፤ አርማትያሳ ካታማ ብታኒ ዬዳ፤ እ ባረ ሁጳወካ የሱሳ ካልያዋ።

58 ዮሴፎ ጵላጸሳኩ ቢደ፤ የሱሳ አሃ አካናወ ዋሴዳ፤ ጵላጸሰ ዮሴፎ እመታና ማላ አዛዜዳ።

59 የሱሳ አሃ አኪደ፤ ጌሻ ሞጉዋ ማዩዋን

60 ጸጺደ ባረወ ሞገታናወ ሹቻ ዋጮዳ ኦራላ ጎንጎሉዋ ግድን አ አሃ ዋሴዳ፤ ቃይ ሄ ጎንጎሉዋ ደናን ዋጋ ሹቻ ጎንዶርሰ ዋሴደ፤ ባሽ ቤዳ።

61 ማግዳላ ካታማፕ ዬዳ ማይራማነ የኮ ማይራማ ሄዋን ጎንጎሉዋኮ ስሚደ ኡቴድኖ።

62 ሳሞባታወ ጊገትያ ጋላሳፕ ዋንተላ ጋላስ፤ ቄሳቱዋ ካፓቱነ ፓርሳዋቱ ጵላጸሳና ጋከቲደ፤ ሀዋዳን ያጌድኖ፤

63 “ሳዳወ፤ ሄ ዋርዱ ፓጻ ደእያ ዋደ፤ ‘ታን ሄዙ ጋላሳፕ ጉይያን፤ ሀይቁዋፕ ደንዳና’ ያሳዋ ኑን ሀሳዬደ።

64 ሄዋ ድራወ፤ አ ሞጌዳ ጎንጎሉዋ ሄዙ ጋላሳ ጋካናወ፤ ሎይሐ ናጋና ማላ አዛዛርኪ፤ ሄዌ ቆዮፕ አ ካልያዋንቱ ቢደ፤ አ አሃ ወኢደ አሳወ፤ ‘ሀይቁዋፕ ደንዴዳ’ ያጋናዋንታ፤ ላኤንሐያ ባላይ ካሰ ባላፕ ኡባ ያ ኢታና” ያጌድኖ።

65 ጵላጸሰ ኡንቱንታ፤ “ሀንተንቶ ናግያዋንቱ ደኢኖ፤ ቢደ ሀንተንቶ ዳንዳየትያ ኮና ናግሸተ” ያጌዳ።

66 ሄዋፕ ጉየ ኡንቱንቱ ቢደ፤ ሹቻ ቦላ ማታፋ አታሚደ፤ ቃይ ናግያዋ ያን ዋሴደ፤ የሱሳ ሞጌዳ ጎንጎሉዋ ናግሴድኖ።

27:63 ማቶሳ 16:21፤ 17:23፤ 20:19፤ ማር. 8:31፤ 9:31፤ 10:33-34፤ ሉቃሳ 9:22፤ 18:31-33

28

የሱስ ሀይቁዋጥ ደንዴዳ

(ማር. 16:1-10፤ ሉቃስ 24:1-12፤ ዮሀ. 20:1-10)

1 ሳሞባታይ አድና ዋጋ ጋላስ ዋንታ ባካልያን፣ ማግዳላ ጌተትያ ካታማጥ ዬዳ ማይራማነ የኮ ማይራማ የሱስ ሞገቲዳ ጎንጎሉዋ በአናዉ ቤድኖ።

2 ጎዳ ኪታንቻይ ሳሉዋጥ ዋጄዳ ድራዉ፣ ሳክይ ዳር ቃጾዳ፤ ሄ ኪታንቻይ ዪደ፣ ሹቻ ጎንዶርስ ኦሊደ፣ አ ቦላ ከስ ኡቲዳ።

3 አ ማላይ ዋልቃንፋ ማላቲ፤ አ ማዩካ ሻቻዳን ቦላ።

4 ናግያዋንቲ ኪታንቻዉ ያሻ ኮኮሪደ፣ ሀይቁዳ አሳዳን ሀኔድኖ።

5 ኪታንቻይ ማጫዋንታ ሀዋዳን ያጌዳ፤ “ያዮፕተ፤ አያዉ ጎጥ፣ ማሰቃልያ ቦላ ሞስማርያን ድሺደ ካቁዳ የሱሳ ህንተንቲ ኮይያዋ ታን ኤራይ።

6 እ ሀዋን ባዋ፤ አያዉ ጎጥ፣ እ ባረ ጌዳዋዳንካ ሀይቁዋጥ ደንድ ድጌዳ፤ ሃ ዪደ፣ እ ሞገት ግሶሳ በእተ።

7 ህንተንቲ ሀእ ኤለካ ቢደ፣ የሱሳ ካልያዋንቶ፣ “የሱስ ሀይቁዋጥ ደንድ ድጌዳ። ቃይ አ ህንተጥ ካስቲደ፣ ጋሊላ ቤ፤ ህንተንቲ አ ያን በአና” ያጊደ ኦድተ። በእተ፣ ታን ህንተንቶ ኦዳድ” ያጌዳ።

8 ኡንቲንቲ ያዪድነ ቃይ ዳር ናሽቲደ፣ የሱስ ሞገቲዳ ጎንጎሉዋ ማታጥ ኤለካ ክቺደ፣ የሱሳ ካልያዋንቶ ኦዳናዉ ዋጾድኖ።

9 ሄ ማንእያን የሱስ ኡንቲንቲና ጋከቲደ ኡንቲንታ፣ “ሳሮ ደኢቲ” ያግ ከጌዳ፤ ኡንቲንቲ አኮ ሺቅ አ ገድያ ኦይቂደ፣ አዉ ጎይኔድኖ።

10 የሱስ ሄ ዋደ ኡንቲንታ፣ “ያዮፕተ፤ ታ አሻቲ ጋሊላ ባና ማላ፣ ቢደ ኡንቲንቶ ኦድተ፤ ኡንቲንቲ ታና ያን በአናዋንታ” ያጌዳ።

11 ሄ ማጫዋንቲ ብያ ዋደ፣ ጎንጎሉዋ ናግያ ዋታዳራቱዋጥ አማራዳዋንቲ ካታማ ቢደ፣ ሀኔዳዋ ኡባ ቄሳቱዋ ካፓቶ ኦዴድኖ።

12 ቄሳቱዋ ካፓቲ ጭማቱዋና እትጥ ሺቅ ዘረቲደ፣ ዋታዳራቶ ዳር ሚሻ እሚደ።

13 “ኡን ገሞእሹዋን ደእሸን አ ካልያዋንቲ ቃማ ዪደ፣ አ አሃ ዉኤድኖ” ያግተ።

14 ሀ የዉዋ ጋድያ አይሰያዌ ሰሶጥ፣ ኡን አዉ ኦድ አማንፋና፤ ቃይ ህንተንታ አይነ ህርግሰናዳን ኦፋና” ያጌድኖ።

15 ዋታዳራቱ ሚሻ አኪደ፣ ባረንቶ ኦዴዳዋዳን ኦፊድኖ። ሀ የወ አይሁዳቱዋ ማታን ሀቼ ጋካናዉ፣ ኦደቲደ ደኤ።

የሱስ ባረና ካልያዋንቶ ቤቴዳ
(ማር. 16:14-18፤ ሉቃስ 24:36-49፤ ዮሃ. 20:19-23፤ ኪታ 1:6-8፤ 1 ቆሮ. 15:3-8)

16-17 ሸን ታማነ እት አ ካልያዋንቱ የሱስ ባረንታ ቢተ ጌዳ ጋሊላ ጋድያ ቢደ አ በኤዳ ዋደ፣ አዉ ጎይኔድኖ፤ ሸን ኡንቱንቱፕ እቱ እቱ ሰዴድኖ።

18 የሱስ ኡንቱንቱኮ ሸቂደ፣ ኡንቱንታ ሀዋዳን ያጌዳ፤ “ማታይ ኡባይ ሳሉዋንነ ሳኣን ታዉ እመቴዳ።

19 ሄዋ ድራዉ፣ ህንተንቱ ቢደ፣ አሳ ኡባ ታና ካልያዋንታ ኦሐተ፤ አዉዋ ሱንፋን፣ ናኣ ሱንፋንነ ጌሻ አያና ሱንፋን ኡንቱንታ ጸማቅተ።

20 ታን ህንተንታ አዛዜዳባ ኡባ ኡንቱንቱ ናጋና ማላ፣ ኡንቱንታ ታማርሰተ፤ ታን ዋድያ ዉርሰላይ ጋካናዉካ ኡባ ዋደ ህንተንቱና ደእያዋ አኬክተ” ያጌዳ።

ጌሻ ማጻፋ

The Holy Bible in the Dawro language of Ethiopia

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Contributor: The Word for the World International

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011-2024, Wycliffe Bible Translators, Inc. and The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-01

PDF generated using Haiola and XeLaTeX on 2 May 2025 from source files dated 1 May 2025

585b63ca-b8e6-55c8-bfef-10bdc95ad69c